


SECONDE
PARTIE DES
PHILIPPIQUES,
CONTRE LES BVLLES.

& autres pratiques de la
faction d'espagne.

POVPR TRESCHRESTIEN,
Tres-puissant, Tres-victorieux & Tres-cle-
ment prince, HENRY LE GRAND,
toujours Auguste Roy de France & de
Nauarre.



ATOVRS



AV ROY.

SIRE,

JE me viens fidèlement acquiter des vœux sacrez que j'ay conceuz en vostre honneur, & me presenter humblement pour en promettre de nouveaux. SIRE, le bon œil dont vostre Majesté a daigné regarder mes premieres Philippiques, a fait naistre ces secondes filles de vostre bonté & grandeur, comme de mon vœu & de mon devoir. De là j'ay prins courage de les vous adresser : ne les pouvant retenir instement puis qu'elles sont vostres par tant de tiltres, & que ie vous les doy par tant de grâdes obligations. Ce seroit trop de presumption de les nommer vostres, SIRE, si les diuerses graces que vostre Majesté leur a inspirees, n'auoient merité pour elles l'honneur de ce nom : si ma deuotiense destinatio, & les iustes loix de mon seruice, ne vous les auoient plainement acquises. Mais puis que vos admirables perfections en ont produit le dessein en mon ame, & que vous estes vous mesmes la matiere honorable de mes œuvres : puis qu'elles n'ont esté basties que pour vostre seruice, qu'elles ne sont animees que de la force

A V R O Y.

de vos puissans droicts & authoritez eternelles, & que ie vous les doy de nature, de merite, & de promesse. vous ne leur pouuez bonnement refuser la iuste marque de celtitre. Rien ne leur a manqué qu'une chose, pour acquerir quelque vigueur proportionnee à la grandeur de cenom. Vos singulieres vertus, SIRE, en ayant fourny les fecondes semences, les ayant comme arrosees des prerogatiues de vostre sceptre, & leur ayant donné à propos la chaleur & influence du doux soleil de vostre grace: les ont respandues sur vne terre peu fertile, & commises à la culture d'un mauvais laboureur, dont la sterilité & l'ignorance raportēt ceste moisson si petite, & si pauvre. Mais tout ainsi que les fruicts qui naissent dans nos terres, destinez à l'usage de nostre maison, que nous auons veu croistre, & fait presque pousser avec nostre desir, nous sont beaucoup plus agreables, que les autres plus vigoureux & plus beaux, que nos voisins nous presentent. De mesme, ie prens ceste asseurance de vostre bonté, qu'elle receura d'un meilleur visage ces foibles deuoirs de mon seruice, que s'ils sortoient plus accomplis & plus forts d'une autre main, ou vostre faueur n'eust apporte nul aduantage. Il ne faut pas aussi iuger de la valeur des choses, par la couleur & l'apparence. Car parmy les imperfections que cē tri auail rapporte de la pauvreté du terroir, & de la faute du labourage: Vostre Majesté y remarquera quelque ombre de sa vertu, y recognoistrā des traits bien nets de sa fortune, y trouuera des traces fort certaines des autho-

ritez de sa Couronne, & y verra clairement reluire
la viue image de la fidelité de ses subiects, te le qu'ils
la doiuent à leur iuste Prince, restaurateur de l'Estat
de France, conseruateur de leurs vies, dignitez &
fortunes: attachees & noues à la sieme, de tous les na-
turels liens qui les peuvent attirer, & retenir en ceste
obligation si legitime. Qui fera comme i'espere, que la
richesse & le pris de la matiere, courants ce qui peut
manquer à la façon, excuseront en quelque sorte les
deffauts & la foiblesse de l'ouurier. Ceste esperance,
SIRE, iointe à vostre naturelle douceur, matirera
plus hardiment à vous presenter c'est ouurage : que
i'appendray d'une humble & deuotieuse main, sur
l'autel de vostre eternité cōme vn rude tableau de vos
merites, & vn portraict naif du deucir de vos sub-
iects. & apres vous auoir confirmé de la foy d'un re-
ligieux serment, les vœux precedens de mon seruice,
ie vous consacreray tous mes desseins, & mes labeurs
pour vous représenter tous les iours quelque effect de
ceste solennelle promesse, de la mesme affection dont
ie prie Dieu,

SIRE, vous donner avec la gloire de mille nouue-
aux Lauriers & triomphes la grandeur d'auant de
Septres & d'Empires que vous en desire & souhaitez

Vostre tres humble, tres-
fidelle, & tres obeissant
subiect & seruiteur

F. D. C.



PHILIPPIQUE TROISIEME.

NOUS rouillons sans re-
pos & sans fin vne ro-
che si penible, que lors
que nous la pensions a-
voir montée & arrestee
bien haut, elle recule & retombe plus
bas d'une cheute hautaine, comme
d'un roide precipice. Nous voulons
espuiser & tarir le desbordement d'un
fleuve rapide, & violant par des vais-
seaux, d'où il semble que l'eau de-
coule par mille endroicts, comme
des cruches des Belides. La fin d'une
tache n'est rien que le commence-
ment d'une plus grande. Car lors
que nous estimons avoir rangé sous
la sainte censure d'un Concile les
iniurieuses Bulles de la faction d'Es-
pagne, quand nous croyons avoir
coupé les trames maistresses, & les

PHILIPPE III.

plus grosses cordes de ceste longue
 coniuration; quand apres beaucoup
 de peine nous-nous cuidons trouuer
 au bout de ceste facheuse carriere, on
 nous vient trauerser nos desseins, &
 rompre ceste vigoureuse course de la-
 quelle nous pensions desia embrasser
 les termes, & atteindre de la main les
 couronnes, en nous tendant comme
 deux pieges de l'audace; & calomnie
 Espagnolle. C'est que nous auôs beau
 parler d'appel au futur Concile, puis
 que la conuocation de ces sacrez co-
 mices de l'Eglise est seurement enfer-
 mee en la main des Peres Romains,
 qui ne deploieront iamais ces saintes
 assemblees à la honte de Gregoire. Et
 que quand ils voudroyent bien con-
 sentir avec nous en l'ordre de ceste iu-
 stice, comme les diuerses obligations
 de nostre amitié, & ancienne alliance
 les en interpellent: les censures dont
 nous faisons tant de plaintes sont fon-
 dees & basties sur des raisons si legiti-
 mes, & necessaires, appuyees sur des
 considerations si meures, & si prudē-

res qu'en la face des plus exactes , & plus seueres Iuges du monde ils en deffendront le merite. Ainsi ils croiēt que nos desseings fuyent deuant nous portez de l'inconstance des vents, cōme foibles & vaines impressions formees sur les nuës. Que ce sont traictz lancez à l'aduanture , coups frappez & perdus en l'air , peinture tracee & desseignée sur l'eau , que les vagues entre-poussent & effacent. En fin que nous semons solement sur du sable, & des roches sauuages, d'où nous ne recueillirōs autre fruiēt que des espines & ronces poignantes. Il y a bien de la difficulté & de la peine à dissoudre, & deslacer ces neuds embrouillez & estaincts de tant d'artifice. Il est bien malaisé de fixer ce mercure si subtil & si coulant, & de surmonter cest Achelois qui ne combat que d'inconstāce, qui ne se deffend que de la mutation & varieté de ses formes. L'aprehension, & le regard d'un si grand labeur font presque chanceler l'esperance. Car c'est chose aussi certaine

PHILIPPE III.

qu'estrange, que les efforts d'une infinité d'abus rompant la belle anceinte & les cernes sacréz de la discipline, cōme torrens & escluses ouuertes ont tellement noyé les plus belles campagnes del'Europe, & couuert si haultement les plaines les plus larges des droicts & prerogatiues des Princes, qu'ils les ont rendues marefcageuses, & remplies de fondrieres, dont les ioncs mesmes sont nouëux. Il n'y a pource de terre qui ne tremble pour auoir esté souuent tanté & esbranlé: on ne scauroit marcher trois pas sans broncher ou enfoncer, si la chaleur de la vertu des Roys ne s'vnit & fortifie icy, pour desseicher comme des rayōs d'un soleil d'esté la bouë limoneuse de tant d'innondations, & de rauages. Sans leur secours, s'ils ne s'esuertuent & ne s'entraident, ceux qui traittent les droits de leurs couronnes n'auancent non plns que les pauvres gens de village qui bastissent des cassines sur le bord d'un grand fleuve, dont le canal plus large que profond sortant hors

des riuës, & se respandant à la venue de la premiere pluye emporte c'est ouurage boible, & rompt bien souuēt des secousses de mille vagues redoublées les chausses les plus fermes. On a si fort, & si confusément meslé toutes choses, & entrecoupé en tant d'endroits les autoritez des Princes qu'on n'y trouue plus rien d'vny ny de certain. Ce ne sont que pais deserts & raboteux, tous plains de choppemens & mauuaises rencontres. Ce sont arenes & vieilles sablonieres, ce sont Dedales confuz d'erreurs, & effroyables de destours & enlassemens si diuers, qu'ils demandent de nouueaux Theſſes. Nous ne marchons plus en la recherche de ces prerogatiues que sous l'espeſſeur & obscurité d'une nuë. On nous a tellemēt troublé l'air, que cōme en vne nuit espeſſe il faut descendre le flambeau en main és discours des choses les plus claires des affaires de l'Estat des Rois. Mais entre tant de sortes d'entreprises, il n'y a rien dont cest audacieux Espagnol se

PHILIPPOVE III.

veulle tant emparer que de l'indiction
 des Conciles generaux ; qu'il feint
 d'attribuer nuement, & priuatiuemēt
 au siege Romain: par ce, qui violantāt
 à tous propos son autorité, lui tenāt ri-
 goureusement le pied sur la gorge, il
 s'en sert & en abuse de force, emprun-
 te & employe son nom à toutes occa-
 sions, comme si c'estoit quelque in-
 strument voué à ses intentions ambi-
 tieuses. Sçachant donc la vertu des
 saints Conciles, & comme en leur
 sein loge & repose seurement toute la
 force, & maiesté de l'Eglise, que de
 leur iuste censure deppend naturel-
 lement la correction de tant de sortes
 d'abus qu'il pare & colore finement
 d'un faux esmail de religion, luy qui
 d'une ame plus cauteleuse que guer-
 rieres'est proposé sur le vicil exemple,
 & proiect de ses peres d'empieter la
 tyrannie de toute la Chrestienté par
 ces superstitieux artifices d'anathe-
 mes, en cuitant l'assemblee du Conci-
 le que nous attendons, pëseroit pres-
 que cuitier la iustice de l'iniure qu'il a

faite à la France, & continuer d'auancer couuertement tous ces mauuais desseins sous ces voilles, & specieux rideaux de saincteté, D'oser maintenant retirer ce qu'on a occupé iusques icy de l'autorité des Conciles, semblera bien vne aussi hardie entreprise que d'arracher la massue des poings d'Hercule. Toutesfois il faut prendre cœur à ce labeur voisin de nostre repos, & sous l'aspect bien-heureux & fauorable de l'œil de nostre Prince leuer encores les ancrs, & remettre les voilles au vent pour rentrer en ceste nauigation difficile, & perilleuse. Il faut bien qu'avec beaucoup de peine desfricher ce champ si monteux & pierreux, pour môstrer à tous les partisans de l'insolence Espagnolle, que quelque empeschement qu'on nous oppose, on ne scauroit rompre l'ordre ny retarder la venue du Concile que nous demandons: & que les Bulles de Gregoire que no^s esperons faire casser en ceste celebre assemblee, sont si nulles, si temeraires, si iniustes iniurieu-

PHILIPPE III.

ses, que c'est autant d'impudence de les deffendre, que de honte & d'arrogance de les auoir extorquées, & arrachees de force. Il ne faut point douter que ce ne soit cueillir des roses parmy des espaix hasliers herissez de toutes sortes d'espiues : mais cest aussi pour en tramer, & façonner le tissu d'un beau chapeau de fleurs pour le plus grand & plus braue Roy du monde. Ie veux protester d'entree, & graver ceste declaration sur la porte de cest edifice, que lors que les Papes imitans les vertueux & religieux pas de Clemēt V. voudrōt apporter leurs saintes mains à ceste iustice necessaire, & fauoriser nostre cause de leur autorité & assistance, ie trouueray tres-raisonnable de leur laisser entiers les mesmes droicts & honneurs en l'ordre de ces sacrez Comices que ce S. Pere, lumiere de l'Eglise obtint en l'assemblée & tenue du Concile de Vienne, conuocqué sur pareil subiect à la gloire de la Frâce. Mais quand ils se voudront ahurter aux mauuais
exem-

exemples de Gregoire, & faifans durer les alliences de fa coniuratiō avec nostre vicil ennemy, rompre ce coup de vertu à nostre innocēt: Le ne ſçau-rois voir d'un œil François qu'ils attirerent, & ſe donnent icy à nostre ruine plus de préeminence, & de pouuoir que leurs ſaincts & iuſtes predeceſſeurs ne leur en ont acquis en vne ſaiſon plus nette, & plus calme. Car il ſ'en faut tāt, ô factieuſe Eſpagne, que les anciens peres Romains, deſquels tu ſouilles tant les monuments & la memoire, euſſent ceſte plaine authorité d'aſſembler les Cōciles, que nous trouuons dans la verité de l'hiſtoire de l'Egliſe qu'ils ont ſouuent prié les Empereurs de les commander pour quelques affaires qu'ils leur propoſoient, & en ont eſté aſſez brusquemēt eſcondits & rebutez: comme Libe-
rius pour ſainct Athanaſe, & Innocēt
I. pour ſainct Chryſoſtome. Leon I.
aſſez aduantageux eſſaya bien de par-
uenir de ſoy-meſme à l'eſſect d'un
Concile, & touteſois il ſe trouua ſi

Theodo.

2.c.6.

Soſom. 8.

c.28.

PHILIPPE III.

court & si foible que Theodose le ieune l'empescha de tenir vn simple Synode prouincial pour la repurgation de la seule Italie le cœur, & le centre de son Archeuesché. Quand aux Conciles generaux il en fit instance par cinq ou six lettres à Theodose & à Martian, mais il eust si peu de credit en ceste endroit, qu'ayât supplié Martian de surseoir & remettre l'assemblée du Concile de Calcedone à une saison plus facile, & plus commode, ses prieres ne trouuerét point de grace. Les autres Euesques n'eussent pas lasché & quitté si franchement ce droict à Leon, principallemēt les peres de Gaule. Hilaire d'Arles luy en couppoit à tout propos le chemin, luy rompoit tous ses plus grands coups, & trauerçoit tous ses proiects. Que si ces assemblees plus celebres de nostre Eglise demandoient l'entremise de quelque Pasteur pour faire l'office de President, & directeur general de ce grand ouurage, Hilaire en prenoit tousiours la charge, & la paine sur la

Leo 1. cpi.

9. 24

Epe 1. 25

33. 35 42

43.

Epist 49.

50.

police, & reiglemens arrestez par
 le grand Concile d'Arles sous l'au-
 thorité & la presence de plus de six
 cens Euesques. & toutesfois ce pere
 Romain faisant effort à la saincteté
 de ce decret, mesconnoissant le pri-
 uilege & la grandeur du siege d'Ar-
 les, par vne lettre accuse Hilaire de
 presumption & d'entreprinse sur ses
 freres de la prouince de Vienne, qu'il
 prie avec vne infinité d'honnestes pa-
 roles de n'ouurir point de Cōcile sans *Leo. 1. epist, 89.*
 l'assistance, & la compagnie d'un cer-
 tain Leontius qu'il leur propose. Hé
 quelle soudure de mesme metal, quel
 le piece assez lustree & bien tenante
 pourroit-on attacher icy cōtre la gra-
 uité des lettres Sinodales de tous les
 huit premiers Conciles generaux, si *Tom. 1. 2. et 3. Con*
 plaines du nom & honneur des Em-
 pereurs, si vuides des droicts de toute
 autre puissance? ou tous les Peres res-
 pandant par le monde la souëfue o-
 deur de leur obeissance. publient si
 hautemēt qu'ils ont esté tirez de tous
 es endroits & extremitez de la terre

PHILIPIQUE III.

sur les commendemens & lettres patentes de leur Princes, pour y traiter en semble des affaires de la religion? N'est ce pas le tefmognage de Sozomene & la verité de toutes les histoires del'Eglise? Quand les premiers Papes ont fait plainte des vices naissans des formes obmises en quelques Conciles, quand ils ont voulu coter des defectuositez sur le mespris de leurs dignitez negligees, ont ils assailly les decrets de ces cōpagnies par la foiblesse. & les defauts de l'indiction? ont ils debatue, & esbranlé l'honneur de la conuocation pour n'estre sortie de leur monuemēt, & de leurs lettres?

Socrat.
Theodor.
Sosomen.
Euagr.

Sosom. 3. Iulles I. & Damascus accuserent seule
c. 9.
Theod. 2. ment les Conciles d'Antioche & d'Ariminy, pour n'y auoir pas esté semonds & inuitez comme les autres Euesques, selon le decret d'une ancienne loy de l'Eglise, qui deffend de receuoir pour arrests d'un Concile general, les resolutions où les Papes n'aurōt esté appelez. Que s'ils eussēt pretēdu quelque part en la gloire de

la cōuocation, ils n'eussēt pas querel-
 lé pour vn subiet si leger, & si maigre,
 & d'un grand mot eussent renuersé
 l'auctorité de ces assemblees, faute de
 legitime promotion, comme liberti-
 nes, factieuses, publiques & tenues sans
 l'ordonnance ou l'adueu de celuy qui
 de droict en deuoit estre le souuerain
 modérateur & le maistre. Il est bien
 aisé de iuger qu'ils n'auoient pas be-
 aucoup à uoir en l'indiction des Con-
 ciles generaux, puis que lors mesme
 que ces grandes diettes & iournees
 ont esté commandees par les Prin-
 ces, l'honneur du premier siege ne leur
 a pas tousiours acquis la premiere, &
 principal place. Qui fut cause que
 Vigilius se trouuant tout porté au
 cinquiesme Concile general tenu
 souz Iustinian, cōme il vit que la pre-
 sidence estoit decernée à Eutichius
 Patriarche de Constantinople, il con-
 trefit le malade pour cūter par la
 feinte de son indisposition ceste ren-
 contre ambitieuse. C'a esté tousiours
 la prudance Romaine. Car si on des-

PHILIPPE III.

couuroit ou esuentoit tant soit peu qu'il se pourroit trouuer en ces grandes compagnies quelque plus ancien Euesque, ou autre graue personnage de nom qui pourroit debatre ceste prerogatiue d'honneur, ou à qui les Princes la voudroient octroyer, pour ne riē hazarder on n'y alloit, ny ny enuoyoit point de Legat pour représenter le siege. On prioit seulement par lettres fort affectionnées, & plaines d'excuses recherches le Prince ou directeur du Concile, de vouloir tenir la place de Rome, qu'on appelloit en la cérémonie des Conciles, conseruer & remplir le lieu des absents: artifice employé enuers Cyrilius, au premier Cōcile d'Epheze. Par là on gaignoit deux poincts, c'est qu'on n'emettoit iamais le rang en controuerse & en dispute, pour ne courir point fortune de l'honneur: Et le President du Concile en soubscrivant le premier donnoit également son seing pour le siege Romain, comme pour soy-mesme: qui est vn des grands fondemens

qui portent ces preeminences & pretentions nouvelles en l'ordres, & façon des Conciles Pour cela le lecteur Theodore raconte en ces collectanees, que l'Euesque Macedonius respondit à l'Empereur Anastase qu'il pressoit trop de reuoyer & abolir la confession de Calcedone, qu'il estoit hors de sa puissance de l'entreprendre sans l'approbation & l'adueu d'un Cõsille general, ou le Pape presida. Mais que croyrés nous du pouoir des Legats Romains, auront ils icy ce qu'on a refusé à leurs Maistres? On peut voir par les actes du premier Concile de Nice, & du sixiesme de Cartage que ce n'estoit pas eux qui en la sceance des Conciles obtenoiēt tousiours les premiers rangs, & les plus hautes places. Les Ambassadeurs du Pape Agaton assisterent bien au sixiesme Sinode general tenu à Constantinople, & toutfois George Patriarche de la ville & Machaire Archeuesque d'Antioche, tous deux heretiques qualifiez & formez, comme

Tom. I.
Cõc. The-
odorit 1.
c. 7.
Balsamo.

PHILIPPE III.

Beda de dit Beda, les deuencerent & s'affirent
ration. au costé droict de l'Empereur. Cōme
temp. tom au secōd de Niccēptielme vniuersel,
2. Coc. Tharasius Archeuesque de Constantinople fut tousiours recogneu & nō-
To. 3. Con. mé pour président, & couché le pre-
 mier en la lettre Sinodale, combien
 que les Legats du Pape feussent de la
 troupe. Cest honneur estoit laissé
Euseb. 3. d'ordinaire au Metropolitain, ou à
de vit. Cō l'Archeuesque de la prouince: ou biē
stan c. 10 donné à quelque sçauāt homme fort
611. remarquable de religion, & de sain-
Theodor. cteté de vie. Car au premier concile
1. c. 7. de Nicē l'Empereur s'en fia à Eusta-
 chius Archeuesque d'Antioche, qui
 s'assist à sa main droite. Osius de Cor-
 douē est souuent appellé par Athana-
 se en ses Apologies Prince du Conci-
To. 2. Cō le de Sardique, Et la premiere action
 du concile de Calcedonne tesmoi-
 gne, que Thodose le ieune par lettres
 pattentes honnora Dioscorus, non
 encores conuiancu d'heresie, de la
 cōduitte du secōd d'Ephese. Aucto-
 rité fort ialouse que les Princes auoiet
 eter-

eternellement & purement reservee
 à leur grandeur, declarant par ordon-
 nance expresse qu'à leurs Majestez seu-
 les touchoit de departir les plus hauts
 & plus dignes rangs, & d'assigner les
 degrez plus esleuez des sieges des cō-
 ciles, sans qu'il fust loisible aux plus
 grands d'entre les Euesques de s'y ad-
 uancer d'eux-mesmes, ou d'en rece-
 uoir l'honneur d'ailleurs que de leur
 main, & de leur grace. Certes la plus
 part du tēps c'estoient les Empereurs
 mesmes qui presidoient aux conciles,
 qui faisoient magnifiquement reluire
 ces grandes iournees des beaux & es-
 clatans esclairs de leur pourpre, & de
 toute la plus riche monstre de la Ma-
 jesté Royale. Constantin accreut, &
 combla de l'honneur de sa presence,
 & de la suite d'une magnifique court
 la dignité du concile de Nice, es-
 blouyssant de grādeur, rauissant d'ad-
 miration & d'aïsetant de pauvres &
 simples peres à la nouvelle veuë de
 tāt de superbe pompe qu'il apporta à
 l'ouuerture de ce cōcile celebre. Cō-

C. l. decernimus C. de sacros. Eccl.

Euseb. 3. de vit. Const. Theodoris. l. c. 7.

PHILIPPIQUE III.

Socrat. 2. c. 29. stantius apres luy se trouua à Milan,
Euagr. 2. c. 4. Theodose se fit voir au concile de Ro-
To. 2. Conc. me, Martian entra souuent au concile
de Calcedone: & par toutes les ses-
sions du sixiesme Synode vniuersel
nous remarquons que Constantin le
Barbu interroge luy mesme les Peres,
leur demande de rang leur aduis, &
faict toute la charge & l'office d'un
President de concile. Pieté chrestien-
ne & Royale imitee depuis bien au
Tom. 2. Concil. naïf par noz Princes, comme Chilpe-
ric, Gōtran, Charlemagne, Philippes
Auguste, Philippes le Bel, & autres
d'eternelle memoire: entre lesquels
Charlemagne conceut & publia tous-
iours les Epistres Synodiques en son
nō. De luy les Empereurs d'Occident
apprirent à presider és saincts con-
ciles de leurs Estats. C'est la vertu de
Loys 1. Loys 2. Arnolphe, Otton 1. &
autres ses successeurs en la Majesté de
l'Empire. Que si d'aventure les Prin-
ces Romains occupez & detenus en
d'autres affaires, destournez & di-
straits par tant de diuers soucis qui

s'enchaſſent d'ordinaire dās l'or plus
precieux des diademes royaux, qui
s'enveloppent & ſe cachent ſouz la
ſplendeur de leurs bandeaux, qui ren-
dent ſi peſantes ces riches couronnes
eſmaillees de pierrerie bien que ag-
greables à la veüe, ne pouuoient con-
tinuellement aſſiſter à toutes les a-
ctions d'un Concile, & en conduire
l'ordre du bon heur de leur œil & de
leur prudence; Ils y laiſſoient, & dele-
guoient de leur part quelque magi-
ſtrat de haute dignité, à qui ils don-
noient charge de tenir leurs places, &
de manier & cōtenir l'aſſemblee ſouz
l'auctoriété des enſeignes imperiales.

Euseb.

Police introduiète par Constantin le
Grand, cōtinuee par ſes enfans, & re-
miſe au iour par Martian, Constantin

Ruffin.

Socrat.

Soſom.

II. & beaucoup d'autres de qui nous
auons rapporté le ſoing religieux ſur
la ſaincte diſcipline de l'Egliſe. Il eſt
vray que les Empereurs eſliſoient &
choiſiſſoiēt touſiours quelqu'un d'é-
tre les peres, quelquesfois deux ou
trois, à qui ils commettoient ſouz eux

Philippi. 1.

PHILIPPIQUE III.

comme vne espece & forme de pre-
 fidēce: parce qu'ils estoient plus pro-
 pres & plus capables pour faire les
 propositions & ouuertes, mettre en
 auant les difficultez qui auoient don-
 né occasion à l'assemblée du concile,
 recueillir & conter les voix, dresser &
 mettre en ordre les dernieres résolu-
 tions: à quoy les Roys n'eussent peu
 bonnement vacquer, sans se lasser &
 se donner trop de peine. Il ne se faut
 donc point estonner si toutes ces di-
 uerses autoritez, ces pouuoirs si emi-
 nens & si absolus, & tant de sortes de
 prerogatiues ont demandé que la cō-
 uocation des conciles fut logee en la
 main des princes, tant pour la digni-
 té & importance de ces grandes as-
 semblées, que pour le deuoir des su-
 jets, l'honneur & le rang de la meie-
 sté Royale en l'ordre du Christianis-
 me. Car les conciles sont en l'Eglise
 comme vn Acrocorinthe, vne Roc-
 que & forteresse imprenable, comme
 les grandes armées & exercites de
 Dieu. Ils sont le sanctuaire eternel de

*Euseb. 1. de
 Const.
 6.6. & 7.*

tous les plus saints & plus graues my-
steres de la religion, & l'Eglise mesme *In Concil.*
vniuerselle. Aussi c'est là quel'Eglise se *Constant.*
monstre à visage ouuert, en sa naturel- *& Basil.*
le vigueur & majesté pleine; où s'esta-
blissent les loix & la police comme
les nerfs qui la manient, & font mou-
voir de ses mesures plus certaines &
plus reglees. C'est comme la forge de
toute ceste belle discipline, & où elle
reçoit sa trempe plus asseuree & plus
durable: c'est comme la source d'où
decoulent par tout le monde les clairs
fleuves des belles resolutions de la foy
qui lauent si nettement, & entretien-
nent si fertilement le Christianisme:
d'où coulent d'un cours egal, & limite
les decrets de tout le reglement &
gouuernement Ecclesiastique, qui le
maintiennent & conseruent en sa for-
ce & beauté naturelle. Ce sont com-
me les charitables mammelles de no-
stre nourriture spirituelle: & comme
les coffres de reserue où sont gardez
en espargne les tresors de nostre reli-
gion. Là comme à vn feu celeste à la

PHILIPPIQUE III.

guise des Vestales Romaines nous allumons les diuins flambeaux de nostre creance : & ce que le saint Esprit conclud en ces celebres iournees dure d'un eternal arrest. Puis donc que la vertu & la force des Conciles est si grande & si importante , l'honneur de la conuocation comme de la conduite n'en pouuoit estre deu qu'aux Roys. Pour estre si grands en l'Eglise ; & pour se trouuer plus propres & plus capables pour en conceuoir & donner le commandement, bailler les sauf-conduicts, & fournir aux fraiz de ces nombreuses & populeuses compagnies. A qui seuls encore tous les Euesques pouuoient sans contention obeir iustement , qui n'eussent pas cedé peut estre en leurs prouinces à l'autorité de quelqu'autre de leur condition , n'eussent pas pensé estre liez à leurs lettres , ny deuoir mettre le pied hors de leurs Dioceses par la semonce d'autres mandemens, tant l'ancienne aliance & amitié des Eglises qui moderait & donnoit l'or-

dre aux premiers conciles estoit affoiblie, esteinte, presque effacee. He qui eut peu legitimement & seurement, hors de soupçon de choses nouvelles remuer ainsi tous les coings de la terre, en appeller & attirer tant d'hommes d'honneur & de qualité, si puissans parmy les peuples, que les seuls Princes? Quels estats, quels ordres se peuuent ioindre & assembler extraordinairement pour traiçter des affaires publiques, de quelque marque qu'elles puissent estre, sans cōmandement ou permission des Roys? Ne leur eust-ce pas esté vn apparent suieçt de defiance, de voir toutes les plus superbes prouinces, & iusques aux plus petites & plus esloignees parties de l'Empire. deleguer des gens de respect, & de creance, pour tenir ensemble des conseils? Ne pouuoient-ils pas tomber aux apprehensions de Licinius, & craindre avec quelque raison qu'on eust desseigné & complotté quelque chose contre leur seruice, qu'on voulut promouuoir quelque

PHILIPPIQUE III.

poinct d'Estat; meſmement en vne ſaiſon où lon auoit veu trop ſouuent vn Empereur chaſſer l'autre, les Gouverneurs des païs, & les chefs des armées ſ'eſleuer contre les princes, leur oppoſer les Aigles aux Aigles, & leur arracher de force le ſceptre des poings, par des pratiques & longues menees, par des parties ſourdes, & ſecrettes, qu'on auoit dreſſees à leur negligence? N'y auoit-il pas bien occaſion de redouter qu'on miſt en deliberation d'autres choſes que de la Religion? Et puis que c'eſtoit pour decider & definir en ces fameuſes aſſembles des difficultez de la foy, & des affaires de la Religion, pour eſtablir des loix ſur les mœurs & la police, pour baſtir des reglemens, & ordōner des decrets neceſſaires à conduire & gouverner les Eglises; à qui touchent plus qu'aux Roys les affaires de la religion, puis qu'ils ſont Lieutenans de Dieu? A qui appartiēt-il mieux d'eſtablir des loix ſur la police & les mœurs, puis qu'ils ſont Rois? Qui peut donner plus de
force

force à l'obseruance des decrets & de toutes les sainctes constitutiōs? Sous quel nom plus legitime peuuent elles cognoistre la lumiere? Sans les marques du Magistrat ne peuuēt elles pas estre suspectes aux yeux des sujets? Les Empereurs ont sagement preueu que ce nom specieux de pieté, que ceste belle & agreable couleur de Religion pourroit par l'abus deuenir couuerture d'autres choses cachees sous son lustre: que la deliberation de la foy qu'on doit à Dieu pourroit faire ouuertute & entree au propos de la foy qui nous oblige aux princes. Qu'en frappāt les cordes des loix de l'Euan-gile, on pourroit esmouuoir & faire brâsser celles de l'Estat, cōme presque montees & tendues en vniffon, qu'on pourroit de loing sapper l'Empire par des religieux artifices: couuer en vn seul lieu vn feu subtil & dāgereux qui espāndroit apres ses flāmes plus loing, ietteroit ses estincelles par tout le monde: Et que les deputez d'vn concile fils se vouloient oublier en leur

PHILIPPIQUE III.

devoir, & pervertir la saincteté de leurs charges pourroient estre autant d'allumettes ardantes pour ensouffrer & embraser en mille endroits, le plus grád & plus puissant Royaume. C'est pourquoy par les eternelles sanctions d'un Edict, les Empereurs attachèrent & lièrent fermement à leurs diademes l'honneur & le pouuoir souverain de la conuocation des Conciles: que l'usage leur a heureusement confirmé. Car ils n'eurent pas plustost mis le pied dans l'Eglise que les peres mesmes les supplierent de prendre ce soin en main; Et quand ils ont eu affaire de ces lustres sacrez & salutaires, pour faire comme vne monstre, reueuë, & denōbrement de la milice Chrestienne, & de tout l'ordre de l'Estat de l'Eglise, pour faire voir vne forte & celebre censure de toutes les affaires de la Religion, ils ne les ont demandez ny empruntez que des princes: & sans leur congé, ou approbation n'ont eu iamais en la pensee le dessein de les entreprendre. L'histoire sainte nous au-

*l. Nemo c.
de sum.
Trinit.*

ra bien tost esclarcis & resolu de ceste
 auctorité des Rois, & de ceste humble
 modestie de l'Eglise. Car Constantin
 conuoqua le Concile d'Arles, Euse- *Euseb. 3.*
 be, Ruffin, Socrate, Theodorit, Sofo- *de vit. Cō-*
 mene luy donnent l'honneur de ce- *stant. c. 6.*
 luy de Nice: & Epiphanius adioust *Ruffin. 1. c.*
 que l'Euesque d'Alexandrie l'obtint *6.*
 de luy par prieres. De sa faueur & de- *Socrat. 1. c.*
 uotion sortit apres le Synode de Thir, *5.*
 comme celuy de Ierusalem destiné à *Theodorit.*
 la consecration d'un fort magnifique *1. c. 7.*
 temple. En quoy il monstra vn pou- *Sofomen.*
 uoir si absolu qu'il commanda souuēt *lib. 1. c. 16.*
 aux Euesques de venir à ses Conciles, *Euseb. de*
 sur peine de bannissement. Mais ses *vit. Const.*
 enfans laisserent-ils rien perdre, ne *4. c. 41. Et*
 flestrir de ceste Royale grandeur si *42.*
 esclairante? Le Pape Liberius aduoüa
 honorablement ce pouuoir à l'Em-
 pereur Constantius, comme on voit
 dans sa cōference fidelement rappor-
 tee par Theodoret, & le supplia de l'e- *Theod.*
 xercer pour la restitution & restablis- *2. c. 16.*
 sement de S. Athanase. De luy & de
 son frere Constans vint le Concile de

PHILIPPIQUE III.

Socrat. 2. c. 6. Sardique, ainsi que saint Athanasie le
Theodorit. 2. c. 18. tefmoigne en ses Apologies. Theo-
Sofom. 3. c. 18. dorit & Solomene dōnent mesme as-
Socrat. 2. c. 24. seurāce des Synodes d'Ariminy & de
Sofom. 3. c. 5. Seleucie: & Constantius promeust &
Theodorit. 2. c. 15. assembla seul le Concile de Sirmium,
Sofom. 3. cap. 5. cōtre l'Euesque Photinus, comme les
 Synodes d'Antioche, de Milan, & de
 Cefaree. Toutes ces preuues de la
 puisāte & religieuse majesté de l'Em-
 pire donnerent occasion aux Orien-
 taux fort cōbatus, & outrageusement
 affligez par tant d'iniures & d'orages
 de la faction Eusebienne, de se retirer
 & ietter dans les bras de Constans,
 comme en vn salutaire abry, & de luy
 demander le fauorable secours d'vn
 Concile pour repousser leurs violen-
 ces: comme Athanasie l'escriuit aux
 solitaires. Les Eusebiés s'adresserent
 à Constantius pour obtenir le Conci-
 le d'Antioche: & tous ces deux freres
 ensemble, comme maistres du mon-
 de d'vne commune main ouurirent
 les estats de l'Eglise en Esclauonie.
 Sur tant de marques & de luisans ve-

ftiges de ceste dignité Imperiale les
 Euesques de Thrace n'impetrerent le *Sofom. 6.*
 Concile de Lampfasc que de Valenti- *c. 7.*
 nian: & les Macedoniens n'en impor- *Socrat. 4.*
 tunerent que Valens. Nous voicy *c. 4.*
 tantost arriuez à la foy du Synode ge-
 neral de Constantinople, dont ie ne
 pense point que personne ose debat-
 tre ou quereller l'honneur au grand
 Theodose: Les peres en feroiét rougir
 de honte les plus hardis & plus con-
 tentieux. Car leur religieuse & chre-
 stienne fidelité tesmoignera eternal-
 lement par l'epistre conciliaire que *To. I. Con-*
 Damasus sur l'auctorité des lettres & *cil.*
 mandemens de ce Prince, les auoit
 inuitez & semonds à l'assemblee. Ce
 fut cest Empereur mesme, qui durant
 le pontificat de Damasus, attira en-
 cores de toute l'estendue de la Mo-
 narchie Romaine vn si grand & si fre-
 quent nombre d'Euesques au Cõcile *Theodorit.*
 de Rome, surnommé le grand. Et son *s. c. 8.*
 fils Archadius s'estant mis à la teste le
 deffcin d'vn Concile contre S. Chry-
 sostome, sur les pas de ceste grandeur

P H I L I P P I Q U E I I I.

Socras. 6.
c. 14. paternelle, apres en auoir ordonné & disposé seul la conuocation, en laissa le maniement, & la charge à Theophile. Quant au premier d'Ephese, ie m'en rapporte & m'en fie aux veritables tesmoignages des Papes mesmes. Leon I. recognoist franchement par ses lettres, que l'Eglise ne tient ce bien que de la faueur & pieté de Theodose le ieunè: & avec vne infinité d'hum-
Leo. 1. epi.
54. & 59. bles & honnestes paroles rend à Martin l'honneur entier du concile de Chalcedone. Ce sont preuues qualifiees & riches que les plus grands calomniateurs de tous noz ennemis ne sçauroient desmentir, sans s'engager en mesme iniure. Restét encores deux conciles generaux iusques à la diuision de l'Empire, par l'acquisition valeureuse de l'eternelle maison de France. L'un desquels fut assemblé par Iustinian I. avec tant d'assurance confirmee de tât de tiltres, & d'une si longue possession, qu'en ses lettres patentes & formes sacrees expedies sur la conuocation des peres, il donne con-

Euag. 4. c.
37.
To. 2.
Conc.

fidément aux Empereurs ses ancestres
la gloire solide de tous les autres pre-
cedens Synodes. L'autre ne peut non
plus entrer en cōtrouerse ny dispute,
pour estre trop apparemment voué à
la diligence & sagesse de Cōstantin le
Barbu par l'Epistre Synodale mesme,
soustenue & fortifiée du tesmoigna-
ge de Beda, & autres graues peres.
Aussi en la 18. action de ce concile
les Euesques presentent leurs confes-
sions à ce Prince pour les cōfirmer &
approuuer : marque eternelle, & bien
esclairâte de ce grand pouuoir Royal,
qu'elle desueloppe & desgage des
nuages de routes difficultez, & que-
relles. Il est vray qu'on fit à deux fois
de ce concile, d'où luy vint ce nom
de Synode cinq sixiesme. Car la pre-
miere compagnie n'ayant point mis
au iour ses decrets, Iustinian au nez
coppé esmeu & poussé d'une deuo-
tion naturelle, & hereditaire, manda
de nouveau les mesmes peres, & leur
fit dresser l'ordre des saintes con-
stitutions, que sapieté & prudence

*To. 2. Con-
cil.*

*Beda de-
rat. temp.
Balsamo.*

Balsamo.

PHILIPPIQUE III.

nous font voir aujourd'huy souz le nom du sixiesme Concile œcumenique. Il y a bien eu d'autres conciles assez grâds, assez nombreux, & remplis d'Euesques, qui n'ont pas sceu pourtant gaigner le tiltre & l'honneur d'uniuersels, bien qu'ils eussent esté desleignez pour estre de ceste condition, & de cerang: parce que les issues & resolutions n'en ont pas esté telles, qu'elles ayent merité la gloire de seruir de loy & de reigle generale pour obliger tout l'Eglise. Mais ceux là mesmes sont encore descédus des Empereurs. Car les deux Synodes de Constantinople contre Eutichez, & le second concile d'Ephese nasquirent des ordonnances de Theodose le ieune, & Valentinian troisieme comme on voit par les lettres de Leon I. par la lettre du cōcile de Chalcedone, & par les commissions adressees à Dioscorus, & au Comte Elpidius, pour en auoir l'interdendance. L'Empereur Anastase, & Theodoric Roy des Gots, se ioignirēt & se donnerent autresfois la main pour

*Euagr. l. c.
8. & 10.*

*Leo. l. epist.
12. 13. 19.
15.*

To. l. Concil.

Paul. Diacon. in Anast.

pour en bastir vn general en heraclee en intention d'appoincter, resoudre & assoupir pour iamais tous les differens de la religion, auquel subiect le Pape Hormisde y enuoya pour Legat Vitalianus: mais le soin & la peine de ces princes ne réussit guiere heureusement. Depuis Constantin Copronime, & son pere en conuoquerent d'autres qui furent reiettez par l'Eglise, plus par la faute & incertitude des confessions & decrets, que pour la contention de l'ordre & ouverture qu'elle eust aisement supporté des auspices de ces princes. Qui ne croiroit que les conciles prouvinciaux doiuent au moins nuement & purement appartenir aux Metropolitains, aux Archeuesques, & aux Papes, à qui il est enioinct par toute la sainte police, d'en vser deux fois l'an, tant pour l'entretienement de la foy & discipline, que pour estoupper, estancher & combler les petites sources des corruptions naissantes, lors qu'elles ne commencent encore qu'à cou-

PHILIPPIQUE III.

ler, pour aller au deuant des heresies
 qui ne font encores que pointeller,
 pour les estouffer & escacher dans
 l'œuf du corbeau, auant qu'elles
 soient formees ny escloses, & pour
 tenir tousiours l'Eglise belle, nette,
 & luisante par ceste frequente purga-
 tion? Et toutesfois les Roys se sont
 encores bien auant meslez de ces par-
 ticulieres assemblees, tant pour en
 prescrire & façonner l'ordre, que pour
 en promouoir la conuocation. Tes-
 moin le concile d'Agde, où d'entree
 les peres font priere pour le prince,
 conuocateur du concile. Leon I. pre-
 tendoit bien d'auoir ce droict en sa
 prouince, & eust desiré de le desployer
 en beaucoup de bonnes occasions,
 mais les Empereurs l'en rebuterent
 quelquesfois si loin, qu'ils luy en firēt
 perdre l'enuie & le courage. C'est dōc
 encores les princes qui ont prins le
 soin & la direction de ces moindres &
 moins fameux Synodes. Car Anasta-
 se en assemblea deux en Ierusalem &
 en Sidon, Iustinian en commanda vn

Neuill.
 123.

To. I. Ccc.

Euagr.

à Motuestie contre l'Euesque de la
prouince; & de six conciles qu'on vit
à Rome au pontificat de Symachus,
nos aduersaires mesmes recognois-
sent que Theodoric Roy des Gots en To. 1. C. 6.
conuoqua la meilleure partie. Il eust
esté malaisé d'esteindre ny obscurcir
la lumiere de ceste verité si brillante,
puis qu'à l'ouuerture du premier de
ces conciles, Symachus remercie
Theodoric du bon heur & de la gra-
ce de ceste assemblée oütroyée à son
innocence: & que ce prince Got assez
religieux, ordonna tant d'autres con-
ciles, soit à Rome au temps d'Hormis-
de contre les Eutichiens, qu'en Espa- Platin. in
Hormisda.
Nicepher.
tom. 2. C. 6.
gne & autres prouinces de son estat,
qu'il n'est pas facile de luy desrober
ceste gloire. Car ayant occupé l'Italie
& s'estant rendu maistre de la plus
part de l'Espagne, il vsa plainement
en l'Eglise de toutes les authoritez &
anciènes prerogatiues Imperiales, re-
leua haut la discipline, renouuella &
embrassà estroitement tout l'ordre de
la police Chrestienne. De laquelle

PHILIPPIQUE III.

pieté & diligence les Papes mesmes ont esté contrainsts de le louer les premiers, ores qu'il fust desesperement perdu d'Arrianisme. Voicy maintenant l'Empire Occidental arraché de la main des Grecs, sous la sage conduite de Charlemagne, & les victorieuses & redoutées armes des François. Ce Roy de France n'a pas plustost la couronne Romaine sur la teste, qu'à la façon des premiers Empereurs il dispose & ordonne de toutes les affaires de l'Eglise, & particulierement des Conciles. Vertu sainte qu'il auoit apprise en l'eschole des Roys de France, qui en ceste Religion, comme en vateur auoient glorieusement deuanté & surmonté l'Empire. Il fait donc tenir vn concile à Rome au temps d'Adrian I. où les peres luy censurerent l'investiture absolue des Euesques, & l'entiere promotion des Papes mesmes. Il desseigne & bastist comme vne forme de conciles generaux, en dispose & en dresse les saintes ordonances, les met

Sigebert.

cap. Adriā.

§3. dist.

en veuë souz l'augure de son nom, & ^{To. 3. Cœ.}
appelle hardiment ces constitutions
sacrees les souuerains decrets de ses
conciles. Son fils de bonnaire marque
de ceste pieté deux ou trois endroits
d'Italie: l'Empereur Lothaire com-
mande vn celebre concile à Rome au ^{To. 3. Cœ.}
temps de Leon 4. & Loys 2. en fait ^{Platin.}
publier vn magnifique à Paue à la fa-
ce de Nicolas 1. qui a icy tant porté
d'enuie aux princes, qu'il les a voulu
exclure & escarter pour iamais de
l'honneur de ces iournees eternelles.
Mais Arnolphe tint si peu de conte
de ceste vaine faillie, & se troubla si
peu de l'horreur de toutes ses impre-
cations, qu'il fit indire vn grand con-
cile, mit son nō à la teste de ses saincts
decrets, & nomma ceste resolution de
foy & de police les inuiolables arreſts
de son Synode. Tous ces irreprocha- ^{To. 3. Cœ.}
bles resmoignages de la puissance sa-
cree des Princes en l'ordre & disposi-
tion des Saincts cōciles deueroiēt fer-
mer la bouche aux mercenaires escri-
uains d'Espagne, & faire perdre ceste

PHILIPPIQUE III.

nouvelle pretétion de la cōuocation
des Synodes generaux à ceux qui en
voudroiét mal vser à nostre domma-
ge. Que s'il reste encores quelque
scrupule à des hommes incertains &
flotans, voicy de fortes & pregnantes
preuues de ceste auctōrité eternelle,
& des celebres preiugez qui les leur
pourront arracher : & raffermir leurs
esprits vagues sur ces bases de verité.
Voicy des puissans tesmoignages qui
se feront plus hautemēt ouyr en ceste
forte contention aux aureilles bou-
chees de ces sourds volōtaires qui ap-
portēt des opiniōs preiugees en tous
les discours des affaires des Roys, qui
doutent sciemment de toutes leurs
sainctes preeminences, qui disputent
icy si le feu est chauld, s'ils n'en res-
sentent la brulure. Car ie desire qu'on
me responde quel autre que Valenti-
nien 3. assembla ce concile, où Sixte
3. se iustifia des crimes que Bassus
luy auoit imposez. Quel autre que
Charlemagne & ses enfans ordonna
les conciles où Leon 3. Paschal 1. &

Sigebert.

*Aimoin.
Regin.*

Leon 4. furent cōtraints de se purger
des accusatiōs qu'on leur mettoit sus?
Qui assembla ces iustes comices de
l'Eglise à Rome pour la destitution
de Iean 12. que l'Empereur Otton 1.
qui y presida, qui composa l'Epistre
Synodale, qui en publia les decrets
souz les marques del'Empire, qui les
espan dit & fit porter par tout le mon-
de sur les fortes aisles des Aigles Ro-
maines? Qui promeust à Rome ce con-
cile où Leon 8. & les peres remirent
& renfermerent de nouveau en la
main de ce prince les institutions des
Euesques & des Papes? Qui com-
manda vn Synode pour restablir Iean
13. qu'Otton 2? Pourroit on dire sans
quelque tache de rougeur, sans quel-
que legere atteinte de pudeur que les
trois Euesques de ce souuerain ordre
de l'Eglise deposez au concile Sutrin
souz la sage vigilance d'Henry 3. eus-
sent esté les auteurs de ceste vigou-
reuse sentence, consacree à l'eternité
par vne iustice si signalee? Mais en-
cores quel autre que Loys de Bauc

*Luitpräd.
Blond.*

*Blond.
Grantz.*

PHILIPPIQUE III.

re eust le pouuoir & le courage de
 conuoquer ce concile, où Iean 22. fut
 traitté cōme chacun sçait. De quelle
 auctorité furent assemblez les conci-
 les de Pise & de Constance, où qua-
 tre autres Euesques de ceste plus hau-
 te marque sentirent la censure de l'E-
 glise? Croit-on que ce fut vn effect de
 leur volonté, ou vn dessein de leur
 mouuement? ce repos de l'Eglise fort
 esmeue & estonnee ne sortit-il point
 de la Religion du Roy de France, de
 la deuotion de l'Empereur Sigismōd,
 & de la commune affection des prin-
 ces des autres Royaumes? C'est l'ori-
 gine comme la cause du concile de
 Basle, conceu contre Eugene 4. &
 personne ne reuoquera iamais en
 doute que Henry 3. 4. 5. Conrad, Ot-
 ton 4. Federic 1. & 2. n'ayent assem-
 blez & disposez tous les Synodes qui
 les ont vangez des iniures de Gregoi-
 re 7. Urbain 2. Paschal 2. Gelaiz 2.
 Calixte 2. Honorius 2. Alexandre 3.
 & autres. Que leur seule prudēce n'ait
 espuré & nettoyé la discipline, & pur-
 gé

Crantz.

*To. 3. Cōc.
 Naucler.
 Sabell.*

To. 4. Cōc.

*Auentin.
 Vſperg.
 Barns.
 Crantz.*

g  tout le corps de l'Eglise, par les salutaires m dicaments de la Religion, la d schargeant de toutes sortes d'humeurs corrompues & peccantes, re-tranchant toutes difformes superfluit z, & couppant iusqu'au vif les membres pourris ou enflamm s dont la violence pouffoit le feu dans l'Empire, & donnoit la gangr ne   l'Eglise. Nous au ns laiss  les princes d'Orient restrain s & reserrez dans ces restes de leur Empire, que les armes Fran oises leur laisserent franc de leurs c questes. Mais pour cela recogneut on que la perte de l'Italie, l'occupation & la prise de beaucoup de pays de leur obeissance leur eussent affoibly, ny tau l  le c  ur  s affaires de la religion? Se representans l'ancienne & premi re maiest  de leur estat, picquez d'un honneur de la longue succession de tant de braues Princes leurs ancestres, anim s par la seule legere marque & les foibles enseignes du vieil Empire Romain, encores que beaucoup effacees par tant d'ha-

PHILIPPE III.

leines iniurieufes du temps & de l'en-
 uie, ils voulurent tousiours afsembler
 les Conciles generaux : & en attirer
 la fceance & le merite dans les bornes
 de ce petit Empire, fort nauré & ra-
 courcy de tant de coups, & diuerfes
 playes de fortune. Sur ceste Royale
 vertu Constantin & Hirene fa mere
 mādèrent le fecond Synode de Nice
 feptiesme vniuerfel, cōme on void par
 la faincte foy des aētes mefmes. Et
 l'Empereur Bafile au pōtifcat de Ieā
 8. & Adrian 3. remplit, & compofa le
 huiētiesme Concile œcumenique du
 nombre de 383. Euefques. Là verita-
 blement les Legats Romains preſide-
 rent, & s'affirent au premier rang par
 lettres particulieres de l'Empereur,
 ceſt honneur eſtant hors de combat
 pour la viduité de l'Eglife de Conſtā-
 tinople, dont le ſiege eſtoit vuide
 de Paſteur, comme vacquant par la
 contention de Photius & Ignacius
 qui s'en diſoient tous deux Euefques.
 Mais les ſacrez monumens baſtis
 par ceste celebre compagnie teſmoi-

Blond.

Platin.

To. 3. con

To. 3. cō.

Platin.

fabell.

gneront eternellement que la conuocation n'en fut faicte que du seul mouuement de Basile : qui en confirmant & signant les Decrets, se vante religieusement d'imiter la pieté & deuotion de Constantin, Theodose, Martian & autres princes auteurs de tous les precedents Conciles. Les autres Synodes de cest eschantillon deschiré de la Monarchie Grecque, sont ainsi coulez & descendus du sein des Empereurs d'Orient. Nicephore fit casser en la sainte assemblée d'un Concile tenu à Constantinople, l'excommunication dont le Patriarche Polieuctus auoit osé blesser la dignité de son estat : & Michel Paleologue fit reprimer & abolir en vn autre Synode les hardies césures d'Arcenius. Puis que nous sommes si auant, & que l'un propos nous engage dans l'autre, le labour ne sera point peut estre ingrat de courir legerement de l'œil l'estat des autres royaumes, pour voir comment tous les Princes se sont icy portez apres que l'Empire a esté

*Zonar.
Niceph.
Gregor.*

PHILIPPE III.

couppé & destranché en tant de pié-
ces. Car c'est de ceste ruine si grande
que le siege Romain mesmes s'est mer-
ueilleusement accru. Comme toute
l'eau qui découle d'une fiole rompuë
garde iusques aux plus petites & plus
menues gouttelettes sa premiere for-
me elementaire, qui les produit & les
verse toutes rondes, circulaires & de
mesme mouuement. Comme en vn
miroir cassé, chaque piece & petit
esclat de cristal racourcit & reserre
en soy les mesmes espèces, images, &
impressions que tout le corps entier
de la glace conceuoit & admetoit au-
parauant plus estandues, & plus diffu-
ses. Ainsi en ce bris & desmembremēt
de l'Empire, toutes les Prouinces re-
trâchées ou arrachées de la riche cō-
position de ce grand corps, retindrēt
leur premiere rature, & conseruerent
l'ordre & les premieres formes de la
prudence Romaine es choses de l'E-
glise, sans changer de proportion, de
couleur ny de visage. Et les Princes
qui succederent par le droict de leurs

espees à l'Estat, & gouuernement du monde, plus ou moins à l'egal de leur valeur ou de leur bonne fortune, grauerent & imprimerent dans l'enceinte de leurs couronnes tous les traicts plus beaux & plus naturels de l'ancienne majesté imperialle, qu'ils firent reluire plus vifs & plus nets qu'e tout le reste es prerogatiues de l'Eglise: comme entre les affectiōs de l'ame la Religio se trouue tousiours la plus forte. La France par les naturelles obligations de ma naissance, par les droicts cternels de sa vertu & de son aiscesse, par le puissant & vigoureux honneur de tant de victoires qui luy ont autrefois heureusement acquis le commandement & moderation absoluë de la pluspart des pays de l'Europe, à qui sa valeur a donné des triomphâtes & glorieuses loix, & par l'interest present de ceste cause m'oblige à commencer par elle. Là il faut que l'enuie recognoisse que le pouuoir d'assembler les conciles a esté aduoué par les peres du siege Romain si legitime

PHILIPPE III.

& si necessaire en la main de noz Roys, que saint Gregoire en deux ou trois epistres les supplie de continuer constamment la façon de ceste belle police, & de ne se laisser point en l'exercice de ceste religieuse vertu seule propre pour conseruer la netteté de leurs Eglises, les entretenir, & faire durer en leur belle splendeur & pureté ancienne. Ils n'auoient pas grand besoin d'estre reschauffez, ou retenus en ce pieux deuoir par les prieres & admonestemens de ce pere. Car il n'y a Rois en la chrestienté qui ayent tant fait voir de conciles, mieux ordonnez, ny plus remplis de sainte erudition, & de iuste police. Clouis ouurant deuoitemēt les barrieres de ceste vigoureuse course de religion, conuoqua le premier concile d'Orleans, & Childébert le 2. 3. 4. & 5. Theodebert assemble le concile d'Auuergne, Aribert le second de Tours & le premier de Paris, Gontran le second & troisieme de Mascon, & le concile de Lyon où fut agitee la cause de Salonius, &

Tom. 2.

Conci.

Gregor.

Tuyonen,

Sigebert.

Toc 2.

Con.

Gregor.

Tuyonen.

Sagitaire: puis ordōna les Synodes de
 Chaalons sur Saone & de Poictiers.
 Chilperic fit tenir vn cōcile à Breme
 cōtre Gregoire de Tours, & disposa le *Idem*
 cōcile qui iugea le proces de Pretex- *s.c. 49.*
 tatus. Enquoy Gontran & Chilperic
 se monstrerent si exactes & si vifs, &
 prindrent en si mauuaise part la negli-
 gence & nōchaloir des Euesques qui
 osoient manquer aux sainctes assem-
 blees proclamees de leur auctorité, *Turō. lib*
 qu'apres les y auoir semonds par des *8.c. 7.*
 graues lettres, ils leur faisoient bailler
 caution & pleiges d'y venir. Les au-
 tres Roys heritiers de la couronne de
 France firent constamment rouler le
 cours de ceste discipline, entretenue
 d'une mesme feuerité, & egale prudē-
 ce. Car Childebert assemblea le con-
 cile de Mets contre Ægide Arche- *Turonēs.*
 uesque de Rheims, Clotaire promet
 celui de Mascon, & le premier concil- *Vincent.*
 le surnommé de France. Clouis 2. mit
 dans le Synode de Chaalons iusqu'à *Turonen.*
 44. Euesques, & Theodoric de l'aduis
 d'Ebroin Maire de son palais fit faire

PHILIPPE III.

le proces à plusieurs euesques en vne
 grande couronne de noz eglises, cō-
Sigebert. posee des plus saincts Prelats du roy-
 aume. en ceste oppression des der-
 niers Roys de la premiere race soubz
 la tyrannie des maires du palais, Car-
To.3. loman fils de Martel cōmanda vn Sy-
Conc. node en Frāce en tiltre de Prince des
 Frāçois, & Pepin son autre fils se ioi-
 gnit au Roy Childeric pour disposer
 le concile de Soissons. La seconde fa-
 mille de noz Roys ne se refroidit, ny
 relacha iamais en ceste deuotion, na-
 turelle & essentielle en l'ordre de cest
 estat. Pepin dressa vn grand & cele-
 bre concile instruit & orné d'un bon
 nombre d'euesques d'Oriēt & d'Oc-
 cident, appelez pour resoudre d'un
Aimoin. commun esprit vne question impor-
lib. 4. tante & chatouilleuse, esmeuë sur les
 difficiles mysteres de la Trinite : &
To.3. fit tenir trois conciles en son palais,
Conc. à Freius, & à Thionuille. Charlemai-
Aimoin. gne commanda le grand concile de
Regin. France, ceux de Gentilly, de Dreux,
Sigebert. d'Arles, de Tours, de Chaalons sur
AEmil. Saone

Saone, & enioignit à tous les Arche-
 uesques d'vser diligemment en leurs ^{In capitula}
 prouinces de ces salutaires remedes ^{larib.}
 de nostre religion, aux temps portez ^{Aimoin.}
 & deffinis par les decrets & loix de ^{4. c. 99.}
 l'Eglise. Louys Debonnaire conuo-
 qua trois Synodes à Aix, à Paris, & ^{To. 3. Ccc.}
 à Mets : Charles le Chauue en or-
 donna à Rheims, à Meaux, à Soissons, ^{ibidem.}
 & à Pistes sur Seine, desleigna comme
 vne forme & façon de concile gene-
 ral à Pontigeon : & Charles le sim- ^{Æmilien.}
 ple ouurit de sa main deuotieuse vn
 Synode en la ville de Rheims. Quoy
 ceste saincte troisieme race de nos
 Roys que Dieu vueille fortement
 conseruer de la vertu de son bras in-
 uincible, & la mettre à couuert & en
 seurte souz l'ombre salutaire de ses
 aisles, pour la faire heureusement prof-
 peter, & regner eternellement victo-
 rieuse, & triomphante de tant d'ambi-
 tieux desseins & d'iniustes armes de
 ces factieux ennemis : a elle icy man-
 qué de ce courage paternel, & deffail-
 ly en ce commun deuoir de tous les

PHILIPPIQUE III.

princes? Certes cōme plus sainte, plus grande, plus vertueuse, & deuotieuse que les autres premieres, comme plus adonnee à establir toutes sortes de loix & de bonnes mœurs, elle n'a pas laissé de moindres monumens & enseignes de sa pieté & religion. Le Roy Huë Cappel print par ceste sainte lustration & repurgation de l'Eglise les heureux auspices de son regne, & d'entree commanda vn concile à Reims contre Arnoult Archeuesque de la ville, qu'il renouuella & remanda apres à Senlis. Louys le ieune assembla deux Synodes à Beauuais, & à Baugency : Et telle a esté tousiours l'ame & le cœur de nos Roys. Toutesfois le train de ceste pieuse sollicitude fut fort trauersé & interrompu par l'arriuee des Papes en France. Qui cōme du sac de Rome, & du feu de tant de frequētes guerres allumees de leurs contétions, se sauuans dans le sein de ce Royaume leur ordinaire & coustumiere retraicte, esbranlerent diuersemēt l'ordre de nos loix Eccle-

*Au corps
des conciles
imprimez
à Cologne,
l'an 1555.*

Æmilius.

fiastiques & ciuiles. Parce que noz princes honnestes, courtois & religieux leur permirent franchement & sans crainte le maniement, & administration des choses sacrees; ne se desfiens pas qu'ils deussent tourner ceste faueur hospitalale en consequence & aduantage. Urbain 2. donna ceste ouerture, & disposa des conciles de Tours & de Clermont. Calixte 2. in-^{Vsserg.} ^{Nauclet.} dict des conciles à Rheims & à Tholoze, Innocét 2. à Clermont & à Estâpes, Eugene 3. à Rheims & à Paris, contre Gilbert Euesque de Poictiers; & Alexandre 3. entreprint vn Synode à Clermont. De là sur les aisles de nostre auctorité, portez de la vertu de l'Eglise Gallicane, ils ont volé iusques à l'honneur des conciles generaux. Mais quand ils ont eu esloigné la France, ou qu'oubliant & mescognoissant la source de cesté nouvelle puissance, il leur est arriué d'entamer ou effleurer tant soit peu la majesté du Royaume: nos princes reuoquant la dignité & la force de

PHILIPPIQUE III.

*Chronique
de France.
D^{no} Tillet.
Naucler.*

ceste belle & vigoureuse discipline es-
chappee à leur negligence, l'ont fer-
mement bandee contre ces entrepri-
ses, & embrassé comme auparavant
la plaine indiction des conciles, qu'ils
ont aussi heureusement que gene-
reusement desployez contre les cen-
sures Romaines. Philippes Auguste,
Philippes le Bel, Charles 6. & Loys
12. donnerent d'eternelles preques
de leur grandeur & de la majesté de
leurs estats en toutes les occurrences
de ces dangereuses affaires, comman-
dant & consacrant en la iustice de ces
iniures beaucoup de conciles à Pa-
ris, à Baugency, à Tours & à Lyon.
Philippes le Bel fit naistre le concile
general de Vienne, & Charles 6. re-
mit le cœur au ventre à tous les Roys
pour releuer de l'espaule d'un concile
general l'Eglise panchante & presque
renuersee : pour destituer Benoist 13.
qui l'auoit blessé d'un traict d'excom-
munication, & pour proceder sain-
ctement à la creation d'un autre pa-
steur digne du siege Romain, & plus

amy de la Frâce. Je sembleroy porter
 enuie aux princes d'Allemagne, si ie
 supprimois ou obscurcissois les illu-
 stres tesmoignages qu'ils ont icy ren-
 dus de leur pieté & de leur foy ; qu'à
 dessein i'ay obmis au rang des conci-
 les publicz en Italie de l'auctorité de
 l'Empire, pour les retrouver & repré-
 dre apres plus commodement en Al-
 lemagne. Pour ne passer donc point
 sans saluer ceste braue nation nostre
 ancienne aliee, & ne l'offenser point de
 siléce, ie luy feray ressouuenir quenos
 Roys de la valeur desquels elle tiét le
 diadème & la gloire de l'Empire luy
 ont aussi laissé leurs religieux exéples,
 & les Chrestiennes traces de leur vertu
 en l'ordre & assemblée des Eglises. Car
 Charlemaigne ordonna la tenue de *To. 3. Cœ.*
 deux ou trois conciles à Majence, &
 à Eerford, & indiét vn ample & ma-
 gnifique Synode à Aix la chappelle,
 où il mit 365. Euesques ensemble, que *To. 3. Cœ.*
 le Pape Leon 3. honora & resiouist de *Erphor-*
 sa presence. De là ce prince comman- *diens.*
 da vn celebre Concile à Francfort,

PHILIPPIQUE III.

*To. 3. Cœ.
Regin.
Sigebert.
Æmil.*

pour la correction des blasphemes de cest impie Felix, de qui la langue impure oloit appeller Iesus Christ fils adoptif de Dieu, corrompant & meslant l'ordre incomprehensible de ceste generation diuine. A son imitation Loys Debonaire fit celebrer ces chrestiens

*Sigebert.
To. 3. Cœ.
Sigebert.
Monst.
Regin.
Sigebert.*

Comices à Aix, Lothaire à Majence sous la conduite de Rabanus, Loys 2. à Vvormes, Arnulphe à Majence, & à Tribur, Otton 1. à Hingelin & à Ausbourg, Henry 2. à Francfort, à

*To. 3. Cœ.
Auent.
Vsparg.
To. 3. Cœ.*

Salcgaſt, & à Aix la chapelle. A la suite desquels Henry 3. recueillit à Majence 130. Euesques pour la monstre glorieuse d'un saint concile où le Pape Leon 9. presida. Depuis comme la necessite des affaires se vint à ioindre & rallier avec les pieux desirs des princes, Henry 3. & Henry 4. vnissant & accouplant la force de leurs Eglises pour l'opposer à la violence de quelques Romains, conuoquerent d'une necessaire sagesse un grand nombre de conciles à Vvormes, à Majence & à Eerford, Henry 5. en assembla à Majence

*Auent.
Crantz.
Vsparg.*

& à Vvormes: Federic 1. à Virsbourg,
 & en deux ou trois autres lieux d'Al-
 lemaigne: puis deſſeigna vn nôbreux
 & ſeuere Synode contre Alexandre 3.
 où il declara par lettres patentes gra-
 uées à la teſte du concile, que la con-
 uocation de ces ſainôtes aſſéblees eſt
 de droit puremēt Royal. Federic 2.
 ſ'affermiſſant ſur ces pas genereux de
 la vertu de ſes peres à la rencontre de
 pareilles ſecouſſes de fortune, ne ſe ré-
 dit ny lent ny pareſſeux en l'applica-
 tion de ces remedes ſalutaires. Il fit
 aſſembler vn concile à Reginburg
 ſoubz la conduite & direction d'E-
 berard Archeueſque de Saltzbourg,
 où on chaſſa rudement vn Legat Ro-
 main: & l'Empereur Rodolphe traita
 de ceſte iuſtice les Legats d'Hono-
 rius 4. au concile de Vicebourg. Ain-
 ſi les beaux Synodes ouuerts à Co-
 logne ſoubz l'inspection & la pruden-
 ce de Conrad, Sigisfridus, Virbol-
 dus, & autres Archeueſques de meſ-
 me ville, qui à la façon des peres de
 Toledé donnent à leurs aſſemblees

*Auentis.
Vſſerg.*

*Auentis. 7.
Annal.*

PHILIPPIQUE III.

le nom fameux de conciles generaux; ne monstrent aucune apparence d'a-
 uoir esté indits par les Papes : la gloi-
 re en est toute entiere à la nation Al-
 lemande. Que dirons nous des autres
 prouinces? voicy l'Angleterre qui cō-
 mence à estendre & desployer les en-
 seignes Royales, depeintes & luisan-
 tes de son ancienne pieté: où on void
 figurez & pourtraits d'un eternal pin-
 ceau vn grand nombre de conciles,
 tous conceuz & enfantez de la foy &
 deuotion des Roys. Les conciles te-
 nus par Eildebert selon le tesmoigna-
 ge de Beda, le Synode de Herfort
 de l'an 673. les sainctes assemblees
 d'Osuius & Egfredus entremeslees
 des Euesques d'Angleterre & d'Es-
 cosse, comme celle d'Oxone sont tou-
 tes semees & couuertes des preroga-
 tiues des princes d'Angleterre. Enco-
 res que les Legats du Pape Agathon
 paroissent honorablemēt assis au con-
 cile d'Heldosenden, on peut iuger
 par beaucoup de marques que ceste
 compagnie ne fut iamais cōmandee
 que

Beda.

*Tom. 2.
Conc.*

Beda.

que par le Roy, & Theodore Arche-
 ueſque d'Angleterre eſleué en la plus
 haute & plus eminente place, ſem-
 ble retenir conſtamment l'honneur
 & les droicts de ſa preſidence natu-
 relle. On voit ainſi reluire es Con-
 ciles eſtallez par Offa la puisſante
 auctorité des Roys, toute eſclatante
 de la gloire de la conuocation: & les *Polidor.*
 Conciles de Nortanton, de l'Incol- *Virgil.*
 ne, & de Londres tenus ſouuent en la *Matth.*
 preſence des Ambaſſadeurs Romains, *Paris.*
 teſmoignent par la ſeul veüe n'auoir
 iamais tiré naiſſance que de ce ſoin &
 ſolicitude Royal. De ce pouuoir ſi
 ancien & ſi confirme, vſa plainement
 Henry 2 es aſſemblees de Londres, & *Polidor.*
 de Caſelly en Irlande: & quand le *lib. 6.*
 Cardinal Otton Legat de Gregoire
 9. paſſa par l'Angleterre, il ne luy fut
 iamais poſſible quelque effort qu'il
 fit, quelques pratiques qu'il éployaſt
 pour attirer & gagner les cœurs des
 Eccleſiaſtiques, de diſpoſer de l'ordre
 d'un concile ſans congé & permiſſion
 du Roy. Le deſir de recognoiſtre ceſte

PHILIPPIQUE III.

Isle entiere, arrestera & retiendra encore vn peu nos yeux sur la p^clice de l'Escoffe. Ou nous trouuerons que les Euesques plains de leur ordinaire asseur^ace soustindrét autrefois en plain Concile à quelques Legats trop entrepreneurs, que les Eglises du Royau me ne pouuoient estre conuocquees

Boet. 13. que par lettres & mandemens du prince. On en vit sortir de claires preuues du Concile de Perthy, ou de sainct Iean, commandé par les Roys pour redresser la religion fort panchante, & la discipline trop inclinee: Et le Roy Alexandre 3. ne fit dissiper & esuanouïr que par ce remede salutaire tant de diuerses tempestes esmeuës sur son Estat. Qu'est il besoin de s'escarter plus auant pour se resoudre d'vne verité si commune, si constante, & si cōfessée? Les Roys de Pologne souz l'œil & l'entremise des Pasteurs de gracouie & Gnesné, les deux Archeuesques du Royaume, ont employé & exercé sainctement ceste sacree auctorité, esproueue sans con-

Cromcr.

lib. 3.

tétion ny resistance en lexcommu-
 nication de Conrad Duc de Mos-
 couë. Et les Roys de Dannemarc & *Naueler.*
 de Boëme, sans laisser tant soit peu
 couler de leurs mains la vertu de ce
 pouuoir, l'ont autrefois opposé for-
 tement aux Papes, & se sont comme
 liguez & vnis pour la tenue d'un con-
 cile general. Ceste eternelle & vni-
 forme verité que nous recherchons
 tant, comme elle à de coustume de
 se venir heureusement esclorre & se
 faire iour dans les plus espais & plus
 couuers nuages des disimulatiōs, &
 s'arracher d'effort & de brauade de la
 bouche mesme de ses plus fermes é-
 nemis; elle tire icy de lui sāt̃s tēmoi-
 gnages de ceste Espagne trompeuse
 de qui les ruses les inuentiōs & mali-
 cieux artifices nous troublēt sidiuer-
 sement, & tiennent en deffiāce tout
 le monde. Il faut dōc pour ne violer
 la maiesté Royale, ou ne la baisser &
 raualler point indignement, que ces
 circoncis bazanez recognoissēt que
 les Roys des Gots leur barbare origi-

PHILIPPE III.

ne, ont tousiours assemblé les Cōciles sans que les peres Romains s'en soiēt meslez ny pres ny loin. Car les actes Synodaux se raportās & accordans fidelement à l'integrité de l'histoire monstrent euidāment que les conciles d'Ilerda, ou Lerida, de Valence, de Geronde, de Tarascon, & Sarragousse furent commandez par Theodoric heretique Arriē des Rois de ceste natiō vint le premier cōcile de Toledē? Amalaric cōuoqua le scōd & Recarede le troisieme? ou lui & tous les Gots abiurerent solēnellement l'Arrianisme. Le Roy Sisenant ordōna le quatriesme Synode de Toledē, Chintilianus fit tenir le 5. & 6. Chindasuinus le 7. Ricessuintus le 8. 9. & 10. Bamba ou Vmbanus le 11. & Eringius le 12. où Bamba luy fit presant de son sceptre & se despouilla du pourpre & dignité du Royaume pour l'en parer superbemēt Le 13. concile de Tolode sortit encores d'Eringius: & vit on trois autres cōciles remarquables en la mesme ville tous

Isidor.

Tom. 2.

Concil.

Ioann.

magn. en

histor.

Gotor.

Isidor.

Tom. 2.

Concil.

promuez du seul mouuement & ordonnance d'Egita. Pour les autres assemblees Ecclesiastiques, l'Espagne doit les deux premieres de Braga à Gode-^{Ioann. magn.} marus, la 3. à Bamba, & celle de Se-^{Tom. 2.} bilie à Sisebut: qui de la vint estaler ^{Concil.} vn grand concile, pour estaindre l'heresie des Accephales & arracher vne infinité d'autres erreurs dont ceste ^{Ioann. magn.} prouince estoit toute semee: cōme elle à tousiours foisonné de ces ronces & herbes sauuages, fruits ingrats d'vne si mauuaise terre. Ricesuintus selon les diuerfes occurences qui se presenterent assembla encores trois Sinodes: & lors que Charlemagne eust valeureusement conquis les Espagnes, desirāt les nettoyer & purger du tout de l'infection d'idolatrie, & de la corruption de tant d'heresie qui y auoient si longuement croupy il y marqua la pureté de la Religion, par le bien fait du concile de Com-^{Vincent} postelle. Si de la nous voulōs dōner plus loin iusques en Affrique, nous verrons par les labeurs & les veilles

PHILIPPE III.

*Victor.
Vtic.
de Pers.
Vandil.
Sigbert.*

de Victor Euesque d'vtique, vn bon nombre de cōciles tous tirez du sein des Roys Vandales Ariens : ou toutesfois les Euesques catholiques se trouuerent tousiours ausi plains de Religion que d'obeissance. La nombreuse assemblee du concile de Carthage, publice de l'auctorité de Huneric en donne vne suffisante preuue. Mais nous nous laissons emporter bien auant à la douceur de ce vent & aux attraits de ceste bonace. Il est tãtost temps de destandre & retirer les voilles pour chercher quelque port assuré à ceste longue & facheuse nauigation entrecoupee des destrois & perilleux passages de tãt de diuerses cōtrees. Aussi il semble que nous auons tant mis au iour ceste questiō de l'indiction des conciles. & esclairé ces nouvelles difficultez de la lueur de tant de tesmoignage & d'exemples qu'il n'y reste plus rien d'obscure ny d'obscurité: ce seroit enuy & superfluité d'en rapporter d'auantage. Les moins confirmez attache-

ront à ce discours ce que nous en auons escrit ailleurs. Nous adiousterōs *Les Laitiers du* seulement, que nous ne voulons pas *Roy.* nier qu'il ne se trouue prou de Conciles prouinciaux tenus souz la sage autorité des Papes, & dont nous auons obligation à leurs prudēces, qui nous font iouir de beaucoup de belles & saintes resolutions, fort necessaires à l'ornement & conseruation de l'Eglise: Mais il faut aussi qu'on nous accorde que ces Conciles ont esté le plus souuent ordonnez par les Empereurs & les Roys; & que ceux qui representoient le siege Romain n'y ont pas tousiours gaigné la prescance, encore que l'assemblée fut commandee en leur prouince: comme chacun sçait trop du concile d'Aquilee. Lors mesmes qu'ils en ont mis & iettez les decrets en veuë, enuoyé & espandu les ordonnances par les autres prouinces, sur les anciennes formes & liaisons de la société des Eglises, ils ne se sont pas nommez seuls inscriptions de l'Épistre Synodale. Ils y ont en-

PHILIPPIQUE III.

ployé & graué les noms des autres Euesques, dont la saincteté & la doctrine pouuoit appuyer & soustenir comme d'un contremur la verité de leurs confessions. Tescmoin le concile Romain tenu par Damasus contre

Sosom. 6. Auxentius Euesque de milan ou ce *cap. 23.* Pape s'accompagne & fortifie dans

Theodorit sa lettre de lauctorité & creance de *5. cap. 9.* Valerianus & autres ses cōfreres. Tel

est lordre de beaucoup de Conciles que nous debuons au labour, & a la diligente religion des Papes, comme Syluestre I. Iule I. Symachus, sainct Gregoire, & semblables desquels les Synodes estoient remplis & composez pour la plus part des Euesques de leurs prouinces & en moyen nombre maniez d'une commune main, conclus souz mesmes loix de fraternité, dans les bornes du respect & moderation des Princes, constamment & inuiolablement conseruees iusques à l'Empire de phocas. Car apres ce temps, Boniface 3. enflé & emporté du vent des iugemens de ce Prince desseigna

Platin.

deffigna des conciles de son propre
mouuement, pour entrer en la pleine
possession du Primat; Theodore en
ordonna & disposa contre Pyrrhus,
& le Pape Martin I. fut si heureux de
receuoir en son Synode iusques au
nombre de 200. Euesques, ou de 110.
selon le tesmoignage de Paul Diacre.

*Paul Diac.
Platin.
Blond.*

A leur exemple Vitallianus fit vn
concile de cent Euesques; Agathon
en bastit vn celebre renommé de la
presence de 125. peres: & par là d'un
degré à l'autre leur autorité s'accroit
& s'esleua si haut que Leon 2. & Iean
5. tendirent les mains pour confirmer
les decrets du 6. concile general: en-
treprinse rompue & repoussée par les
princes de Constantinople. Ceste li-
berté s'estendit apres, & s'il le faut
ainsi dire, s'eslança peu à peu sur les
Eglises de toutes les prouinces. Où
les Papes chassés de Rome par l'es-
froy de tant d'armées ennemies qui
couuroient toute l'Italie de gens de
guerre recueillis honorablement à
l'enuy par les princes leurs alliez, plus

PHILIPPIQUE III.

grands en leur exil qu'en leurs maisons mesmes, se meslerent d'assembler les conciles; qu'Urbain 2. Paschal 2. Calixte 2. Innocent 2. & autres couuoquerent aussi hardiment & absolument en France, qu'Honorius 2. en Allemagne, Honorius 4. & Martin 4. en Angleterre. A quoy les pasteurs de toutes les Eglises ne pouuans ou ne voulans resister, vaincus volontaires ployerent mollement; demeurans estonnez à ceste inopinee rencontre comme des pauures Bérgers qui plantez sur la croupe d'une haute montaigne, regardent de loin les bras croisez les gros bouillons d'un fleuve desgorgé noyer & rauager la campagne, entraîner les pesants trōcs des plus puissants arbres la racine contremont, enleuer leur bestail, & emporter à val leurs logettes. Mais ces inondations si frequentes ne trouuerent-elles point de bord? Comme de plusieurs indiuidus & singuliers des Dialecticiens formēt des nations vniuerselles, nouēt & estreignent

des conclusions generales, quelques Romains apres auoir pied à pied gagné particulièrement ceste autorité en tous les Royaumes, faisans comme vn gros bouquet de toutes les diuerses fleurs cueillies & moissonnees en tant de beaux iardins, se presenterent d'vne assurance aussi estrange que nouuelle, pour cōmāder les Conciles generaux. Ces peres grands mesnagers, qui ont tousiours profité des ruines de l'Empire, qui ont basti la grandeur & seureté de leur Estat dās les troubles, & la cheute de la monarchie Romaine, pour l'accroistre & fortifier du declin des autres, pour la couronner d'vn chapiteau des pertes de beaucoup de Royaumes, voyans qu'il ne restoit plus de prince assez grand pour venir seul à bout de l'entreprise, & difficile ouurage de ces grandes iournees de l'Eglise : recognoissant bien qu'entre les Roys il y pourroit escheoir beaucoup de contention & d'enuie, penserent autresfois de releuer ce beau fleurō coupép

PHILIPPIQUE III.

& abbatu de l'ancienne couronne im-
 periale, & s'esmailler de ce riche pen-
 nage des superbes aigles Romains.
 Paschal 2. s'auentura le premier à ren-
 ter ce passage, mais il n'en sortit pas
 à son honneur : il sçauoit mieux faire
 la guerre qu'un concile. Toutesfois
 c'estoit assez d'ouuerture pour des es-
 prits aduantageux. Car voicy Alexan-
 dre 3. qui sur ces premieres traces &
 rudes lineamens, ietta le dessein par-
 fait d'un concile general, qu'il assigna
 à Rome. Mais Innocent 3. plus sçauant
 & plus dextre, comme plus hardy se
 proposa d'acheuer ce bastiment, & de
 s'eterniser par la mōstre d'un des plus
 grands Conciles qu'on vit iamais en
 l'Eglise. Pour cest effect apres auoir
 escrit d'honnestes lettres, fort pleines
 de flaterie à tous les Roys qu'il apasta
 de vains noms d'honneur, qu'il print
 aux doux son de ses belles paroles, à
 fin de fonder solidemēt ce droit nou-
 uveau sur leur patience : il prescriuit &
 limita en maistre absolu le temps de
deux ans à tous les Euesques de la ter-

To. 3. Cōc.

re pour s'y preparer, inuita tous les Princes à y enuoyer leurs Ambassadeurs par deuotion, & mena si finement par le nez tous les modérateurs du monde qu'il acheua paisiblement à Rome le project de son assemblée, illustre & remarquable du nom de 412. Euesques, & huiët cens Abbez ou Prieurs. Car par vne estrange fatalité il trouua les Roys si peu sçauans de leurs droits, si timides, si mal vnis, & si descousus d'amitié & de volonté, que par ialousie & contention ils luy en laisserent passer son enuie. Depuis ce tēps, ses successeurs ont tousiours essayé de retenir & accroistre cest honneur de l'estendre & monter plus auant; & avec peu de controuersé ont commandé la plus part des Synodes generaux iusques au Cōcile de Trēte. Il est vray que la possēssiō de ce droit nouveau, non soustenue d'aucū tiltre tāt soit peu coloré ou valable, leur fut interrōpue aux Conciles de Pise, de

*Nacler.
Vsp̄erg.
Sabellic.
Martin.
Cappell.*

Tom. 4. cōc

Tom. 5.

PHILIPPIQUE. III.

de ces sacrez comices , est naturellement liee aux sceptres eternels des Roys. Que les peres Romains se ravisent donc, & ouurent icy les yeux sur leurs playes mesmes; qu'ils se façonnēt & moderent sur ces exemples & images domestiques. Car celigant contre nous en la faction de cest insolent Espagnol, qui les mesprise & les gourmande , qui ne retire pas de dessus Rome les insatiables yeux de sō ambition, pour si loin qu'il en espāde les auares regards , qui leur promet de ne les manger que les derniers, d'un benefice de Cyclope : si au temps de ces derniers celebres Conciles ceste autorité de la conuocation comme beaucoup d'autres fust rudement esbranlee en leurs mains, ils courēt icy fortune qu'on la leur en face tomber du tout. C'est l'interest & l'offēse de tous les princes blesez en nostre mal: qui ne pourront iamais rencontrer occasion propre ny pareille, pour regaigner ceste prerogatiue perdue par tant de negligence , qu'en assi-

stant l'Eglise Gallicane, & cest ancien
& puissant Royaume cōtre cest arrogant
& insupportable Espagnol, cōmun
& iuré ennemy de tous les estats
& peuples du monde, qui ne medite
& ne respire rien que la tyrannie de
toute la Chrestienté; en la raison &
iustice des iniustes & temeraires Bulles
que ce barbare auoit extorquées
de Gregoire, pensant sur cest artifice
se faire vn pont, & vn large passage à
l'occupation & enuahissement de la
France. Pour apres auoir franchy s'il
pouuoit ces puissantes frontieres &
ceps eternal de son audace, se ietter
& desborder furieusement sur les terres
de tous les autres princes: desquels
certainemēt il se promettoit bon
marché s'il pouuoit trouuer le
moyé d'euiter sa ruine asseuree & infaillible,
qu'il ne craint & ne redoute que de la
valeuruse espee & bras victorieux de
nostre Prince. Il faut dōc si le siege
Romain no^r destitue en ceste cause,
& veut rōpre nostre alliance, pour
perdre ce riche Royaume au

PHILIPPIQUE III.

Nacler.

Vfberg.

Auentin.

profit de l'Eſpagnol: que pour la de-
 fenſe des droiëts de France, pour la
 vengeance de nos iniures, & pour la
 conſeruatiõ cõmune de leurs digni-
 tez & Empires, tous les Princes ſe dõ-
 nent icy la main, ſe ioignent & lient
 Chreſtiennement, comme ès temps
 des Henrys d'Allemagne, de Fede-
 ric, de Sigifmond, de Maximilian, &
 Loys 12. pour la tenue d'un Concile
 general. Remede ſalutaire non ſeule-
 ment à la France, mais tres- neces-
 ſaire & tres-important au repos & af-
 ſurance de tous les Royaumes, tant
 pour la reſolution & eſclairciſſement
 des poinëts contëtieux en la foy: que
 pour nettoyer ſainëtement de mille
 taches, mille rides & tares difformes
 la diſcipline de l'Egliſe que Dieu a
 logee en leurs mains; & pour renuer-
 ſer vigoureuſement d'un effort vny &
 concerté l'inſupportable audace Eſ-
 pagnole ſi violente & ſi croiſſante,
 maſquee du voile emprunté de Reli-
 giõ, & de la fauſſe deffenſe de l'Egli-
 ſe. Il ne tiendra donc qu'aux Roys
 s'ils

s'ils ne regagnent icy, & ne se rendent eux-mêmes ces anciennes prerogatiues, les plus riches & plus honorables ornemens de leurs couronnes. Toute la Chrestienté en la pressante necessité de tant d'affaires demande ce iuste secours: & tous les partisans d'Espagne ne sçauroient empêcher ny corrompre ces droits que tant d'auctoritez, de raisons & d'exemples ont heureusement estably, solidement confirmé, & saintement consacré à la gloire de leurs sceptres. A quoy si les peres qui se sierront legitimelement sur la chaise de Saint Pierre apportent vne ame reposée, & non tachée des restes de l'enuie de Gregoire; s'ils ne retiennent rien de son iniustice & violence, successeurs seulement de sa place, non pas de ses violentes humeurs: ie desireray plus que tout autre de leur y voir retenir le rang honorable de leur ordre, que nostre amitié & alliance leur cōseruerent au concile de Vienne, cōuocqué pour la iustice de pareilles iniures.

PHILIPPIQUE III.

Sinon il faudra que les princes qui tiennent le gouuernail du monde, Viceróis & saints Lieutenâs de l'Empire de Dieu, apres auoir ordonné à tous les Pasteurs de leurs Eglises d'y apporter leurs iustes & genereux suffrages; selon la dignité & antiquité de leurs sceptres prennent en main la moderation de ceste celebre assemblée, sur les pas Chrestiens & les pieuses traces de Constantin, Theodose, Martian, Iustinian 2. Charlemaigne, & Otton 1. Ou bien se resoluent d'en subdeleguer la presidence & conduite à quelque Prelat d'honneur, renommé de sainteté & de doctrine, sur les prudents desseins & eternels vestiges du Concile de Nice, de Sardique, du septiesme Concile vniuersel, du Synode Sutrin, & autres saintes compagnies recueillies à Rome, à Mantoue, à Constance & à Basle. Car que peut-on opposer icy de fort, de subtil ou de calomnieux pour rompre ou affoiblir ce coup vigoureux de la iustice diuine, pour trauerser ou trou-

bler le cours de ce saint & necessaire dessein? Trouuera-on estrâge, & nouveau ce qu'une si longue & mesuree discipline, ce que la pure doctrine & viue foy de tant de peres, la iuste & ancienne police du Royaume de Iesus Christ & la suite esgale de tant d'annees ont fondé & basty si saintement en l'Eglise que nous auons exercé & praticqué pour la France, és Conciles de Paris, de Tours, de Lyon, de Milan, & de Pise? S'estonnera-on de voir ce que tous les Royaumes ont employé de mesme assurance & courage, en mesmes necessitez & occurêces? Ose-on bien encores debattre & remuer vne chose si claire, si resolue & confirmee? Quels esprits de contention & de diuorce? Quels efforts de temerité & de presumption! de penser effacer d'une impure & sanglante main tant de traicts eternels & innocens que la main & l'esprit de Dieu ont si viuement portraicts & empraincts sur le front de toute l'Eglise, qu'elle a si humblement receuz, & si sainement

PHILIPPIQUE III.

conseruez contre tant de diuerſes & mauuaiſes rencontres ! Que reſpondez vous, que begayez encores ennemis obſtinez, barbare & gotique engeance ? Voulez vous dementir toute l'Egliſe, peruertir ſon ancien vſage, corrompre l'ordre & couper les nerfs de ſon premier gouuernement ; accuſer la memoire de tant de peres, eternels flambeaux de noſtre Religion, vous preſumer plus prudens & plus ſages que tous ces grands Pilotes des vaiſſeaux de l'Egliſe, cōfondre & meſler toutes choſes, caſſer & abolir les formes inuiolables & ſacrees de ces ſaintes aſſemblees, retenues & confirmees de toute memoire, de toutes gēs & de tous ſiecles ? Rien que noſtre mauuaiſe & timide volonte ne peut esbranler ny arreſter ce ſecours : rien ne le peut retenir ny retarder que la diuiſiō & froideur des Princes Chreſtiens, à qui vn commun malheur & vne humeur peſante & aſſoupie ſemblēt auoir attaché les mains de crainte ou d'enuie, pour les ietter vn iour

garrottez & estraints de ces liens volontaires en la seruitude & tyrannie del'Espagnol. Ils y penseront pour eux & pour nous, & s'esueilleront au cry des flâmes de tât de maisons voisines: c'est trop profondement dormy au bruiet de tant d'alarmes Espagnolles. Il est temps que tous les Princes & toutes les Eglises se disposent à contribuer leurs auctoritez & prudences à l'effect de ce renommé Concile, l'assurance de leurs estats comme du nostre. Que si Dieu nous fauorise tant de veoir reluire ce iour de bon-heur, comme nous l'esperons & attendons de sa grace; ces saints comices de l'Eglise seront nostre confort, les iuges eternels de nostre fidelité, cōme de nostre Religion, & de l'infamie & honte de tant de cōspirations estrangeres. En ceste grande & sainte compagnie de tât de Dieux, en ceste troupe esleuë de tant d'Euesques & oingts du Seigneur consacree & auctorisee de la presence des Roys & Pasteurs de toutes les Eglises; en cest abregé

PHILIPPIQUE III.

de la pieté du mōde, en la face de toute l'Eglise paree & mise à son iour, tenant son liēt de Iustice, assise en majesté ouuerte, nos insolens ennemis & tous les protecteurs de ces Bulles outrageuses trembleront d'horreur & d'effroy. La seule veuë de tant de sainteté & de grandeur les accablera d'estonnement, les esclats des vertus de tant de Princes & de saints Peres esclairans comme estoilles, comme les viues lampes & soleils de la Chrestienté les esblouyront de rencontre & d'abord, & les rempliront de confusion & de crainte. Leurs iniustices paroistront à descouuert & à nud, esclairees des yeux religieux de tant de graues personages, la fleur & l'esslite de toute la grandeur, sainteté & iustice du monde. Là où au contraire l'Eglise Gallicane comme vne des filles aînees de l'Eglise, glorieuse de l'honneur de ce celebre iugement desployé pour sa conseruation, & pour la gloire de sa constante fidelité & religion reprendra son premier cœur,

& regaignera ses auctoritez anciennes; animee & fortifiee de l'assistance de tant de puissans Roys, & d'un si grand nombre de saintes Eglises ses sœurs germaines, toutes interessees & offensees en la douleur de ceste cause si commune, & si coniointe.





PHILIPPIQUE

QUATRIESME.



VE nous sert-il d'auoir tant , & si longuement trauaillé? Esperons-nous cueillir bien tost vn fruit meur de tant de labeurs & de peines ? Noz ennemis s'attendent que tous les traits de iustice que nous pensons bander , & faire descocher sur eux doiuent rebondir & resauter plus fortement contre nous : & qu'ayant assemblé vne si grande & maiestueuse compagnie de iuges attirez de toutes les parties de la terre, nous prouocquerons sur nostre teste tous les poincts de rigueur que nous pensions auoir esguisees a leur supplice. A la verité , si les Bulles que nous pretendons faire casser en ce sacré consistoire de Dieu, estoient si saintes & innocentes , si

PHILIPIQUE IIII.

iustes & plaines de diuines terreur
qu'on nous les a voulu faire accroire,
si elles estoient basties & formees
d'une matiere si naturelle, si ensouf-
free, & si suiectte à s'allumer en fou-
dres aux premiers esclairs, si elles e-
stoyent promeuës & enfantees de cau-
ses si necessaires, façonnees & escluses
d'une si puissante main, decernees a-
uec tant d'ordre, de circonspection, &
de prudence, appuyées de si fortes rai-
sons, remparees de si forts exemples,
fulminees avec tant de solemnité &
de ceremonie, si pures en fin & si re-
ligieuses que nos ennemis les vantēt,
il seroit malaisé de trouuer des paro-
les assez viues & bien animees pour
en esbranler l'autorité & la iustice.
On ne sçauroit forger des traits assez
acerez & aigus, pour penetrer & fau-
cer tant de trapes. Nulle censure
tant soit elle subtile & pressante ne
pourroit prendre contre vn ouurage
si net, si clair, & si luyfant, sans glis-
ser foiblement comme mouches sur
la glace d'un crystal poly & lissé.

Ceste forteresse seroit trop en deffence & de trop difficile approche pour l'assaillir, sans quelque crainte de s'esfeuelir souz sa cheute & sa ruine. Ceferoit bien trop d'imprudence de tendre des pieges à nostre liberté mesme. Ceferoit trop d'aveuglement & de stupidité d'aller tóber la teste premier dás les fosses que nous creusons à la perte d'autrui, & de courir les yeux bandez aual d'un precipice trāché & roidy de nostre propre main. O temps ? ô mœurs ? ô toutes choses desreiglees & renuersees ? Sera-il bien possible qu'il se rencontre encores au monde quelque hōme si vuide d'honneur, & si destitué de pudeur, qui vueil le icy faire du tout banqueroutte à sa reputation, pour auoir l'asseurance & le visage d'entreprendre la deffence d'un acte si honteux & si estrange ? Deurons nous iamais craindre que la pensee en tombe en l'ame d'un homme de bien ? Nous ne croirons iamais que les plus perdus de modestie & d'honneur, que les plus obligez serui-

PHILIPPE III.

teurs d'Espagne, ny les plus engagez en l'infamie de sa faction osent icy ouvrir, la bouche cōtre nous, sās que la parolle s'estouffe d'horreur dans leur gosier, sans que l'air s'infecte & s'allume d'une halaine si pestillente; sans que le Ciel contretienne aussi tost les voix sanglātes & mortelles de ces hibous, si plaines d'impurité, suivies de si mauuais presages. Car quelle saincteté, ô funestes & desastreuses Corneilles, quelle religion trouuez vous en une chose si desreglée, si pleine de calomnie & d'iniure? Quelle iustice peut on fonder en vn decret si partial & si ennemy? Quelle prudence & maturité en une precipitation si violente? Quelle force & autorité en chose si vaine & si manque de raison & de puissance? Dites nous messagers de malheur, quel bon fruit peut engendrer à la Chrestienté tant de corruptiō? De quelle odeur peut parfumer le Christianisme tant de puanteur? Qu'elle esperāce de santé doit concevoir l'Eglise de tant de mal ver-

se comme d'une nouvelle bouëte de Pandore? Mais vous saintes Eglises, ouures icy les yeux, contemplez toute la disposition & la simetrie de cest edifice miserable. Permettez souz vostre respect qu'on face icy lanotomie de ce corps mort estouffé de son propre venin, si la pourriture n'é destourne point vostre veuë! Qu'on n'y entre point si auant pour n'offencer ou ne souiller la chasteté de voz yeux chrestiens: qu'on ne s'attacque qu'aux traits plus apparans & plus voyans, sans sonder si auât on descouurira du premier trait d'œil toute la tromperie & l'imposture. On verra que cest vn corps fantastique, plain d'illusions, sans forme ny matiere, sans aucune constance proportionnee, comme manquant de toute naturelle & instrumentale construction. Ou biẽ en ceste chimerre mesme d'excommunication, on trouuera que les Bulles qui l'ont enfantee sont de tous poincts imparfaites, iniustes, temeraïres, & violentes: & que soit qu'on en considere la

P H I L I P P I Q U E I I I .

cause, la matiere, la forme ou la fin, ce n'est rien qu'entreprise, iniustice, violence, & ambition: faute de puissance, de subiect, & d'occasion: comme de façõ, de forme & de dessein salutaire. Par où cõmançerons nous à entamer vne chose si deschiree? quel ordre suyurons nous à desuüider vne fuzec si cõfuse? Si nous n'auions dõné beau-

Chrysost. coup de traiçts de la foiblesse de ceste
Hierul. 35 Presumption dãs le tableau de l'Egli-
super se Gallicane esclairé du iour de quel-
Matth. ques rayons de nos anciennes liber-
cap. mul- tez, nous enfoncerions plus auant ce
nsacerdo- propos. Cela nous fera contenter de
tes. 40. l'authorité de S. Chrysostome, que ce-
dist. cap. luy qui abuse de ces primautez en la
nullus. 99 terre, se prepare autant de confusion
dist D. au ciel. Ou bien nous renuoirons à S.
Gregor. 30. Gregoire, que nous prenons icy à ga-
lib. 7. ad rand, ceux qui avec tant de dõmage
Enlogium se iettent sur toutes les Eglises. Il les
& lib. 6. arrestera court de l'horreur des nons,
Ind. 15. & des menaces dont il reprime sain-
Ep 24. 18. tement ces vanitez si legeres. Quel-
30. 36. que part ou soit l'Eglise, en quelque
& 38.

lieu qu'on la rencontre, de quelque
façon qu'on la cõtemple, soit en Gau-
le ou en Affrique: ou que soiët placez *Hieroni.*
& assis les Eueſques à Rome, ou Ale- *1. contrã*
xãdrie, S. Hierosme assure qu'ils sont *Ioninian.*
de meſme merite, de pareil sacerdo-
ce; tous ſucceſſeurs des Apoſtres, ſe
ſeruans tous dit Origene de la clef
meſme de S. Pierre. Que ſi quelques *Cyprian.*
peres cõme S. Hirenee & S. Cyprian *lib. 1. ep.*
par foy appellent Rome chef de l'v- *& de ſin.*
nitẽ de l'Egliſe, qu'on regarde quant *prelator.*
& quant les reſtrinctions & tempera-
mens qu'ils y appliquent, qu'on eſ-
coute comme toutes les Egliſes ſe vã-
tent hautemẽt de meſme gloire. C'eſt
vn tiltre commun pour reigler les
puiffances, non pour les vnir, entaſſer
& confondre en vne à la perte & ſer-
uitude des autres. Car l'Egliſe d'An-
tioche ſe nomma en vn Concile chef *Theodor.*
& carraẽtere de la foy Catholique: *l. 5. c. 9.*
Celle de Ieruſalem fut decoree & pa-
ree de meſme nom, par les Peres du
Concile de Conſtantinople: & l'Egli-
ſe de Conſtantinople eſt tantõſt ap-

PHILIPPE III.

*L. decernimus &
l. Constantino
cap. de
Sacros.
Eccles.*

pellee par les Empereurs la mere des Chrestiens , tantost la teste de toutes les Eglises. Gregoire de Nazienze fit ainsi reluire & esclater Cesaree des rayons de cet honneur, & tous les Peres Orientaux ont tousiours voulu partager ces noms de grandeur avec les plus hautes Eglises. Dâs l'enceinte & les cercles sacrez de cest ordre, les anciens soleils de nostre foy illuminoyent & esclairoient le monde, sans flechir ny se destourner de ceste ligne de charité, sans se fouruoier ny detraquer de ceste ecliptique d'humilité. Dans les iustes bornes de ceste pureté & egalité si mesuree, toutes les Eglises cōme sœurs, & tous les Euesques comme freres, comme possedans ensemblement le S. Esprit & l'autorité ecclesiastique, comme tenans chacun vne portion solidaire de ceste sacree dignité, vesquirent longuement en paix en la premiere integrité du Christianisme. Ils n'estoyent ny plus aduancez ny plus esleuez les vns que les autres, & i'ose dire qu'il fut vn temps

temps que les sieges n'estoiēt certains
 ny definis; que les Apostres traictoiet
 quelquesfois tous ensemble le gou- *Act. Apost.*
 uernement d'une Eglise, ou quelque-
 fois deux ou trois y mettoiet la main,
 s'ils s'y rencontroient à propos. Hieru-
 salem fut longuement conduite de
 la prudēce de tous ces premiers Am-
 bassadeurs de Iesus Christ: S. Pierre,
 & S. Iean manierent & reglerent Sa-
 marie: & S. Pierre & S. Paul fonde-
 rent, bastirent & administrerent l'E- *Irenaeus*
 glise Romaine. Mais apres que les E- *Cyprian.*
 ueschez ont esté distinctes, separees
 & formees, que chacun a sceu le lot
 de son partage; les Peres ont pour le
 moins basti leurs sieges sur mesme
 modelle, les ont composez de mesme
 matiere, les ont parez de semblables
 proprietiez & pareilles qualitez essen-
 tielles, bien qu'ils fussent inegaux de
 villes, de quātité & estendue de terre.
 La grandeur ne se prenoit qu'au cara-
 ctere de la dignité, & ne se mesuroit
 qu'au niueau & au plomb de la mar-
 que Episcopale. Car quoy que les epi-

PHILIPPIQUE III.

stres mal assignees aux premiers Papes, bruyent si hautement du son de ces tiltres d'Archeuesques & de Primats, ceux qui ont tant soit peu de cognoissance de la verité de l'histoire saincte, qui ont recogneu les formes de l'anciē ordre du Royaume de Iesus Christ, sçauent que ces differences de puissance n'estoient nees ny esclofes

Lib. 6. Et au premier aage de l'Eglise. Clement

7. Stromat. Alexandrin depeignant en ses tapis-

series les diuers degrez de toutes les dignitez du Clergé, met à la teste les

Euesques, donne & assigne le second rang aux prestres, deffere le troisiēme

aux Diacres: Et lors que Constantin

Euseb.

commanda aux Euesques de Gaule de s'assembler pour le procez de Ce-

cilianus, voulant limiter leur train, il

leur ordonna d'amener seulement a-

uec eux deux hommes du second or-

dre, qui ne peuuent estre autres que les Prestres. Je ne puis donc accorder, ny passer vne si vieille & si exquise re-

cherche de ces grâdeurs, non plus que ie ne puis me persuader qu'à la naissā-

ce de l'Eglise les noms & grades des

Euesques fussent vnis & confus avec les charges des Prestres. Car encore qu'il semble que dans les Epistres de Sainct Paul, ces qualitez paroissent *In epist. ad Tim.* quelquesfois comme enlaccées & meslées, & que S. Irenee escriuât à Victor, *Euseb. 5. c.* appelle Prestres les anciens Euesques *24.* Romains : Toutesfois S. Ambróise par ses Epistres adressa long temps apres luy ce mesme nom de Prestre à la personne des Papes comme Damasus : & lors que les Archeuesques, *Ambros. lib. 3. epist. 30.* Metropolitains, & Euesques eurent leurs offices & tiltres diuers & separez par la police des Conciles, les peres, comme S. Hierosme, S. Gregoire & autres ne laisserent pas d'estendre comme auparauant les noms de Prestres sur tous les Euesques des plus hautes & plus eminentes Eglises. Je me contente pour preuue entiere de ceste verité assez apparente de la differente condition des septante Disciples reculez de la dignité des Apostres, de la frequente mētion des Apostres & des anciens, de la description

Actor. 15.

PHILIPPIQUE III.

Lib. 6. Et & departement que faiët Clement
7. Strom. Alexandrin de tous ces ordres, & charges Ecclesiastiques; & des lettres pacifiques donnees à S. Irenee au premier voyage qu'il fit à Rome, par
Ado. Vien. lesquelles Photinus son Euesque le re-
Euseb. 5. commanda comme vn des Prestres
cap. 4. Et 6. de son diocese. Encore que ceste diuersité & discretiõ de qualitez se puisse assez remarquer dans les Epistres
Cyprian. ep. de S. Cyprian, dans les discours d'Eusebe, par le fil & le cours des histoires
4. 5. 9. 11. plus anciennes de l'Eglise, comme
lib. 1. 6. 7. dâs les ouurages de tous les premiers peres. Je recognoistray bien de bonne foy que dès le temps mesme de sainët Cyprian, la negligence & mollesse de la plus-part des Euesques trop relaschez & refroidis en l'exercice de leurs charges, demanda pour secours que les plus vigilans, plus aduisez, plus doctes & plus fermes entreprinsissent cõme le soin & l'inspection de plusieurs Eglises, qui sembloient pancher & decliner du tout, sans l'appuy de ceste vertu nouvelle. Mais il faut aussi qu'on

confesse qu'ils n'embrasserent iamais
ce soulagemēt en tiltre de puissance;
& que l'origine de ceste entremise &
conduicte de la bergerie des autres,
ne naissoit que de la charité Chrestienne, n'esclairoit d'autre lueur que du
feu d'yne ardente enuie d'aider & se-
courir les plus foibles; comme tous
les hommes aussi differents d'esprits
& de mœurs, que diuers de visages ſont
toufiours inegaux, & ne se trouuent
que rarement de mesme force, & de
mesme portee. Par là donc, comme
par la seule porte de ceste amitié; par
les degrez de ces charitables inten-
tions, sur les aisles de ces bruslants de-
sirs du bien commun & aduancemēt
du Christianisme, S. Irenee fut esle-
ué à la surintendance des Eglises de
Gaule: S. Cyprian obtint cōme vne
forme & image de presidēce sur tou-
tes les Eglises d'Afrique, d'Espagne,
& partie de celles de Leuant, comme
Gregoire de Nazianze le tesmoigna
en l'oraison qu'il consacra à la me-
moire des vertueuses actions de ce

Basil. mag.

ep. 48. 6.

70.

Euseb.

PHILIPPIQUE III.

pere. C'est ainsi que l'Euesque d'Alexandrie se chargea de la direction & gouuernement des Eueschez d'Egypte & Pentapolis; que celuy d'Antioche eust l'œil sur les Eglises voisines, & vne partie d'Orient; & que l'Euesque de Rome print en main la sollicitude & soucy des sieges Italiens proches de ses fauxbourgs, desquels selon Ruffin, il ne retenoit la conduite & administration que par vsage, & coustume. Toutes fois la necessité demandant l'establissement & confirmation de ce que l'amitié Chrestienne n'auoit faiët que desseigner & esbaucher grossieremēt; sur ce premier crayon, sur ce plan & modèle tracé par le feu de ceste religieuse & socia-

Ruffin. lib. 1. c. 5. & 6.

Synod. Nicen. can. 6. Et 7. Constantin. can. 2. & 3.

ble charité les Archeueschez furent basties & dressees par le Concile de Nice; cōfirmees & accreues de nombre és Synodes generaux de Constantinople & de Chalcedone. Qui mōstrent assez par ce partage d'honneur les limites, & confins de puissance marquez & definis au siege Ro-

main comme aux autres, & rognent de bien pres les aisles aux pretentions d'un si general Empire. Les mesmes occasions qui firēt ouuerture de l'establisement des Archeueschez, mirent en auant des autres dignitez moyennes, qui prindrent encore place au dessus des Eueschez. Car pour le grād accroissement du Christianisme qui réplissoit presque toute la terre, pour la seconde propagation & multiplicité des Eglises; en mesme temps qu'on vit naistre, ou pour le moins bien former & nouër ces quatre ou cinq premieres Archeueschez, on disposa par tout des Metropolitains; qui deuoient mouuoir & releuer de la prudence des Archeuesques, & auoir de plus pres l'intédance sur quelque nombre d'Euesques. Paulinus Euesque de Treues est appellé par Athanasie Metropolitain des Gaules, & l'Euesque de Milan de quelques Eglises d'Italie. Capouë fut faiëte Metropolitaine, & la ville d'Albe se para d'un pareil titre. Les Euesques de Turin, d'Arles,

*Athanas.
in apol de
fuga*

*Sosom. 4.
cap. 8.*

PHILIPPIQUE III.

Cap. 1. & 2. & Marseille se nommerent Metropolitains au Concile de Turin; Epiphanius fut créé Metropolitain de Cy-
Sofom. 7. c. 26. & 6. cap. 21. pre; & la ville de Thomis se donna ce rang sur les Eglises des Scytes. De là on vint à despartir les Eueschez, mesmes de chasque prouince en premier, second, & troisieme siege; & ainsi de suite, par l'ordre de la grandeur des villes, de l'antiquité des enseignes episcopales, ou de la sainteté & grauité des pasteurs qui les auoient mōtees à ceste dignité. Mais il fut seuerement deffendu aux Patriarches & Metro-
Concil. Sard. c. 19. Antiochēs. cap. 13. politains d'estendre leur iurisdiction hors des bornes qui leur auoient esté marquees: & aux plus grands & plus
Concil. Cart. 3. c. 26. Cartag. 6. cap. 57. eminents d'entre les Euesques, que la seule assignation de ce rang auoit tant esleuez sur les autres, de s'appeller ny premiers Euesques, ny Princes des Euesques: on leur commanda de se retenir simplement aux termes du nom d'Euesques, du premier, second, ou troisieme siege. Reiglement fort soigneusement entretenu, comme on
peut

peut remarquer par les signatures de tous les Conciles de cest aage. La seule necessité succedant à l'amitié, distingua donc ces degrez d'honneur; les fit esclorre hors de ces nuages, & de ces foibles & legers principes pour les pousser à ces dignitez solides. Car auparauant, l'Eglise roullant d'une mesme forme comme polie, lissée, & bien vnie, eust prins cōme à laidur la hauteur de ces plus grands tiltres, & se fust esblouye en la petitesse & foiblesse de sa naissance du lustre trop voyāt de ces noms si esclatans: tout ainsi que les mōtagnes les plus hautes corrompent la rōdeur de la terre, & desrobēt le plaisir agreable de la moitié de sa veuē: comme on voit que les verrues rendent rude vne belle main; que les gros nœuds entrecouppent la droicture & belle taille des arbres; que les esclairs trop brillans troublent vn air serain; & que les rayons du Soleil mesme trop ardens, & trop forts menassent de la pluye & du tonnerre.

Aussi à vray dire ceste splendeur &

PHILIPPIQUE IIII.

lueur exterieure si estincellante, fur
côme auantcourcuse & messagere de
beaucoup d'orages qui esbranlerēt &
troublerent la bonasse de l'Eglise, &
vn presage assure de son decroisse-
ment & decadence; de mesme qu'on
veoid vne lampe qui se veut esteindre
& qui semble tirer à la fin, esclaire
plus viuement en mourant; & ietter
par le dernier effort de sa vie de plus
grands esclats de lumiere. Car ces
noms esleuez rompant la iuste & me-
suree societé de l'Eglise, trauerfant la
douceur reposesee de son premier
cours, ietterent aussi tost la semence
des contentions qui ont tant affoibly,
& presque renuersé le Christianisme.
On plaيدا soudain pour les bornes &
finaiges de puissance, pour les nou-
ueaux limites, & diuers confins de iu-
risdiction. Les Euesques d'Arles & de
Vienne plaiderent au Concile de Tu-
rin; S. Cyrille Archeuesque de Hieru-
salem, eust procez contre Acatius de
Cesaree; S. Basile s'attaqua à Antime
Metropolitain de Tyane: Les Eglises

Concil.

Taur. cap.

2. Tom. I.

Concil.

Sosom. 4.

cap. 25.

de Cypre demanderent reiglement
 au concile d'Epheze; celles de Nice
 & de Nicomedie à Chalcedone : &
 quelques peres Romains s'attirerent
 par là l'enuie de la plus-part des au-
 tres, à qui ils voulurent commander
 plainement. Là où auparauant enco-
 res qu'on vist comme vn dessein, vne
 forme & image de toutes ces charges
 d'honneur & de puissance, on n'y trou-
 uoit point de mescontentement ny *Cyprian.
 epist. 13.
 lib. 3.*
 de regret; personne ne se donnant que
 autant de tiltre, de pouuoir & d'auan-
 tage qu'il auoit d'affection de bien-
 faire, de seruir Dieu, d'assister & secou-
 rir ses freres. Lors mesmes s'il se ren-
 controit quelqu'autre plus capable
 de ce gouuernement, qui eust la main
 mieux faicte, plus dextre & plus rom-
 pue à la conduicte du timon des Egli-
 ses, le premier cedit librement cest
 exercice de pieté, & ceste direction
 Chrestienne à sa venue; attendoit &
 receuoit de luy les mesmes fructs &
 effects de ceste charité qu'il auoit des-
 partis à ses voisins. Ou bien tous les

PHILIPPIQUE. IIII.

Euseb. 6. cap. 11. Euesques de la prouince ensemble, d'une commune main transferoient ceux qui leur sembloient plus propres, plus accommodez, & plus duisables en vn lieu, qu'en l'autre: comme on vit que les Eglises d'alentour de Capadoce firent trouuer bon à Alexandre de se transporter en Hierusalem, & de changer de siege, & de demeure. Vivant donc en ceste egalité si sociable & si amie, les vns visitoient & corrigeoient franchement les Eglises des autres, sans qu'on se plaignit de presumption ny d'entreprise. L'Eglise de Hierusalem delega S. Pierre & S. Iean pour confirmer l'Eglise de Samarie: S. Irenee alla composer le schisme de Phrigie: Apollinaris fit vn voyage iusques à Ancire de Galatie, pour esteindre & estouffer l'heresie des Montanistes; Denis Alexandrin assoupit les differens & desordres de beaucoup d'Eglises; & Serapion se transporta iusques aux Rossences. Comme long temps apres, ceste amitié n'estant pas du tout relaschee & si

Act. Apost.

Euseb. 5. cap. 3. & 4.

Nicephor.

Euseb. 7. cap. 20.

nie, ny ces nouveaux tiltres de puissance trop solides & confirmez, S. Hilaire Euesque de Poictiers, & Eusebe de Vercel, furent deputez visiteurs de toutes les Eglises d'Orient & d'Occident; & S. Hilaire retourné d'exil, exercea ceste charge sur l'Italie mesme, poussé du seul mouuement de la charité Chrestienne. En ceste purité de l'Eglise, chacun auoit des sentimens & desirs du deuoir de mesme amitié. Que si tous n'en pouuoient egale-ment dōner pareilles preuues, ou faire semblables voyages, retenus & empeschez par l'aage & l'indisposition, & attachez de trop pres au soin de leurs Eglises populeuses, ou difficiles; ils ne retenoient pas pourtant leur vertu oisue & resserree, ne couuroiēt & ne cachoient pas la lumiere de leurs lampes des languissantes ombres d'absence. L'esleuāt comme vn fanal pour esclairer le chemin aux pelerins du voyage du monde, la plantant comme vn feu de signal & d'adresse sur la sainte montaigne, ils ren-

Ruffin.

Socrat.

3. cap. 7.

Et 8.

PHILIPPIQUE IIII.

doient par lettres tous ces religieux & pieux offices. Clement Alexandrin escriuit souuent aux Atheniens pour reschauffer & redresser leur foy ia rati-
Enseb. 6. cap. 46. 7. cap. 21. tiedie & coulante. Denis Corinthien s'occupa souuent à mesme ouurage : & S. Cyprian fit vne infinité de depesches & de lettres aux Prestres & Diacres de Rome, comme au Clergé de beaucoup d'autres Eglises. Pour
Cyprian. epist. 13. lib. 3. cela dit-il en vne Epistre à Estienne 1. la sagesse de Dieu a tant ordonné & establi d'Euesques, afin que les vns puissent soulager & fortifier les autres, les releuer & retirer des heresies, où ils pourroient estre tombez, & recueillir sagement tout ce que les plus mal aduisez auroient respandu & espanché comme mauuais mesnagers, & prodigues. Que si vn seul n'estoit capable de ce soulagement & renfort, s'il ne pouuoit venir à bout de ceste entreprinse trop inegale à ses forces, alors toutes les Eglises ensemble se donnant sainctement la main, y contribuoient leurs labeurs ; & s'em-

ployoiét aux occasions plus pressantes & pl^r difficiles. Soit pour arracher les heresies comme des Ebionites, & de Meandre, pour rallier & renouër l'Eglise déchirée des chismes de Phrigie, & de Rome; ou pour en retrécher ^{Euseb. 5. cap. 14.} par le glaive d'excommunication les membres desesperez de santé, pourris ^{Cyprian. epist. 3. lib. 1.} & contagieux de la longueur & virulence du mal, comme Paul Samosatense. Or le bel ordre de ceste fraternité & alliance estoit retenu & com-^{Euseb. 7. c. 24.} me enchainé & estrainct de quatre ou cinq forts liens. Entretenu par lettres frequentes, par la cōmunication des confessions de foy, par l'assemblée des conciles, & par le catalogue du nō des Euesques: Mais plus estroictement & plus fermement attaché encorés par la participation de l'Eucharistie: qui estoit comme la maistresse corde de toute ceste harmonie, le principal nœud & le ciment de la sainte liaison de ceste belle façon de vie que S. Cyprian & S. Augustin ^{Cypr. ep. 10. lib. 2.} appellent proprement & heureuse-

P H I L I P P I Q U E I I I I .

*Socrat. 4.
cap. II. 12.
13.*

*Euseb. 7. c.
24.*

ment l'vnité de l'Eglise. Quant aux lettres: lors que quelqu'un estoit promu ou restitué à la dignité d'Euesque, il escriuoit aussi tost à tous les autres pour s'insinuer & introduire en leur société & bonne grace. Ou bien le Metropolitain, l'Archeuesque, & le Concile de la prouince pour luy donner entree, & le faire librement admettre à la communion vniuerselle des Euesques, l'accompagnoient & recommandoient de lettres fort expresses, portant assurance & certification de sa vie & de son ordre. Car le Concile d'Antioche apres auoir destitué & déposé Paul Samosatése annonça, & signifia à toutes les Eglises la creation & substitution de Dominus: afin qu'on ne fist point difficulté de luy escrire franchement, & de recevoir de luy sans des fiance les lettres de communion; ainsi qu'on voit par l'Epistre Synodale. Je pourroy représenter beaucoup de pareils exemples: lesquels tirez apres en consequence & police necessaire, donnerent occasion

sion

fiõ d'establiſſir ſur leur modelle l'ordre
de ceſte diſcipline, preſcrite & deſſi-
nie d'eternelle obſeruation par les
Conciles de Nice, de Sardique, & de
Carthage. Ces lettres eſtoient bapti-
ſees diuerſemēt. Tãtoſt elles eſtoient
appellees lettres de cõmunion, com-
me par les peres de ce Synode d'An-
tioche, & par S. Irenee eſcriuant à
Victor pour la deſſenſe des Aſiatic-
ques: tantõſt elles eſtoient nommees
lettres de communauté, comme en
vn autre Concile tenu en Antioche
au regne de Cõſtantin: quelquesfois
lettres canoniques, testimoniales,
dimiſſoires, & le plus ſouuēt paci-
fiques, dõt l'vſage eſtoit fort ordinaire
& familier entre les premiers Chre-
ſtiēs, cõme dit Gregoire de Nazien-
ze cõtre Iuliã. Optatus, le Cõcile Mi-
leuitain, & les Cõciles de Carthage,
les nõment lettres formees: le conci-
le de Chalcedone les appelle lettres
commendatoires: & S. Gregoire ſui-
uy de pluſieurs autres leur donne le
nom de Synodiques, ou Synodales,

*Enſeb. 5.
cap. 24.*

*Optat. lib.
2. Concil.
Carth. 3.
cap. 28.*

PHILIPPIQUE III.

Toutes lesquelles, de quelque marque qu'elles fussent, estoient reduictes à deux mēbres & especes principales; dont les premieres seruoient à continuer & faire constamment durer ceste fraternité commencee; ou bien estoient octroyees comme vn congé & passeport à ceux qui s'acheminoient à la cour du Prince, qui entreprenoient des longs voyages hors de la Prouince, qui aloient visiter les autres Eglises, & conferer d'affaires avec leurs collegues. Les autres de la secōde condition estoient employees pour donner place aux nouveaux Euesques à la cōmuniō des Eglises: ou pour y faire remettre & rentrer ceux qui en auoient esté chassez: ausquels elles seruoient comme de tesmoignage & preuue de leur restitution en ordre, de leur purgation, ou de leur innocence. C'est la premiere estrainte & cousture de ceste amitié, & vnitē Ecclesiastique. Son second lien dependoit proprement de l'accord mesuré & vniforme des confessions de

foy, comme des paroles conceuës & tirees d'un mesme cœur, pouffees de mesme halaine, & issues d'une mesme bouche. Car les Euesques s'entre-escriuoient par honneur, comme vne declaration de leur creance: afin que ceste ferme & necessaire vertu de foy qui est comme l'ame & la vie des ames, le puissant nerf qui manie tous ces corps mistiques, & vne agraffe bien tenâte qui accouple les Eglises, les assemblast plus estroictement par la similitude & conformité de Religion & de doctrine: les tint comme enfermees sous l'empreinte & la marque d'un mesme cachet & d'un mesme sceau, les rendit remarquables de mesmes caracteres, & plus recognoissables à la monstre de pareilles enseignes. Faute de ceste conformité de religion le Pape Liberius refusa & reietta brusquement les lettres des Macedoniës, pour ne sembler consentir ou incliner à leur superstition: & S. Basile en vne de ses Epistres conseille aux Euesques de ne prédre point des

*Socrat 4.
cap. 11.
Basil. ep.
59. ad
Melit.*

PHILIPPIQUE IIII.

lettres venans indifferemmēt de toutes parts ny de toutes mains, de peur d'estre par là surprins & circonuenus pour soubzscrire, & signer la confession desuoyee des heretiques. Car apres la reception de ceste exposition de foy, apres l'auoir meuremēt digeree, & longuement pesce, on la renuoyoit toute signee & certifiee : pour tesmoigner à celuy dont elle estoit partie, qu'on conspiroit avec luy en mesme Religiõ & doctrine. C'est l'obligation du Cōcile Eliberin & semblables, qui par ordonnance expresse enioignent à tous Euesques de donner responce conuenable aux lettres des confesseurs. Je mettroiy bien auāt au iour l'ordre du catalogue des Euesques, si ce n'estoit chose trop cogneue que chasque pere gardoit en ses archiues comme vn registre des Pasteurs des autres Eglises, avec lesquels il auoit quelque cōmunication & societē : laquelle n'estoit pas plustost rompue, qu'on rayoit de ce tableau le nom de celuy dōt on s'estoit

*Concil.
Eliber.
cap. 25.
Tom. I.
Concil.*

separé. Sur cest vsage Acatius de Cōstantinople passa l'esponge sur le nom du Pape Felix 2. Mais dequoy seruoient à l'entretienement de l'alliance des Eglises tant de diuerſes assemblees des Conciles? Certes c'estoient comme les Estats du puissant Royau-me de Dieu, propres & accommodez pour conferer de l'ordre de toutes affaires. C'estoit comme vne grande vnion & incorporation de toutes les Eglises, le moyé de se veoir & s'entre-recognoistre de mœurs & de visage, qui rassëure & confirme plus les amitiéz; & comme vn lieu où les humeurs & passions des cœurs les plus recel-les, plus secrettres, & plus couuertes sortoient en public, & en la lumiere du monde. Pour ceste occasion, ces remedes ordonnez deux fois l'an par les canons des Apostres, les decrets de Nice, de Sardique, & semblables, estoient ainsi repetez; afin de retenir par vne purgation frequente la purité de la foy, dont la simpatic, les proportions semblables, & les iustes re-

*Epist.
Gelas. ad
Episcop.
Dardan.
Tom. 2.
Concil.*

*Basil. epist.
48. ad A-
thanas.
Cyprian.
epist. 19.
lib. 3. & ep.
ed Pomp.
& Quirin.*

PHILIPPIQUE III.

lations estoient l'attache & la forte
 estraincte de l'amitié des Peres, & la
 saine duree de tout le corps de ceste
 belle Hierarchie. Ces considerations
 produisirent à l'Eglise auant le Christia-
 nisme des Roys le Concile des Apo-
 stres, & tant d'assemblees sans nō que
Act. 15. les pauvres premiers Chrestiens te-
 noient à la desrobee, & à cachetes
Enseb. dās les bois escartez les plus sombres,
 & dans les antres & cauernes plus ob-
 scures. De là sortirent les Conciles as-
Enseb. semblez en Italie souz Victor, & en
 Asie souz Policrates, pour le diuers
 temps de la Pasque. De là nasquit le
 Concile Romain de 60. Euesques, cō-
Idem. lib. 6 tre Nouatianus, le premier Concile
cap. 35. de Carthage souz S. Cyprian, les Cō-
Platin. ciles d'Espagne contre Basilides &
in Cornel. Martialis, le Concile d'Antioche con-
 tre Paul Samosatense, le cōcile d'An-
Cypr. ep. cyre souz les Euesques Marcellus &
ad Quirin. Vitalis: le concile de Suene recueilly
 pour la penitence du Pape Marcellin,
 & tous les autres beaux Synodes qui
 depuis ont sceu si sainctemēt entrete-

nir l'alliance des Eglises, qui ont faict
viure & durer leur vertu & leur foy
d'une santé solide, nerueuse, coloree,
& parfaicte. Reste maintenât le Sym-
bole de l'Eucharistie: qui pour estre la
vraye & reelle communication du
corps precieux de nostre Seigneur,
faisoit que la communion & vnité
estoit plus viuemét retenue par la di-
uine force, & mysterieuse efficace de
ce grand sacrement qui mesle & in-
corpore tous les Chrestiés ensemble,
qui les viuifie & ranime de nouvelle
vie, & les rend membres viuans du
corps sacré de Iesus Christ. A l'effect
de ce dessein admirable, on enuoyoit
l'Eucharistie de l'une Eglise à l'autre
comme vn vray tesmoignage, mar-
que visible, & preuue certaine d'ami-
tié & de corespondance, telle que la
doient concevoir & garder toutes
les parties d'un mesme corps. Car no^o
voyons que S. Irenee escriuant à Vi-
ctor, luy representoit que ses prede-
cesseurs ne voulant point rōpre com-
pagnie avec les Eglises d'Asie con-

*Euseb. 5.
cap. 24.*

PHILIPPIQUE III.

*Idem. 6.
cap. 46.*

duites par S. Policarpe, ne laissoient pas de leur faire part del'Eucharistie, pour le differend & contention du iour de Pasques : Et Serapion apres estre tombé en vn peché qui l'auoit retrâché & mis hors de l'Eglise, frappé d'une grande maladie dont on n'esperoit plus de santé ny de vie, fut absouz par vn Prestre, qui comme dit Eusebe luy enuoya l'Eucharistie par vn petit garçon. Non à autre fin que pour luy faire recognoistre qu'il deuoit mourir asseuré d'estre restably au commun & vniuersel giron de l'Eglise, & ne deuoit point redouter la difficulté du chemin en vne autre vie, muny du cōmun viatique des Chrestiens, & assisté d'un saufconduit si salutaire. Mais ceste communion & societé bastie de tant de prudence, conseruee de l'application & vertu de tant de remedes, entretenue de la suite de ce bel ordre, attachee des nœuds de si puissans liens, estoit-elle inuiolable, eternelle, & de perpetuelle duree ? ne se couppoit elle point, ny n'eschap-
poit

poit iamais ? n'y auoit-il rien qui la peut desnouër ny dissoudre ? rien que le peché, & le mal. Car aussi tost que quelque Euesque estoit condamné d'heresie par l'autorité d'un Concile, qu'il estoit conuaincu d'auoir temerairement violé ceste sacrée fraternité, ou bien notoirement vicieux, obstiné, incorrigible; diffamé ou fort suspect d'un peché scandaleux, tous les autres Euesques assemblez en un Concile rompoient aussi tost avec luy, quitoient, bien qu'à regret, la communion, & fuyoient de loing sa conuersation & rencontre, cōme la compagnie d'un homme infect & pestiféré, tel que Paul Samosatense. Ou si quelque incommodité empeschoit & retardoit l'assemblee, chacun se retireroit doucement à part de sa société, pour euitier la contagion, la tache & le soubçon mesme de complice; sans aucune pretention de iurisdiction ny de puissance, que par la seule consideration de son salut, pour la hôte du scandale, & la crainte de participer au

*Cypr. ep.
20. lib. 2.
Theodorit.
5. cap. 8. &c.*

PHILIPPIQUE III.

mal, ou à la reputatiō de mesme vice. Toutesfois comme il y a tousiours en nous quelque reste & racine du vieil homme, la des-vnion & fin de ceste belle alliance sortoit quelquesfois & mal à propos de la diuersité des mœurs, de la differente façon de viure, des contraires humeurs, & opinions dissemblables en la police, au grād malheur & ruïne de l'Eglise. Pour ce respect seulement Victor se separa des Asiatiques, & Estienne I. s'escarta loin des Eglises de Galatie. Sur ce subiect Constantius desirant perdre nostre Religion conseilloit à Liberius de se departir de la communion de S. Athanase. Par là les Orientaux quitterent l'amitié de Iules I. & de Leon: Epiphanius arriué à Constantinople, ne voulut pas communiquer avec S. Chrysostome, ores qu'il fust dans son Euesché, & dans son Eglise mesme: Et le Clergé de Rome d'aprehension & de crainte, laissa la cōmunions des Papes Sixte 3. & Anastase 2, Car ce retranchement faict ainsi

*Socrat. 4.
cap. 12.
Sofom. 7.
cap. 19.*

*Euagr. 3.
cap. 30.*

*Socrat. 6.
cap. 9.
Sofom. 8.
cap. 15.
Cap.
Anastase.
19.
destin.*

à part sans la cōuocation & interuention de l'Eglise, comme ne venant point de iurisdiction ny d'autorité sur les autres Euesques, n'estoit non plus defferé aux peres du siege Romain, enuers lesquels leurs Eglises mesmes vsoient si franchement de ce libelle de diuorce, qu'aux Pasteurs des autres Eglises. Il dependoit du soing de tous les peres, separement ou ensemblement, comme S. Cyprian l'escruiuit au Pape Estienne. De sorte que vn Euesque pensoit qu'on deust autāt respecter & rechercher son amitié, comme il deuoit aimer & tenir chere celle des autres; deuoir obtenir autant de droict & de liberté à quitter leur alliance, comme ils s'en voudroient donner à laisser la sienne, & à n'auoir plus rien de commun ny de meslé avec luy. En ceste diuision; dès que cest admirable assemblage, & les belles ligatures qui comme nerfs naturels manioient & faisoient mouuoir ceste vnté & alliance des ressorts d'vne egalité mesuree, estoient tranchez

*Cyprian.
epist. 13.
lib. 3.*

PHILIPPIQUE III.

par l'excommunication, les māmelles de l'Eglise se tarissoient contre celui qui s'estoit rendu indigne d'estre esleué & nourry de sa main : les clairs ruisseaux qui arrousent fertilement ceste terre d'Israël, laissoient flegir & secher ce tronc coupé, sans l'humecter de leurs eaux, sans luy reuerdir ny renoueller ce feuillage dont il se paroît auparauant sur leur bord. Les acqueduës de ceste Hierusalem celeste denioient le rafraichissement de leur liqueur à ce banny, comme brisez ou estoupez en sa haine : les veines de ce bras sec ne s'alloient plus remplir ny abreuer au foye : le cœur n'animoit plus ses arteres d'esprits, & tous les canaux de nourriture & de substance n'apportoient plus d'aliment à ce membre pourry, qui ne se ressentoit plus de la chaleur, amitié & vigueur de ce corps mystique. Il ne receuoit plus de lettres de ses freres, qui destournoiēt la veüe loin des siennes : Il ne voyoit plus leurs confessions, n'auoit plus de place en leurs

catalogues & registres, n'étoit point en leurs conciles, & n'attendoit plus les sacrez presens de l'Eucharistie. Toutesfois on ne mettoit iamaishors de l'Eglise celuy qui attiroit sur sa teste la rigueur de ceste censure espouventable, & la perte & priuation de tant de biës, qu'il ne se fust le premier desbandé, qu'il n'eust pris bien loin l'effor pour s'esgarer & se perdre; qu'il n'eust comme rompu & brisé les portes pour sortir d'effort hors de l'amitié de ses freres. Ceste coupure ne se faisoit qu'avec larmes & gemissemës, *Basil. 2. offic. cap. 27.* comme diët S. Basile: apres laquelle on essayoit encore de recoudre & re-
 ioindre ce membre couppe, & de re- *Cyprian. epist. 10. lib. 2.* clamer cest auolé pour se rendre & remettre dans le sein de sa mere, dont rië que sa seule endureie & desesperee obstination ne le pouuoit faire tōber. C'estoit donc de la charité & prudence de to^r les Euesques de retenir cest esgaré, & de releuer ce qu'il auoit respandu: ou de l'honneur commun de tout l'ordre de se separer de celuy en

PHILIPPIQUE III.

qui il ne restoit plus d'esperance de salut, ny d'aucune meilleure vie. Car apres que Martian⁹ Euesque d'Arles eut brôché en l'herreur de Nouatianus, S. Cyprian escriuit à Estienne 1. que l'Euesque de Lyon luy auoit dôné aduis de ce fascheux accident, & que la charge de la conduicte des Eglises obligeoit tous les Euesques d'apporter hastiuement les mains pour remedier à ce mal croissât, qu'il falloit faire des depesches par tous les Dioceses, & escrire en diligēce à toutes les Eglises de ne le receuoir plus és mysteres. A cest effect tous les Euesques d'une Prouince assistez du secours des autres plus voisines, auoient accoustumé d'accourir promptemēt & s'assembler souz l'ordre d'un Concile en aussi grād nombre qu'ils pouuoient; où apres auoir meuremēt debattu tous les chefs de l'accusation, & contrepesé les deffenses de l'innocence, ils lançoient, bien qu'à regret, le foudre d'excōmunication sur celui dont la meschante vie irritoit &

*Cyprian.
ep. 13. lib.
3.*

*Cyprian. ep.
3. lib. 1. &
epist. 19.
lib. 3.
Euseb. 7.
cap. 24.*

prouoquoit ceste iustice, qu'elle arrachoit cōme de force de leurs mains, Apres laquelle, on enuoyoit & faisoit seurement tenir aux autres Peres absents, & plus esloignez le iugemēt de ceste necessaire sectiō pour l'approuuer, la signer, & souzcrire : afin que selon les decrets de la iuste police de l'Eglise, qui doit par tout mōstrer vn visage æquable & pareil, ceux qui seroient excommuniez en vn lieu ne participassent point en l'autre, pour euitier vne inegalit   & deformit   en ce beau corps de Iesus Christ, & vne contrariet   & resistance    la verit   du S. Esprit. Ces   t les formes obseruees contre Nouatianus par le c  cile Romain & le Pape Corneli  , ainsi qu'on voit par la lettre qu'il escriuit    Fabi   *Euseb. 6. cap. 35* d'Antioche pour fortifier son iugement de l'autorit   d'un 2. Concile. C'est l'ordre de la procedure gardee *Cyprian. epi. 3. lib. 1.* c  tre basilides, & martialis; c  tre Paul *Euseb. 7. cap. 24.* Samosat  se par le Concile d'Antioche: c  tre l'impie Arrius par Alexandre son Euesque; contre Aux  ntius *Theodorit. 1. cap. 4.*

PHILIPPIQUE IIII.

Euesque de Milan, & autres de mesme estoffe. Mais cōme l'abus corrompt les institutions les plus saines, de cest honnestes vsage des soubzscriptiōs & approbations des cēsures demādees, egallement à toutes les Eglises, quelques peres Romains qui ont fait profit & tiré cōme en tiltre tout ce que la charité & humilité Chrestienne leur defferoient en la cōmunion & vnitē de l'Eglise, prindrent premierement occasion de s'aduancer pour excommunier les Euesques des autres sieges: parce qu'on leur auoit presenté quelquesfois les excommunications des autres Pasteurs pour y dōner leur seing. Cōbien que ce fust chose egallement deue & affectee à tous, que chasque Euesque peust euitter la societē de celuy dont l'erreur ou la vie auoit esté condamnēe en Concile, dont la foy ou les mœurs luy estoient desagreables ou suspectes: que le clergé mesmes de Rome eust autresfois entrepris de se retirer de la compagnie de ses Euesques, que les autres

Peres

Peres eussent rendu le retour aux Papes qui les auoient excommuniez, & eussent aussi franchement quitté leur société, comme ils auoient renoncé à la leur. Et toutesfois c'est la plus forte & plus naturelle source de l'entreprise Romaine en l'excommunication des autres sieges : Par là Victor, Iules i. Leon. Gelais, Gregoire 7. Urbain 2. & tant d'autres ont osé leuer les mains pour foudroyer les Euesques des autres Eglises. C'est la base de leurs pretentions, la couleur de leurs plus beaux tiltres és censures des autres, & les hardis & dangereux exemples trop naïuement imitez par les Bulles de Gregoire. En quoy s'il y a nullité & presumption du chef de la puissance, & de la cause agente, il y a encores plus d'iniustice & de defectuosité du costé de la matiere. Le fôdement en est si estrange, & le suiect si miserable & si nouveau, que c'est grand cas que pour estre parfaictement Chrestiens, on nous pensoit du tout faire perdre le bon-heur & repos

PHILIPPIQUE III.

du giron de l'Eglise, & nous retrancher pour iamais de la grace de Dieu d'un coup de glaiue de diuision. Ouy pour estre parfaitement Chrestiens. Car y a-il rien que Iesus Christ ait plus souuent, plus expressement, ny plus estroitement commandé apres le culte de son pere, que l'obeïssance & honneur des Princes? y a-il rien qu'il ait plus estably de la force de sa parole, ny plus cōfirmé de la vertu de son exemple? Que ses Apostres ayēt plus clairement ny plus hautement presché, en quoy tous les premiers Chrestiens ayent esté plus soigneusement esleuez & instituez en la purité de l'Eglise, ny qui les ait plus honorablement dicerné des autres sujets de l'Empire? Iesus Christ semble auoir vny & accouplé la reuerēce des Roys à celle de son pere mesme, d'un fort & inseparable lien: en ordonnant de rendre à Dieu ce qui est à Dieu, & à Cæsar ce qui est à Cæsar. Ceste con-i-onction parmy les iustes iuriconsultes, cōme entre les purs & nets Theo-

logiens importe vne entiere disposition. C'est vne double & liee cōditiō qu'il faut accomplir ric à ric, & specifiquement en l'ordonnance de ce diuin testamēt, si nous pretendōs d'heriter de la succession eternelle. L'un de ces deux commandemens n'est pas plus veritable que l'autre : ils sortent tous deux de mesme bouche, & coulent des responses certaines d'un mesme oracle. Il semble en cest endroit que Dieu ait voulu presque partager le monde avec les Princes : reseruant & retenant le Ciel à sa diuinité comme le sainct throsne, & auguste siege de sa majesté, & laissant son marchepied comme en deposit entre les mains des Lieutenans de sa puissance. Iupiter a mi party l'Empire avec Cesar. Aussi, Dieu grauant son pourtraict sur la face du monde, de mesme que Phidias auoit propremēt entaillé son visage sur le bouclier de Minerue, puis qu'il vouloit comme en la merueille de ceste statue si clabouree, qu'en la sage dispositiō &

PHILIPPIQUE III.

ordre admirable de l'Vniuers, en ce
tant riche tableau façonné & poly de
sa main, toutes les lignes & les traits
se rapportassent à luy; il ne pouuoit
leur donner icy vn centre plus cer-
tain ny plus conuenable pour sa gloi-
re, ny imprimer sa grâdeur d'un cara-
ctere plus net & mieux marquant, ou
la grauer en matiere plus noble &
plus capable, qu'é l'incisât & empraî-
gnant sur l'Estat & le visage des Roys,
qui sous son authorité sacree maniēt
& moderēt les resnes du mode. C'est
la verité que sō fils nous a tāt tesmoi-
gnée & cōfirmee. C'est la foy de tou-
te l'ancienne Eglise, esclatante & ver-
meille de son pourpre precieux & in-
nocent. Et toutesfois cest impie &
presumptueux Espagnol auoit entre-
pris de nous faire arracher & reiet-
ter de l'Eglise, parce qu'à l'imitation
de Iesus Christ mesme, en l'honneur
de ses viues images, sur les pas vene-
rables du chemin des Apostres, à la
trace du sang de tous les premiers
Chrestiens, à la claire lueur du flâbeau

de la fidelité de nos peres, & par le de-
 uoir religieux & l'estroicte obligatiō
 de nos cōsciēces, nous seruons con-
 stamment le meilleur, le plus iuste &
 plus grand prince du monde. De qui
 toutes les nations nous enuiēt la dou-
 ce subiection & le bon-heur de l'Em-
 pire; de qui l'Espagnol redoute tant
 la vertu, qu'il iuge en son ame digne
 de l'Estat de l'vniuers; de qui il craint
 sans repos la valeur, comme enuoyee
 du Ciel pour vanger tant de crimes
 dont il a iusques icy estōné le monde
 d'horreur, & diuisé les peuples de
 scandale. Mais les boute-feux Espa-
 gnols crient que nostre Roy est here-
 tique & excommunié, & qu'en le
 seruant d'une fidelité Françoisē nous
 nous embrouillōs nous mēmes dans
 les liens d'une seuerē excommunica-
 tion ! Quelle imposture ? Quelle in-
 solence ? Quelle rage & aucugle-
 ment ? Ceste parole est calomnieuse,
 & aussi faussement controuuēe que *Les Lau-*
 malicieusement aduancēe, comme *riers de*
 nous leur auons faict voir ailleurs. *Roy.*

PHILIPPIQUE III.

On ne peut dōner ces mauuais noms au Roy sans errer & faillir laschement, sans s'ahurter & s'en prendre à l'autorité de tous les peres, sans accuser leurs exemples, sans violer le repos de leur memoire. Car encores que le Roy ait esté nourry & esleué dès ses premiers ans en la Religion qu'il suit, qu'il l'ait comme succee avec le laict; il offre toutesfois de se faire instruire, & d'embrasser la foy & la doctrine qu'on luy fera recognoistre la meilleure & plus certaine par la lumiere del'Escripture, & le tesmoignage des peres, en l'assemblee d'un concile general; ou par vn graue & paisible Synode des Prelats de son Royaume. Il ne refuse ny ne differe ceste conference; ses frequentes declarations fermēt la bouche aux calomnies de ses ennemis, & donnent des preuues aussi manifestes que religieuses, de la disposition qu'il y apporte. Ce sont plustost les ennemis de son Estat qui par vne longue & sanglante guerre, par mille pratiques estrangeres, par mille nou-

uelles trauerses, & tant de sortes de difficultez & d'artifices luy en veulent couper le chemin; qui portent ceste enuie à l'Eglise, qui veulent desrober ce bon-heur à tout l'Europe, comme à nous. Durant donc sainctement, & se portant constant en ceste volonté de recercher la purité de la Religion par vne instruction plaine, & saincte, sans qu'on le recognoisse chagé, n'est-me, ny refroidy de ce iuste desir: la graue autorité de S. Augustin, & la sainte doctrine de tous les peres estoufferont, & estainderont le noir venin de ces paroles mesdisantes dans la bouche mesme de tous ces imposteurs, qui contre le respect de son sceptre, & la verité de ses saintes intentions, l'osent appeller heretique. Parce, que pour encourir & receuoir la tache de ce nom odieux, il faut que l'heresie soit formee & qualifiée par trois marques necessaires: d'erreur, de malice, & d'obstination, qui ne se peuvent rencontrer, ny auoir concurréce en la personne de nostre Prince. Puis

*August.
lib. de Veil.
cred. cap.
hereticus,
& cap. dixit
Apostolus 24.
quest. 3.*

*Alexand.
de Alex.
Tom. 2.
quest. 181.
memb. 1.
D. Thomas
1. 2. q. 1.
mas A.
quin.*

PHILIPPIQUE III.

qu'il n'est donc point hereticque, & qu'on ne l'accuse d'autre peché ny d'autre mal: puis qu'en tout le reste de sa vie on louë si hautement sa vertu comme d'un nouueau Demy-dieu enuoyé pour la restauration de cest Empire; puis qu'on admire avec tant d'estônement les merites de ses actions, & la gloire de ses hauts faicts d'armes, qu'on honore le bon-heur de sa fortune, que ses ennemis la redoutent avec tant d'effroy & de crainte; qu'il est en fin si necessaire à la reformation de l'Eglise, à la repurgation du Christianisme, au repos & assurance de toute l'Europe, Roy du premier & plus puissant Royaume; il ne peut estre sujet aux attainctes des anathemes Romains, ny à l'excommunication de quelque autre siege, dont l'integrité & lumiere de sa vie, la câdeur de ses resolutions, la prerogative de sa couronne, l'honneur & majesté de son Empire l'affranchissent. Dont tât de particuliers priuileges, & singulieres dignitez de l'Estat de France le deliurent, & mettent

en

en seurté loin & au dessus de l'enuie. Les coups de ces sections spirituelles trop mortelles, ne peuuent entamer ny blesser les parties nobles & vitales de ces corps mistiques, sans la corruption & dissolution entiere de tout le subiect. Mais quand toutes ces mauuaises qualitez d'heresie, & d'excommunication si esloignees de la bonté & grandeur du Roy, se pourroient assembler, & prendre pied sur le front de quelque Prince: ie demande quelle alliance & correspondance, quelles relations, & rapports peuuent trouuer les erreurs & censures avec l'obeissance des peuples? Que peut auoir icy de commun, & de meslé le Royaume du Ciel avec celuy de la terre, que Iesus Christ a separez & escartez de plus longues bornes & d'espaces plus esloignez que ceux mesmes que les yeux & l'esprit peuuent conceuoir és distantes places qui leur ont esté assignees en l'establissement du monde? Desbaucher les esprits des fideles enfans de l'Eglise par ces ruses

PHILIPPIQUE. IIII.

d'ambition, les ietter & les perdre en ces subtils destours de perfidie; repaistre les troupeaux de Iesus Christ de ces herbes venimeuses, les enfler de ces pastures corrompues & violentes, nourrir les esprits des hōmes du poison mortel de ces infidelitez, qu'est-ce autre chose que vouloir perdre l'Eglise, & ruiner la bergerie de Dieu? Ces artifices ne sont employez par nostre ennemy, quoy qu'il les desguise & les farde, que pour renuerfer la Religion, affoiblir la foy de l'Euangile, abattre l'autorité des peres, fouler les saints decretz & purs exemples des Eglises, diffamer la noble & loyale memoire des François, & tenter de changemēt la foy de tous les peuples, afin de parfaire ses auares desseins, accroistre & agrandir son Estat des ruines du Royaume de Dieu, & des Empires de la terre. C'est bien plustost heresie, ô peuples, de vous prescher ceste infidelité, si ennemie & si contraire à la doctrine de toute l'Eglise. C'est illusion, & magie de fasciner vos yeux,

& enchanter vos esprits des charmes deceueurs de tant de trompeuses paroles : c'est sedition ouuerte de troubler, & dissiper vn si puissant Royaume, des glaiues de diuision, coniurez & tirez contre la paix de l'Eglise mesme. C'est bien, lustost vous ietter dās les liens des excōmunications qu'on pensoit auoir apprestez & tēdus contre nous, & vous precipiter miserablement de la grace de l'Eglise, en vous faisant si auueuglement chopper contre ces pierres d'infidelité, & de scandale. Car que peut-on apporter de iuste, d'apparent, ou de considerable? que peut-on opposer d'assez fort & vigoureux, pour rompre & faire tarir le fleuue eternal de ceste sainte doctrine d'obeissance, qui d'vn cours si pur, & si egal a coulé constamment de la bouche de Iesus Christ iusques au siecle de noz peres? Quels orages ne le feroient plustost grossir qu'affoiblir, si sa purité ne reiectoit à bord toutes ces ordures, & ne pouuoit admettre accroissement & alluuiou de

PHILIPPIQUE III.

torrents si boüeux & si sales ? Quelles
 calomnies assez colorees peuuēt feindre
 & parer icy ces esprits capiteux ,
 pour corrompre & dementir les paroles
 veritables de la diuine parole
 mesme ? Quel autan Espagnol peut
 esteindre le flambeau de ceste foy ?
 Il n'y a esponge si pressante qui puisse
 effacer les caracteres , & fortes traces
 de ceste belle obeïssance , que Iesus
 Christ a si viuement imprimee au frōt
 de son Eglise , par les traiçts eternels ,
 & le burin ardent de son esprit. Il n'y a
 point d'artifice ny d'inuention assez
 subtile pour falsifier ceste verité si biē
 empreinte, que Iesus Christ a ouuer-
 tement & publiquement confirmee
 par tous les actes & moments de sa
 vie, qu'on voit si nettement escrete &
 marquee de son sang , signee si sain-
 tement de celuy deses Apostres &
 des premiers Chrestiens, si seurement
 cachetee & scellee de la mort de tous
 les Peres des premieres Eglises. Nuls
 ombrages ne pourrōt iamais obscur-
 cir ces lumieres si claires : nulle nuee

tant soit elle espoissie ne pourra cou-
 urir & voiler tant d'estoilles si brillâ-
 res, & nous eclipser ce Soleil de verité
 si esclairant. Car de quelle assurance
 oseroit-on dementir l'Euangile, les 1. Petr.
 epistres de S. Pierre, & de S. Paul, & cap. 2.
 de tous les autres escholiers de Iesus epist. Paul.
 Christ? de quel effort pourroit on ré- ad Tit.
 uerfer les preceptes si tenants de tous cap. 3. &
 les Apostres? de quel crime voudroit epist. ad
 on accuser la memoire de leurs actes, Roman.
 tacher & offenser l'honneur de tant cap. 13.
 de saints Eueques, qui ont si longue-
 ment retenu les Chrestiens souz l'au-
 thorité de ceste iuste subiection? sans
 choix, sans discretion, sans difference
 ny distinctiō de la personne des prin-
 ces, ou de la qualité de leur Religion?
 Ils ont autresfois seruy fidelement à
 des Roys Ethniques & Athees, à des
 vrais monstres du genre humain, aux
 fleaux violens de la Religion, aux en-
 nemis coniurez de nostre foy, à la
 premiere semence de l'antechrist, sans
 difficulté ny contrainte; & esclairant
 ceste vaine difficulté de viue lumie.

PHILIPPIQUE IIII.

re de leurs escrits & de leurs exēples,
ont leuē & faict esuanoüir tous ces
scrupules & ombrages des esprits plus
apprehensifs & moins cōfirmez. Que
s'il reste encorēs quelque naturel sen-
timent à des hommes des bordez de
licence qui sement & plantent si har-
diment l'infidelité; s'ils n'ont du tout
donné congé au S. Esprit, s'ils gardēt
encores quelque disposition à la co-
gnoissance du bien, s'ils retiennent
encore quelque apparence & mon-
stre de Religion, s'ils ont quelque le-
ger ombrage de la creance & respect
qu'ils ont porté à l'autorité des Pe-
res, si leurs sacrez monuments & es-
crits veritables peuuent trouuer quel-
que foy entre ces nouveaux Theolo-
giens, puis qu'ils ne veulent receuoir
la verité de la main de ceux qui la
leur annoncēt de parole & d'exēple,
qu'ils ne reiectēt point au moins l'in-
corruptible tesmoignage des morts;
qu'ils s'instruisent dans les liures
& labeurs des peres, & ne ferment
point les yeux à la venuē de ce iour.

Ils verront tout à clair leur trompe-
 rie, & leur erreur : & recognoistront
 que malicieusement ils abusent, &
 perdēt les peuples d'ignorāce. Quels
 tesmoins produirons nous les pre-
 miers ? Laisant à part les Apologies
 & professions de fidelité presentees
 aux Empereurs Romains par Aristi-
 de, Quadratus, Meliton, Lucian Pre-
 stre d'Antioche, Apollinaris & autres,
 pour toutes les premieres Eglises : Po-
 licarpe fit ceste publique declaration
 de la foy des Chrestiens en la face de
 la iustice Romaine ; qu'il s'en falloit
 tant qu'ils eussent quelque dessein, ou
 desir caché de troubler l'ordre de l'E-
 stat des Roys pour la diuersité de la
 Religion, qu'au contraire ils estoient
 façonnez & dressez soigneusement
 par l'Eglise, à ployer humblemēt souz
 le ioug de l'eternelle autorité des
 princes, quelque pesant & outrageux
 qu'il fust, comme alaiētez d'enfance
 par ces humbles māmelles, & nourris
 du laiēt innocent de ceste obeïssance
 naturelle. S. Ignace anima & rechauf-

Orosius.

Hieron.

in catal.

scrip.

Euseb.

Eutrop.

Euseb. 4.

cap. 14.

PHILIPPIQUE III.

*Iustin.
Apol. 2.*

*Tertul.
in Apol. &
ad Scapol.*

fa par lettres expressees le peuple d'Antioche, à embrasser le seruice de l'Empereur : Iustin adue tit to⁹ les princes qu'ils n'attendissent, & n'esperassent iamais que par l'effort de tât de tourmens nouueaux les Chrestiens sacrifiasent à leurs images, flechissent le genouil à la veuë de leurs Idoles, ou parfumassent d'encens & d'odeurs leurs autels profanes: qu'ils adoroieût Dieu deuotement, mais qu'en tout le reste de leurs actions ils rendoient plaine & entiere subiection à l'Empire. Tertullian n'esleue que Dieu seul sur la teste des Roys, les honore & respecte pour les plus grands & plus apparés de toutes autres puissances, cōme inferieurs & moindres que Dieu seul: de qui la parole veritable lie icy les consciences les plus coulantes & plus fuyardes, & estraint les ames les plus farouches & plus errâtes de mille nœuds d'obeïssâce. C'est la doctrine que S. Cyprian a embrassee par ses escripts, & confirmee par les derniers souspirs de sa vie. Pour cela Origene
bien

bien que Dieu l'eust faict naistre souz vn sceptre payen, n'apporte ny difference ny distinction en la reuerence des Princes : parce que quels qu'ils soiēt, pour si diuers & si estrāges qu'ō les imagine, la seule prudence & main de Dieu les a rangez & colloquez sur les peuples, à quelque grand dessein caché & couuert à la foiblesse des entendemēs des hōmes: Et S. Basile admirant la celeste origine de ces glorieuses puissāces, n'en permet la destitution qu'à Dieu seul, non plus que la creation. Ces peres sont-ils vniques, ou peu suiuiuz en ceste creance? Sont-ce questions indifferentes, fantasies particulieres, discours, essays, & exercices de la beauté, viuacité ou curiosité des esprits? toute l'Eglise ne cōspire elle pas en ceste doctrine vniforme, & pareille? tous ces diuins oracles n'ont-ils pas esté poussez & animez de la vertu d'un mesme esprit, agitez & portez de mesme mouuemēt, & d'une inspiratiō semblable? S. Ambroise confesse fort souuēt que son debvoir

Origen.
in Epist. ad
Roman. &
hamil. 4. in
lib. I. indic.

Basil. in
Psalm. 32.

Ambros.
contra Au
xent. & ep.
33. ad
Marcellin.
Sorum. Et
ad cap.
5. Luc.

PHILIPPIQUE III.

& sa conscience l'obligeant à penser, & pourvoir soigneusement à la santé & cōseruation du Prince: à qui il quicte le maniement & exercice de toutes choses, à qui il cede & abandonne la moderation absoluë & indeffinie des biens & des corps, sans retenir rien pour la part de Dieu, & le lot de l'Eglise, que les Eglises. Telle est la patiente humilité de S. Hilaire, la sage resolution de S. Hierosme, & la constante foy de Gregoire de Nazianze. Mais Epiphanius contemplant d'vne ame esleuee l'ordre, le cours, & la suite necessaire des Empires, estonné de la relation si conforme & mesuree qu'ils ont avec l'estat du Ciel, vaincu des proportions admirables qui rapportent tant proprement le gouuernement des Roys à la monarchie de Dieu, cōclud prudemment que ce sont purs ouurages de sa sagesse comme de sa puissance: & recognoist que comme la seule force leur a peu ceindre les espees, son seul courroux les leur peut faire tomber des poings. Si S. Augu-

*Epiphan.
lib. I Tom.
3. hares.
40.*

stin est admirable en la viuacité , & belle poincte de tous ses discours , il est inimitable sur ce subiect. Lors que quelqu'un demâdera, dit-il, qu'est-ce qu'il a affaire du Roy; il est tres-aisé de rabatre & rabaisser ceste presumption hardie, & orgueilleuse, en respondant seulement, qu'a on affaire de la terre ? Car si nous desirons de retenir nos corps, les nourrir de viâdes temporelles, les accroistre & fortifier des fruiets, & de tant de sortes d'aliments que la terre produict : si noz corps mesmes sont composez & bastis de terre, il faut croire que nous tenons la vie , & tout ce qui la soustient, & conserue de l'adueu , & puïssance des Roys que Dieu a establis modérateurs de la terre. Puis estendant le vol de ce fort & vigoureux esprit sur la differente cōdition, & inegale vie des Princes, s'arrestant sur les desreglees fantasies de leurs contraires creances, il se collige & resoult tout à coup, en confessant humblement qu'estant chose asseuree que Caligula , Iulian

*Augustin.
propos. 72.
ex epist. ad
Roman.*

PHILIPPIQUE III.

*Augustin.
de ciuita.
Dei.*

L'Apostat, & autres apostumes & pestes de l'Empire, ont esté donnez de Dieu, tout ainsi qu'Auguste, Cōstantin, & autres delices du gēre humain, quoy qu'à diuerses fins: que l'obeïssance doit estre egale & semblable enuers les vns comme enuers les autres, sans contēpler ny mesurer ces fleuues qu'à leur source, sans s'arrester aux sinuositez & plis obliques de ces Meā-dres, sans s'aheurter à leurs destours entrecoupez d'erreur, & de ruïne. Il s'estoit confirmé en ceste Chrestienne propositiō par les tesmoignages, & exemples des Apostres. Sur l'autorité eternelle desquels Optatus fonde & appuye ceste grande parole: qu'il faut porter humblement le ioug des Princes, quoy que superstitieux, Gentils & Ethniques, sans contreroller plus auant les conseils du cabinet de Dieu. Pourquoi? parce que c'est Iesus Christ mesmes, diēt Salonijs, qui loge & met le sceptre en main aux impies & aux Athees; qui les honore du gouuernail & conduicte du monde;

*Optat.
lib. 3. ad-
uers. Par-
men.*

*Salonijs,
in explic.
Salomon.*

qui leur permet, & preste les reſnes de
ceſt Empire ſur nous. Souz leſquelles
conſiderations Chreſtiennes Beda *Beda lib.*
humiliant doucemēt ſon eſprit, com- *4. in Sa-*
mande de continuelles prieres pour *muel. cap.*
la longue vie des Princes infideles: *4.*
Theophilacte ne plante nuls termes *Theophil.*
à l'obeiſſance, tāt que l'Eſtat du mon- *in Mat th.*
de & la cōdition des choſes exterieu- *cap. 22.*
res ſe peut allonger & eſtendre : An- *Anſelm. in*
ſelme ne peut imaginer de ſubieēt ba- *10. cap.*
ſtant & legitime pour prendre les ar- *epiſt. ad*
mes cōtre ces ſouuerains demydieux: *Roman.*
Saint Bonauenture comprend tou- *Bonauent.*
te la fidelité en vn vers borné & limi- *in Centi-*
té de cinq mots ; Et S. Thomas faiēt *loqu.*
naiſtre vn horrible & eſpouuentable *D. Tho-*
peché de la pourriture & laideur de la *mas ſecun-*
deſobeiſſance. C'eſt la foy d'un grand *da ſecunda*
nombre de peres, aſſemblez és Cōci- *queſt. 105.*
les d'Antioche, Sardicque, Seleucie,
Ariminy, & autres conuoquez par des
Princes infideles. Ie ne croy pas que
nos aduerſaires reprochēt ici, ny reiet-
tent de ceſte enqueſte le teſmoignage
des Papes. Que ſi leur autorité trou-

PHILIPPOUE III.

ue quelque credit & faueur aupres des hommes qui desracinent si violement toute verité, pour plâter vn sanglant mensonge; qui peruertissent & renuersent l'ordre de toutes choses, pour establir leur ambition; ils doiuent recognoistre que Calixte 1. aduertit autresfois par vne lettre tous les Euesques de Gaule de chasser de l'Eglise les factieux & remueurs d'Estat; que S. Gregoire empescha & arresta sagement les peuples de son aage, de se mutiner ny esleuer contre la Majesté des Empires: Que les Legats de Iean 12. en plain Concile tenu à Althain ville de Retie, declarerent l'Anatheme aux subiects rebelles des Princes; que ce Gregoire 7. perturbateur du repos des peuples, aduoüa ceste obeïssance és restrictions & modifications apportees à la rude seuerité de ses censures: & que Boniface 8. bien que grand ennemy des Roys, refusa longuement d'oindre & couronner Albert d'Autriche, pour auoir porté les armes contre Adolphe son maistre.

*Tom. 1.
Concil.*

*Lib. 7. in-
dict. 1. cap.
3.*

*Cap. quoniam
1. q. 11.
3.*

Naucler.

Passerons nous sans regarder nostre Gaule? la desdaignerons nous bien tant que de ne donner point icy de place à la foy? Certes comme elle a tousiours fort honoré & cōfirmé la fidelité par toutes ses cōstantes actiōs, elle ne l'a pas moins vantée de parole; Et nos graues pasteurs ont icy desnoué, & rompu de la force de l'esprit, & parole de Dieu les plus tenans scrupules des ignorantes, & foibles ames.

Pierre Abbé de Clugny monstre que les Roys sont appelez Dieux, parce qu'ils sont purement establis de la sainte main de Dieu, promenez d'une celeste & immuable ordonnance.

*Petr. Clu-
niac. lib. 2.
contra Iu-
daeos.*

Pierre de Sarisbury, que quelques vns croient auoir presidé à l'Eglise de Chartres, pare & orne les diademes des Roys de l'honorable inscriptiō, & nom magestueux de Dieux corporels, pour la reuerēce qu'on leur doit rendre apres l'honneur qui nous oblige à Dieu: & soustient qu'il leur faut obeir encore qu'ils soient ennemis de Dieu

*Lib. 7. de
Nug. cu-
rial. cap. 7.*

mesme. Pierre de Bloys ne peut voir

*Petr. Ble-
sens. epist. 8.*

PHILIPPIQUE IIII.

que l'erreur, & le mal de leur religion,
ou la corruption de leurs mœurs e-
steignent ou infectent l'obeïssance. Et

D. Bern.

epist. 170.

ce bon pere S. Bernard, qui en son
tēps auoit veu l'air si entrouuert d'es-
clairs, & la terre si troublee & esbran-
lee de tant de coups de foudres Ro-
mains : qui auoit veu tant de traicts
d'excommunication decochez sur la
grâdeur de France, qui auoit veu ten-
ter & assaillir la fidelité des subiects
par cest artifice, lier & enlasser le Roy-
aume, dans les philtres d'un interdict,
tranche d'une admirable assurance
ce mot tout ardent de la charité du S.
Esprit, & tout animé de la fidelité Frā-
çoise. Que quand tout le monde en-
semble coniureroit, & se banderoit
contre luy, pour le cōtraindre de for-
ce à dresser quelque entreprise con-
tre l'Estat des Princes, ou conspirer
quelque chose contre leur repos: qu'il
craindroit tousiours Dieu fort reli-
gieusement, & n'oseroit loger en son
ame vne pensèe qui allast à l'offense
des Princes. Comme c'est vne des ra-

res &

res & esmerueillables qualitez de la verité, de se trouuer tousiours pareille, soit qu'on la diuise ou qu'on l'assemble; toutes les Eglises de Gaule assemblees & vnies, ont confirmé & beny saintement ces belles & fideles resolutions par les decretz sacrez de leurs Conciles. Le Concile d'Agde *Tom. 1. Conc.* ordonne & vouë des humbles prieres à Dieu pour la santé du Prince qui l'auoit commandé; que chacun sçait auoir esté grand partisan de la secte Arrienne. Les Conciles d'Orleans & autres sont marquez bien auant au coin de ceste fidelité : le Concile d'Arles conuocqué par Charlemagne & son fils, decerne des supplications publiques pour le salut de ses Princes, & veut qu'on celebre des Messes pour la prosperité de leurs couronnes. Le Concile de Tours assemblé souz mesmes auspices, cōfirme ceste religieuse foy: & le Concile de Rheims reluit & esclate admirablement de la gloire de ceste obeïssance Frāçoise. Mais ceste si vniuerselle & si accordāte doctrine,

Tom. 2. Conc.

Concil. Turonens. 3. cap. 1. Tom. 3. Conc.

PHILIPPIQUE IIII.

n'a-elle point passé le bord des leures?
 Le cœur a-ilicy dementy la langue?
 N'a-ce esté que legere peinture sei-
 chee sur l'escorce, ou vn fart d'ypocri-
 fie detrampé dans la crainte des sup-
 plices? Les Chrestiens se sont-ils parez
 seulement par dehors de ceste obeis-
 sance cōme pour contenance & pour
 mine : ne l'estallant que pour la mon-
 strer au iour à la lumiere & à la veüe
 des hommes, cōme vne parade publi-
 que? Leurs ames n'en ont-elles point
 eu de sentiment, cōme si la seule force
 les auoit plustost rangees & ployees à
 ce deuoir, que la raison, la Religion &
 la conscience? Le cours certain & le
 fidele exercice de toute l'Eglise, ont
 déclaré par des effects irreprochables
 la constante verité de ces paroles
 Chrestiennes, cōfirmées par des hum-
 bles, & fidelles actions de tous les or-
 dres des hommes, en toutes les par-
 ties de la terre. Car si on veut voir des
 Euesques & des Peres qui ont seruy
 loyaument des Princes Etniques, he-
 retiques, apostats, & relaps; on sçait

combien de Papes, comme Cornelius, & Fabianus on souffert librement le martyre sous les predecesseurs & ancestres de Constantin en l'Empire; sans concevoir vne pensee de reuolte, sans nous laisser vn seul trait de mauuais exemple: combien d'autres ont duré constamment iusques à la mort en l'obeissance & seruice de ses successeurs, la plus-part notez de toutes les plus meschantes, & plus hideuses marques qui peuuent obscurcir, noircir & tacher le lustre de la Religion, & pieté des Princes. Que s'il faut ioindre à la sainte memoire de tant de bons Papes, le deuoir des peres des autres Eglises, & l'ancienne fidelité de tous les premiers Chrestiens, on trouuera qu'encores qu'ils fussent chafsez, battus, persecutez, emprisonnez, bourrellez, & bruslez à tas comme busches; que pour ceste occasion comme par reproche, d'vn trait d'impie mocquerie on les appellast fagots de sarment; qu'encores que toute la terre fust diuersement effroyable de feux,

PHILIPPIQUE III.

de flammes, de carnage, de corps morts, de cendres empourprees, d'eschaffaux sanglans tous teincts & regorgeans de sang Chrestien ; que l'air gemist & fremist sans cesse de tant de pleurs & gémissemens, & des petilemens de tant de flammes ; qu'encore que le Ciel se fendist & s'ouvrist de pitié aux attaintes de tant de cris violans, aux plaintes languissantes de tant d'hômes mourans, dont les ames encores toutes rouges de ce combat de patience forçoient la diuine iustice à leur vengeance ; qu'on ne vit, & n'ouyt par tout le monde que l'horreur de mille morts ; que les Chrestiens haïs, mesprisez, & courus cōme bestes sauuages fussēt exposés à la haine & chasse publicque, cōme la proye & curee ordinaire des bourreaux : qu'on ne vit autre chose es carrefours & places publiques qu'affiches, Edits, proscriptions, & publications pour abolir le nom Chrestien : Toutesfois ceste diuersité horrible & monstreuse de tāt de supplices ne leur fit rien per-

de ny relascher de la fidelité qu'ils deuoiēt à leurs Princes, non plus que de la foy qu'ils auoient iuree à Dieu, en tefmoignage desquelles ils s'offroient tous les iours à luy comme hosties pures & innocentes. Rete-
nant fermemēt des liens de leur con-
stance tout le reste du troupeau de
l'Eglise dans le cerne de ceste pieté
& Religion, & dans les bornes de ce-
ste fidele obeissance. On recognoi-
stra que l'effroy de tant de buschers
ardans, les estraintes de tant de ge-
hennes, les pointes de tant de nouuel-
les douleurs, l'aigreur & sentiment de
tant de morts, les curieuses inuen-
tions de tant de tourmens, ny les in-
humaines & desnaturees recherches
de tant de seueres supplices ne peu-
rent iamais tirer de la bouche des
Chrestiens vne parole fascheuse, ou
vn hocquet de despit; ne peurent ia-
mais arracher de leur cœur le moin-
dre trait de desobeissance. Ils en es-
preignoient plustost le sang & la vie,
en arrachoint plustost les ames mes-

PHILIPPIQUE III.

mes, que de faire sortir de leur constance vn mouuement de reuence, vn signe d'infidelité, vn geste leger de desdain, ou vn simple mot de mesdisâce cōtre la iustice trop seuerẽ du Magistrat, cōtre la sãté du Prince, cōtre l'hōneur de sa subiectiō, & le bonheur de sa fortune. Mais apres que les Emperẽurs eurent donnẽ leurs noms sous les blancs estendars de l'Eglise, s'ils ont chãcelẽ en la creance qu'elle leur auroit inspiree de naissance, s'ils ont effacẽ les caractères de la Religiō qu'elle auoit empraint & imprimẽ en leurs ames du doigt ardent du S. Esprit, s'ils ont arrachẽ les marques sacrees qui les faisoient recognoistre pour ses enfans legitimes, s'ils ont secouẽ son ioug en se rebellant contre elle, s'ils luy ont fait vne guerre ouuerte; pour cela leur a-elle manquẽ de foy? A-elle imitẽ leurs exemples de desloyautẽ & de desobeissãce? A qui seruoient Liberius, Felix, & tant d'autres qu'à Constantius? La plus-part des plus grãds & plus saincts person-

Socrat.

Theodorit.

29. cap. 16

Et 17.

Sosom.

nages de l'Eglise ne se rencontrerēt ils point sous le regne de ce Prince heretique, qui d'un seul arrest fit chasser & bannir en la Libie 90. Euesques Catholiques, pour donner leurs sieges aux Arriés de sa superstition? Cependant on n'ouit iamais dire qu'un seul de tous les pasteurs de son Empire s'oubliaſt tant que de luy refuser l'honneur, & le debuoir de sa foy & subiection; que tous les Euesques ne vinſſent de tous les coings de la terre au plus leger de ses commandemens, & sur ses premieres lettres, pour s'offrir à ses pieds, & veoir dequoy ils le pouuoient seruir honneſtement. Ils ne faillirent iamais de se trouuer és Cō-

ciles qu'il conuocquoit, bien qu'ils preuiſſent & recogneusſent clairemēt que son deſſeing ne butoit en toutes ces assemblees, qu'à eſteindre & abolir l'eternelle confeſſion de Nice. Il recueillit 250. Euesques au Concile de Sardicque; il en attira 300. à Milā; 150. à Seleucie, 400. à Ariminy, & ainſi és autres Synodes, cōme celuy

Theodorit.

2. cap. 7.

Idem 2.

cap. 15.

Soſom. 4.

cap. 8.

Soſom. 4.

c. 21. & 22.

Theod. cap.

18. & 19.

Soſom. 4.

cap. 16. 17.

& 18.

PHILIPPIQUE III.

de Hierusalem, qui ordonna des prieres publiques pour sa santé, & longue vie. l'en diray autant du Concile de Sirimie, dont ces peres fideles n'osèrent iamais despartir, quoy que la longue absence & fascheuse demeure, quoy que la rude saison de l'hyuer approchant, & la pressante faim de leurs troupeaux qu'ils auoient esté contrainsts d'abâdôner à demy à la gueule des loups heretiques, les hastast de s'en retourner; sans que premierement ils eussent prins humblement congé de leur Prince, sans auoir enuoyé deuers luy la legation de 20. Euesques, pour l'obtenir; afin, cōme ils disoient par leur creance, d'aller plus librement prier Dieu pour sa prosperité en pleine assemblee de leurs Eglises. Telle estoit la modestie, loyauté, & obcissance de tous les anciens Euesques & Pasteurs qui se trouuerēt souz l'Empire de ce Prince. Entre lesquels reluisoient & brilloient comme estoilles viues, & astres esclatants de nostre Religion, S. Athanase, Paul de Constantinople

*Sosom. 4.
cap. 18.*

stantinople, Asclepas, S. Hilaire de *Socrat. lib.*
 Poiitiers, Eusebe, Emisene, Eusebe de *2. & 3.*
 Vercel, Denis d'Albe, Paulin Metro- *Theodor.*
 politain des Gaules, Ose de Cordube *lib. 2.*
 & vne infinité d'autres de mesme sain- *Sofom. 3.*
 cteté & doctrine qui nous ont tous *& 4.*
 laissë vne memoire honorable, & vn
 eternal exemple de leur fidelité com-
 me de leur Religion. Il s'en faut tant
 que ces peres les plus ardents en la
 foy, ces tiges vigoureux de nostre Re-
 ligion, ces arcs-boutâs de la vertu de
 l'Eglise, ces lumieres estincelantes de
 ce siecle si nubileux, troublassent de
 quelque nuage le repos de l'Estat
 souz ombre de la Religion: que ces
 braues & genereux Athletes qui des-
 cendoient tous les iours sur l'arene
 pour combattre & surmonter l'here-
 sie de Constantius, fissent quelque ef-
 fort de resistance contre son Empire,
 refusassent en tout le reste qui ne tou-
 choit point à la Religion de ployer
 humblement souz son sceptre, ou fis-
 sent quelque scrupule de viure volon-
 tairement en son obeïssance, qu'au

PHILIPPIQUE III.

contraire Athanase, Paulus, & Asclepas chassiez rigoureusement par ses edicts hors de leurs sieges, le prierent mille fois les yeux mouillez de larmes de leur rendre leurs charges, & leur restituer la conduicte de leurs troupeaux; supplierent l'Empereur Constans d'en escrire de chaleur à son frere, & cuiderent sans y penser brouiller, & mettre mal ces deux freres, sur le sujet de leur retablissement. Le Pape Liberius mesme se rendit intercesseur pour eux, & le porteur de toutes leurs humbles requestes. Qui en fin ayāt esté bāny luy-mesme, fit si peu de difficulté au retour de son exil, pour lequel il souspira si ardāment, d'aller encores reprendre l'Euesché de Rome; que plustost que de la quitter, il aima mieux contre l'ordre du Concile de Nice, y tenir communement le siege avec Felix 2. promu & créé par Constantius en son absence. Ce qu'il n'eust iamais entrepris, si le service de ce Prince eust tant soit peu entamé & bleśsé son ame, ou effleuré

Sofom. 3.

cap. 9.

Socrat. 2.

cap. 18.

Theod. 2.

cap. 9.

Theod. 2.

cap. 16.

Sofom. 4.

cap. 14.

legerement sa conscience ; s'il n'eust esté porté d'un violent desir de tra-
 uaitter mieux que iamais dans le cháp
 de l'Eglise, nonobstât l'iuraye, les rô-
 ces & les poignantes espines que ce
 Prince opposoit sâs fin à sa nette cul-
 ture. Quoy souz Iuliâ l'Apostat? Voi-
 cy encore Athanase, S. Basile le grâd,
 Gregoire de Nazianze, & un grand
 nombre d'autres Saincts qui escriuēt
 sans cesse ; & tendent bien tous les
 nerfs de la vertu de leur doctrine,
 pour abattre & réuerfer l'impieté de
 ce sçauât Empereur, qui pensoit par la
 priuation, & interdiction des bonnes
 lettres, ruïner, & faire esuanouïr le
 christianisme, & l'enterrer pour iamais
 dans l'ignorance. Mais pour cela ils
 ne differerent point de le recognoi-
 stre, de le receuoir & embrasser pour
 Prince legitime, d'adorer humblemēt
 son pourpre, comme les autres sub-
 jets ; & ne se desmeurent ny esbranle-
 rent iamais des premiers pas de leur
 iuste seruice, qu'ils luy conseruerent
 & rendirent toute sa vie, bien entier

Socrat. lib.

4.

Theodorit.

3.

Sozom. 5.

PHILIPPIQUE III.

*Sofom. 5.
cap. 4.*

& fidele. Titus Euesque de Bostre luy offrit par vn liure exprez la subiection & reuerence de toute son Eglise entiere. On vit ainsi sainte, & inuiolee ceste obeïssance Chrestienne

Socrat. 4.

Theod. 4.

Sofom. 6.

souz l'Empire de Valens, cruel heretique & relaps. S. Basile, S. Athanasie, Gregoire Nazianze, Gregoire Nicense, Damasus, S. Ambroise, Flavian, Pierre Alexandrin, Diodorus, Acatius, Amphilocheus, Didimus, & Iulian flambeaux lumineux de l'Eglise, dont la vertu & doctrine faisoient reluire & esclater son siecle d'honneur, ne luy manquerent iamais de fidelite ny de deuoir : quelques iniures qu'ils eussent receues de la superstition & rigueur, quelques sanglantes playes qu'en eust

Theodorit.

4. cap. 17.

rapporté l'Eglise. S. Basile l'admit, & recueillit honorablement au sacraire plus auguste, & plus religieux lieu du temple, consacré pour les Euesques. Quatre vingts hommes d'Eglise recommandables de sainteté, luy presenterent par requeste vne publique obeïssance: Ce saint homme Aphraa-

tes interrogé par luy de cholere, ou *Theodorit.*
 est-ce que la vieillesse le portoit si le- *4. cap. 24.*
 gerement hors de sa celule monasti-
 que, luy fist vne respôse Chrestienne;
 qu'il alloit ainsi de courage faire prie-
 re à Dieu, pour le bon-heur de sa san-
 té, & la felicité de son sceptre. Et bien
 que ce Prince violent dechassast & fit
 deporter à grandes batellees les Eues-
 ques Orthodoxes, en l'exil rigoureux
 & sauuage des terres estrangeres les
 plus escartees, ces peres sans murmu-
 rer contre ceste domination violente,
 le solícitoient & pressoient importu-
 nemēt de leur retour, pour acheuer &
 finir leurs iours en son seruice, dans le
 sein-affligé de leurs Eglises. Hé quelle
 Religiō asseuree ny certaine vit-on ia-
 mais en Valétinian 2. capable de tou-
 tes erreurs, comme vn Cameleon de
 toutes sortes de couleurs? qui retom- *Theodor.*
 ba trois fois en heresie, qui laissoit *5. cap. 13.*
 gouuerner & regner sa mere, opinia-
 stre & obstinee Arrienne! Toutesfois *Sosom. 6.*
 les Papes, avec vn long ordre de tou- *7.*
 tes sortes de peres l'honorèrent con-

PHILIPPIQUE IIII

*Ambros.
ep. 33. ad
Marcellin.
soror.*

stantement, sans rien changer ny re-
muer en son Estat. Lors mesme qu'en-
nemy declaré des Catholicques, il
voulut arracher de force les Eglises à
S. Ambroise, pour les profaner d'he-
resie, pour les dedier & vouer à l'insol-
lence de ses bizarres superstitions : ce
pere qui nes'estõna iamais de la mon-
stre de toute la grandeur & seuerité
de l'Empire, ne se reuencha que de
prieres. Nous ne combattons point,
dict-il, Auguste, nos supplications &
requestes ne s'appuyent que de lar-
mes. Si vostre majesté en veut à mon
corps, ie l'oppose librement aux tour-
mens, si elle demande ma vie, ie l'ap-
porte constamment au deuant des es-
pees: Ie n'embrasseray point les autels
d'une main tremblante, pour me sau-
uer souz le respect de leur azyle. Ce
n'est point la mort que ie crains, ce
n'est point ma vie que ie veux deffen-
dre, ie n'entens de cõseruer pour tout
bien que l'asseurance & chasteté im-
pollue des palais de Dieu, & des Egli-
ses. Il faudroit icy des longues annal-

les pour rapporter la longue fidelité
 sainctement representee à vne infinité
 de Princes Romains, tous tachez &
 diffamez de monstreuses heresies.
 Valentinian 3. par edict public con-
 firma l'erreur d'Eutichez : Leon 1. & *Euagr.*
 Zenon combati-rēt la foy de Chalce-
 done: Basilisque tascha de l'abolir par *Idem. 3.*
 edict public, & lettres circulaires. Et *cap. 4.*
 toutesfois iamais Prelat de leur Em-
 pire ne retira le pied hors des termes *Platin. in*
 de l'obeissance, & les Papes mesmes *Simplic.*
 les seruirent avec respect. Anastase *Euagr. 3.*
 fut Manicheen, & Eutichien, adora *cap. 30. &*
 vne quaternité, tomba en trois di- *31.*
 uerses heresies, print les auspices de *Paul Dia-*
 l'Empire par le pariure & l'industrieu- *con.in.*
 se feincte d'une pure Religion: mais
 encores qu'il eust violé le sermēt pro-
 testé & iuré si solemnellement à Dieu
 en la face de son Eglise, qu'il eust fauf-
 sé sa promesse escrite, & confirmee de
 l'autorité du sein Royal, enregistree
 dans les sainctes archiues; iamais vn
 seul Prelat de tout ce reste de l'Estat
 Romain ne luy rompit sa foy, ny

PHILIPPIQUE III.

Euzg.

*Platin. in
Hormisd.
Iohan. 2.*

*Agapi
1.*

*Euzg.
4. cap. 38.
E/ 39.
Leonar.*

ne luy desnia sa subiection, combien qu'ils luy remonstrassent souuent ses fautes. Les Archeuesques de quatre des principales Eglises luy obeirent fort religieusement, comme Euphemius de Constantinople, Flavianus d'Antioche, Helie de Hierusalem, & Iean d'Alexandrie. Car les Papes de son tēps, encore qu'ils luy escriussent avec tout l'honneur & les anciennes ceremonies de l'Empire, rendoient dans la ville de Rome occupee par les Gots, vne obeissance fort cōstante à Theodoric Arrien; manioient les plus importantes affaires de son estat, & ne tenoient rien à plus grande gloire apres l'honneur de Dieu, que le seruice d'un si bon Prince. Je lairray donc les autres Empereurs tombez & precipitez de la foy, comme Iustinian Eutichien, & Heresiarche; chef & autheur de l'erreur du corps impassible de Iesus Christ: à qui toutesfois fermant Chrestiennement les yeux sur ceste scandaleuse, & perilleuse ouuerture, les Archeuesques de Constantinople,

&

& d'Antioche, comme Epiphanius & Anastase rendirent plaine obeissance: à qui les Papes Siluerius, Vigilus, *Platin.* Pelagius, & Iean 2. seruirent fidele- *Paul.* ment: combien qu'ils renuersassent de *Diac.* tous les traits de leur doctrine, & de la force de la constante parole de Dieu ses fantasies desreglees, & missent peine de l'esueiller brusquement de ces nouveaux songes de Religion. Je ne m'arrestera y non plus aux erreurs d'Heraclius, ny aux cruelles & sauuages heresies de Constans son petit fils: à qui le Pape Martin 1. bien qu'em- *Paul.* prisonné & affligé iusques à la mort, *Diac.* confirma la foy de sa subiection des derniers souspirs de sa vie. Je passeray les estranges opinions, & monstreuses fautes des autres Princes successeurs de la grandeur Romaine, & de peindray en autre lieu la Chrestienne fidelité de leurs subiects. Mais ie ne supprimeray point icy ce que i'ay autresfois fidelement publié: que les premiers Ecclesiastiques qui ont refusé l'obeissance aux Roys, n'ont ou-

PHILIPPIQUE III.

uert ce pas de rebellion que pour estre obeys en leurs places, ne leur ont iamais desrobé le cœur de leurs subiets que pour se l'approprier, n'ont rompu & deslié la foy des peuples que pour l'attirer, & se l'obliger, n'ont brisé les sceptres des Princes sous la ruine de leurs erreurs que pour en faire sauter les esclats en leurs mains, & n'ont esbranlé ny fait tomber leurs couronnes que pour les releuer d'une main d'ambition, & les porter auarement sur leurs testes. Car encores que quelques vns des premiers de ceste ordre sacré contre le iuste respect du Royaume, & l'exemple religieux de leurs saincts predecesseurs, s'escartant trop loing des limites de leurs premiere innocence eussent beaucoup decliné, & flechy de la reuerence Chrestienne, tenant trop peu de conte de la grandeur des Roys, qu'ils fouloient trop librement sous la rigueur de leurs censures: toutesfois auant le temps des Papes Constantin, Gregoire 2. & 3. qui conquerent Rome par

Liber Pon-

tific.

Zonar.

Paul. Dia-

con.

les arts violents de l'excommunication sur les Princes Grecs, nul des pasteurs Romains n'auoit esté si hardy, ny si transporté du desir de l'Empire, que de tirer le glaiue spirituel contre les princes en intention de faire couler leurs diademes tachez de sang par les larges ouuertures de leurs playes. Le glaiue innocent de l'Eglise n'auoit cogueu ny la terre ny le sang, s'estoit contenu puremēt & chastement és seuls termes de l'ame, s'estoit renfermé dans les mysteres de la Religion, & n'auoit tranché que pour la conqueste, ou cōseruation du Royaume celeste. Ils furent les premiers qui d'un dāgereux exemple ouurirēt, & mirent en auant les discours, & incompatibles alliāces de ces deux Royaumes si diuers: qui commencerent à battre & forger deux glaiues en l'Eglise; comme si le glaiue spirituel estoit trop foible que rien n'auoit faucé ny emoussé que les abus; comme il pouuoit estre soulagé, raffilé ou accru par le cousteau materiel; cōme

PHILIPPIQUE III.

si le mélange en estoit naturel ; cōme si ces deux especes vouees à des fins si differentes pouuoient durer en mesme fourreau. Ces peres desleignerent les premiers de faire de tout l'ancien Empire comme vne prouince de leur siege, de retirer & recouurer par le seul droit de la residence de Rome toutes les alienations de ce grād estat Romain, & de renoüer par la seule diuision toutes les pieces demembrees de ce riche, & superbe domaine. Auquel effect, ils grossirent comme vne espesse nuee pleine de tōnerre & d'esclairs, & en frappant l'Empire de ce premier coup de foudre, blessèrent tous les Royaumes des esclats, en l'atteinte & playe de la principale ville combattirent les autres d'exemple, cōme d'un contrecoup, & en la blesseure du cœur du monde naurent toutes les parties de ce corps inferieur : comme on ne sçauroit donner au cœur sans offenser les autres membres, comme on ne pourroit frapper ny esmouuoir le centre sans faire brās.

ler toutes les lignes qui buttent à vne
mesme circonference. Sur ce dessein
violent & premiers traits d'ambition;
par le pas de ceste dangereuse ou-
verture, Gregoire 7. Urbain 2. Pas-
chal 2. & quelques autres ennemis des
sceptres des Roys, sortans comme par
l'effort d'une large bresche hors de
l'anciëne enceinte du respect, & obeis-
sance des Princes, si admirablement
& longuement consacree en nostre
Religion, troublerent autresfois pres-
que tout l'Europe, & esbranlerēt les
Estats les plus solides & plus cer-
tains: marquant de beaucoup de ruī-
nes ce nouveau sentier escarté, & ce-
ste sauuage & aspre voye de rebellion
entrecoupee de tant de mortels pre-
cipices, à la temerité de ce Gregoire
d'Espagne. Et toutesfois leurs saincts
& religieux predecesseurs auoiēt tra-
cé & marqué si nettement ce grand
chemin d'obeïssance du pourpre es-
clatant de leur martyre: les peres de
toutes les Eglises l'auoient semé & es-
maillé de toutes les belles fleurs de

PHILIPPIQUE IIII.

leur deuoir, auoiēt nourry les peuples Chrestiens de ceste pasture innocente, & les auoiēt fortifiez de la vertu de leur exemple : viuant & mourāt franchement sous le commandement & l'Empire de beaucoup de Princes Etaniques, infideles, & apostats, tachez de toutes impuritez de vices, souillez & diffamez de toutes corruptions de superstitiō, & d'heresie. Mais ce sainct ordre Ecclesiastique pour la grande connexion & affinité qu'il a avec l'Estat Royal, dont il faisoit anciennement vne partie, pour la grande relation & voisinage des charges, tout ainsi que des ames & des corps; a-il feul aimé & respecté les Roys, & les autres puissances que Dieu auoit establies sur luy? Ces saincts peres & pasteurs de l'Eglise, tiges de nostre Religion, gardes soigneux des bergeries de Iesus Christ, pour deuoir estre l'humilité & l'innocence mesme, la loy de bien viure, & la regle imployable de toutes sortes de bonnes mœurs; pour auoir vne plus pure & plus nette intel-

ligēce des myſteres de noſtre Religiō,
 pour eſtre plus eſpurez dans le feu or-
 dinaire de la charité, & affinés dans les
 flâmes du S. Eſprit: pour auoir l'eſprit
 eſleué, rauy, & emporté en l'aſſiduel-
 le contemplation des choſes celeſtes,
 pour eſtre par vn meſpris Chreſtien
 au deſſus de la fortune & du monde:
 pour eſtre les beaux aſtres, & flâbeaux
 de noſtre foy, eſclairans ſans fumee
 contre toutes ſortes de nuages: pour
 la plus proche accointance & plus fa-
 miliere cōmunication qu'ils ont avec
 Dieu: pour eſtre les liures viuans de la
 ſaincte doctrine, & humble obeïſſan-
 ce de ſon Fils, pour eſtre cōme les ve-
 ritables & certains oracles des Chre-
 ſtiens, l'exēple & l'idée ſur qui les peu-
 ples doiuent former leur vie, enſeignes
 & chefs ſacrez des troupeaux du Sei-
 gneur: ſe ſont-ils ſeuls contenus en
 ce deuoir Chreſtien & dans ce droit
 chemin, ſans s'eſcarter à trauers de ces
 roches ſauuages, & cruels precipices
 de rebellion? Ont-ils ſeuls, ou plus ar-
 damment embrasſé la verité de ceſte

PHILIPPIQUE III.

obeïſſance fidele, que les autres membres de l'Empire? Certes ſi nous voulons tourner nos yeux ſur les Magiſtrats de toutes conditions, militaires ou ciuils, nous trouuerons qu'ils ne ſont iamais entrez en ces diſcours ombrageux & retifs, ny en la moindre apprehenſion de toutes ces difficultés ſi foibles. Eux qui repreſentoïent ſi au naïf l'authorité du Prince, qui eſtoient les purs deſſeins & traits viuans de ſon image, clairs rayons de ce bel aſtre de iuſtice, appelez par ſa prudence & ſeule volonté comme en part de ſa ſolicitude & de ſa peine: les gardes & conſeruateurs fideles des droits & pouuoirs de l'eſtat, loix animees, & parlantes qui auoient les ſupplices, & les peines preſentes en main pour reprimer & eſtouffer les rebellions; ne pouuoïent ployer, ny ſe laiſſer couler à la deſobeïſſance ſans affoiblir leur dignité avec celle du Prince: ne pouuoient cacher ſa lumiere ſans eclipſer la leur, ny eſteindre ceſte diuine flâme ſans ſ'enſeuelir en vnenuict
eternelle

eternelle avec la majesté de l'Empire,
dont par le benéfice des Roys ils au-
uoient ainsi le soing, la moderation, &
conduire. Qu'les Magistrats se regar-
dent, & recognoissent de pres; ils ver-
ront qu'ils n'ont estre ny iour que par
les Princes en l'ordre des estats Mo-
narchiques. Ce sont de beaux esclats
du feu de la vertu des Roys, claires
estincelles de ces diuines lampes, ef-
fects naturels de leur force, chaleur,
& lumiere. Il y a bien des astres qui
esclairent d'eux-mesmes, qui brillent
d'une lueur naturelle, propre, & nee
avec eux, encore que le Soleil present
offusque & esbloüisse par fois leurs
foibles rayons des raiz de sa clarté
trop puissante: mais quelques autres
de ces corps lumineux ne reluisent
que d'une vertu estragere & emprun-
tee, ny n'esclairent que par communi-
cation de sa lumiere. Ils resteroient
opaques, & sombres s'ils n'estoient
comme esprits, & allumez du feu de
ce bel œil du monde. De mesme, ces
belles marques de grandeur, ces en-

PHILIPPIQUE IIII.

seignes de dignité si esclatantes, n'ont couleur ny lustre que des esclairs de la royauté, qui les anime & les conserue, qui les fait briller si viuement, & avec tant d'estónement aux yeux des peuples. Ce sont pures & claires nuees que le Soleil a esleuees, & grossies, pour y figurer & empraindre les traits plus nets de son visage; & lesquelles il peut dissiper & rompre de la vigueur de son œil, avec moins de peine qu'il ne les a formees. Sans luy elles ne peuuent naistre, ny se dissoudre que par luy. Les Magistrats ressemblent proprement aux miroirs ardents, qui ne pourroient brusler que par la reflexion des rayons du Soleil: & demeureroient en la morte, & oisue froideur de leur glace à l'opposition des autres flammes. Retirez vn peu en arriere les corps representez dans ce cristal, reculez vous vn peu de ces riuages, escartez vous plus loin de ces fôtaines, vous verrez que les images qui sembloient si bien enduites, & imprimees sur ces eaux si claires, s'esuanoüiront

auffi tost: que toutes ces especes si net-
 tement rapportees s'enfuiront avec
 l'obiet, sans qu'il y reste vne marque,
 ou legere trace de toutes ces premieres
 formes si fidelement conceues. Ainsi
 leuez le respect & l'honneur des Roys,
 l'autorité du Magistrat s'escoulera &
 disparoistra soudainemēt avec la leur,
 cōmen'ayant aucun corps, ny essen-
 ce que celle qu'ils luy auoient accor-
 dee, & prestee. Rien ne peut bien pa-
 roistre ny reluire, rien ne se peut pre-
 senter en son lustre, ny en son iour au
 fort mesme du midy, si vne grosse &
 espeüe nuee voile, & desrobe les rayōs
 du Soleil: si la lune ialouse en l'amour
 de ce bel astre, pour le contempler
 seule, & en iouyr plus à son aise de-
 stourne d'enuie ses beaux regards loin
 de la terre; si se rengeant au deuant de
 sa claire face elle le fait languir des
 accidents, & de l'absence d'une ecli-
 pse: si la terre mesme se fait ombre, &
 cache le Soleil de sa nuit. Les om-
 bres mesmes se perdent dans ceste
 ombre: & en la plus grande & plus vi-

PHILIPPIQUE III.

ue lumiere, les ombres fuyardes n'arrestent, ny ne paroissent plus apres les corps. Il faut donc que les Magistrats recognoissent que comme ils ne sont creez & formez que par grace, & bienfait des Roys, ils ne sont aussi conseruez que de leur faueur & bonne fortune. Les Roys sont comme leur ame, de là ils prennent vie & mouuement: & les Roys ne vivent pas tant en eux comme ils reposent seurement leurs sceptres & dignitez dās ces seins prudents, & fideles. Car ce sont les Roys qui ont departy & donné les charges aux Magistrats, qui leur ont inspiré ces esprits de grandeur, qui leur ont cōmuniqué l'honneur mesme de leur dignité Royale, pour la tenir sous leur autorité & adueu, & pour leur seruice. Ils les ont surrogez pour rendre en leur place la iustice, pour laquelle Dieu les a principalement ordonnez sur ses peuples: ils les ont instituez & commandez pour cōmander en leur absence: ils leur ont fait si bonne part de leur souueraineté, & les ont dressez

& esleuez si haut, comme vne des fortes colonnes qui doiuent porter & appuyer la pesâte Majesté de leurs couronnes: laquelle ne peut fondre, ny se rompre sans escrafer, & briser en esclats & en pieces ses appuis mesmes les plus forts, sous sa cheute & ruine violente. Aussi n'y a-il point d'ordre si lié ny enchainné avec la Royauté que les Magistrats, & Officiers : l'un depend necessairement de l'autre comme vn effect de sa cause, comme la creature de son autheur. Que si le respect du Roy est violé, la reuerence du Magistrat comme nec & coulee de la sienne, cōme attachee au deuoir qui nous oblige au Prince, ne peut plus subsister & demeurer entiere, ny suruiure à l'autorité du Prince. Quand la source est tarie, ou comblee, les ruisseaux cessent bien tost de couler. En France ceste connexité & liaison esclaie fort viuement, & se fait voir plus nettement qu'ailleurs. Car pour les grâdes habitudes, respects, & rapports qui doiuent assembler & vnir les

PHILIPPIQUE IIII.

Magistrats & Officiers avec le Roy: ils ne constituent, ny ne formēt point de membre separé de la Royauté, & ne font point de corps à part en la conuocation des Estats generaux du Royaume, comme tous les autres ordres. Ils sōt cēsez du corps mēme du Roy, tenus & reputez pour depēdences, & suites necessaires de sa dignité, cōme instrumēts & reslorts de sa couronne, cōme parties essentielles mēlees, & cōfuses avec la Royauté. D'oū vient, que pour obtenir leurs charges, il leur faut prendre lettres du Prince: & la plus noble nature, ny la plus grande naissance n'y apporte autre aduantage qu'vne disposition plus proportionnee, & mieux accommodee aux grands offices du Royaume. Encores les offices estans ainsi distribuez seulement par les Roys, ils ne les accordēt que pour les tenir, & iouir tant qu'il plaira à leur prudence: si bien qu'on peut dire que les Magistrats ne naissent que par benefice de leurs Majestez, ne vivent, & ne subsistent que

par elles. Ceste police est si constante en cest Estat, qu'à l'aduenement d'un nouveau Roy à l'Empire de France, tous officiers (fors ceux que nous tenons pour Officiers de la couronne) sont necessitez de prendre lettres de nouuelle confirmation, ou en gros pour les corps de iustice souueraine, ou particulièrement pour les autres estats de moindre marque: comme si leurs charges & fonctions auoiēt esté eclipsées, supprimees, & esuanoüies avec le deffunct Roy; comme s'ils auoient besoing de la vertu d'une nouuelle grace pour faire reuiure leurs dignitez, qui sembloient esteinctes, & amorties avec la vie de l'ancien Prince. Et toutesfois, és conuois & pōpes funebres de l'enterrement des Roys, les Magistrats retiennent tousiours le pourpre, & autres viues & illustres enseignes de leurs authoritez, ne prennent point robe de dueil en ce dueil public, & parmy les larmes de ceste tristesse vniuerselle: pour monst^rer euidentment, qu'en France le Roy ne

PHILIPPIQUE IIII.

meurt iamais: que la nature en fait auf-
si tost naistre vn autre comme des
cendres d'un Phenix: & que dès qu'il
a pleu à Dieu appeller le Prince au re-
pos de sa gloire, la plus droite & plus
proche ligne de fere la succession, &
portela couronne sur la teste au pre-
mier Prince du sang, selon l'ordre
eternel des loix fondamentales de
l'Estat, sans que rien du monde s'en en-
tremette, ny s'en mesle que Dieu seul,
& la nature. Ce qui ne se trouuoit pas
si entier, ny si certain en l'ancien Em-
pire Romain: qui pour estre moins
monarchique que le nostre, astrei-
gnoit souuent leurs Princes à la con-
firmation du Senat, ou à l'approba-
tion de la gendarmerie. Mais encores
que la succession n'y fust si purement
naturelle que tât de siecles, & de lon-
gues suites d'annees nous l'ont mō-
stree en ce Royaume, qu'elle eust au-
cunement besoin d'attendre vn leger
adueu de l'ordre souuerain de l'Empi-
re, ou de la force des armes: on ne vit
iamais guiere en Estat du monde le
Magistrat

Magistrat plus obeïssant au Prince, nymieux confirmé en la fidelité. Tant pour le rapport & relation de sa charge à la Majesté des Roys, pour la naturelle obligation qui le lioit à ce sacré respect: que sur les longues considerations de ceste admirable police, bastie de tant de prudence, attachee & retenue par tant de seueres chesnes de ces sages loix Romaines. Au Christianisme des Empereurs, ces liaisons qui se relaschoient & disloquoient assez souuent en la vieillesse de la grandeur de Rome, & en la grande foiblesse & corruption de l'Empire, furent plus estroitement renoüees par les sainctes obligatiōs de la foy Chrestienne, & plus fortement rejoinctes du ciment de nostre Religion. Car qui voudra passer l'œil sur l'histoire de l'Eglise, confessera aussi tost, que les Magistrats Chrestiens arrestez, & affermis en leur deuoir par la viue parole & le constant exemple de IESVS CHRIST, esclairez & guidez droitement en ce chemin si battu, par la ly-

PHILIPPIQUE III.

miere de la vie & doctrine des peres, ont plus fidelement seruy leurs Princes, que ne faisoient au parauant les autres Officiers de la puissance Romaine par la terreur des loix, & la rigueur des supplices: & que l'obeissance fust si sainctement replantee, & si fermement appuyee, que la diuersité de Religion ne changea ny n'altera jamais en leurs âmes la saine purité de leur seruice. Qui ne sçait point que tous les premiers & plus grands Officiers d'Alexandre fils de Mamee estoient Chrestiens? Que les Magistrats de Constantius pere de Constantin le Grand, pour n'auoir voulu despoüiller leur Religion, dont l'exercice leur auoit esté interdit par la violence outrageuse de beaucoup d'Edicts publicqs, auoient esté tous mis hors de charge: quãd ce Prince mesurant leur fidelité par la foy de l'Eglise, les appella de nouueau à son seruice & à sa suite? Et eux restituez, & rentrez en leurs premieres dignitez, luy continuerét vne humble & deuotieu-

Enseb.

*Euseb. i. de
vita Con-
stant. cap.
ii.
Sofom.*

seobeissance. De quelle autre marque que Chrestienne, & Catholique estoient la plus-part des Magistrats de Licinius? Les Chrestiens faisoient si peu de scrupule de viure sous le sceptre d'un Prince de contraire foy, que ceux qui se rencontrerent sous le regne de Iulian, trouuerent estrange, & ne porterent qu'avec quelque douleur, que ce Prince apostat pesant abolir la Religiō par la perte de leurs Offices, & estouffer l'humilité Chrestienne dās les fumees de l'ambition de sa Cour, leur arrachast leurs estats & leurs charges pour les faire tōber entre les mains des Etniques. Quoy Beneuol? n'estoit-il point directeur & dispensateur des affaires de tout l'Estat de Iustine, & Valentinian 2. expediant sous leur sceau & autorité toutes lettres, & formes sacrees qui seruoient à la Majesté & cōseruation de l'Empire, fors celles qui estoient commādees pour estaindre la foy Catholique? Ainsi le martyr Hormisde obtint lōguement les premiers rāgs entre les Magistrats

*Euseb. 10.
cap. 8.*

Theodor.

*Sesom 7.
cap. 14.*

PHILIPPIQUE III.

Theodor. 5. cap. 39. des Perſes, ennemis iurez du nom Chreſtiẽ. Caſſiodore fut le ſage Chã-

Victor. de perf Vandal. celier de Theodoric : Saturus eſt honorẽ par Victor d'Vtique comme fidele Procureur general de Hunneric Roy des Vandales d'Affrique : Et les Roys Gots, & Vandales obſtinez & barbares Arriens, n'auoient preſque point de Magiſtrats que Catholiques. Fermerons nous icy les yeux ſur la fidelitẽ de la Nobleſſe, & des gens de guerre? Enſeuilirõs-nous dãs le ſilence, leur conſtance & leur foy, ſans l'eſtaller en la publique veuẽ du theatre du mõde? Qui la pourroit biẽ mettre à sõ iour depeinte de toutes ſes naturelles couleurs, paree de ſes ornemens ordinaires ; elle accableroit d'eſtonnement les eſprits les plus deſloyaux, & rauiroit de l'admiration de ſa beautẽ parfaite toutes les ames plus fideles. Qui la pourroit bien animer de ſa couſtumiẽre vigueur, la releuer de ſon premier luſtre, ou ne luy tenir point ſon ancienne lumiere : ſi le pinceau pouuoit imiter la nature, il la feroit eſ-

clater d'insupportable clarté aux foibles yeux de toutesces taupes d'Espagne, qui doutent de la lueur du Soleil: & la feroit sentir aux regards les plus fermes, aussi viue & esclairâte, que l'obeissance des autres ordres. Les gens de guerre n'ont iamais cédé aux autres parties de l'Estat, aux vœux ny en la gloire de ceste belle fidelité; ont presque moins retiré le pied des bornes de ce respect Royal pour la conseruation duquel ils estoient enrollez & armez: ont combatu vaillamment pour la deffense, le seruice, & salut de leurs Roys; ont mille fois laué & reuerny les vieux aigles Romains de leur sang victorieux, & sacrifié largement leurs vies à la fortune de leurs Princes. Non tant chatoüillez & picquez de la beauté des lauriers & palmes terrestres, non tant attirez de l'esperâce de beaucoup de superbes triôphes, ou poussez & esmeus de toute la lueur, la mōstre & vanité de l'honneur du monde, comme ravis & trāsportez de la promesse asseuree des courônes

PHILIPPIQUE IIII.

eternelles, reservees au Ciel, basties & tissues de la main de Dieu mesme aux merites de ceste fidele valeur, & Chrestienne obeïssance. Aussi semble-il que ce membre du Royaume ait quelque secret regard, & particuliere habitude à la grandeur des Roys, desquels il est côm la force & la deffense: qu'il soit attiré & forcé à leur service par quelque naturelle, & admirable simpatie. On diroit que les Nobles, & les gens de guerre sont attachez, & obligez aux Princes des enlassements & estraintes d'un ferme lien; comme animez de leur seule vigueur, espris du feu de leur vertu, reschauffez de leur exemple; comme effects & dependences de ces diuins principes de Noblesse; montez à ceste rare & glorieuse dignité par les degrez des graces & bien-faits des Princes, de qui ils tiennent ces tiltres fameux, & toutes ces prerogatiues & priuileges honorables, qui les discernent & esleuent par dessus ceste basse lie du peuple. Car ce sont les Roys qui ont comme

changé, & transformé le cours de leur naissance, qui ont éclairé, & fait reluire leur noire & foible origine de la reuerberation de leur lumiere: qui les ont faiçts autres-fois plus grands que leurs peres mesmes, desquels leurs Majestez ont comme refondu la vie, pour en dorer apres les actions obscures de la distribution & communication des nouuelles graces accordees à leur semence. Ils ont annoblis les peres en leur posterité comme par reflexion de la clarté de leurs enfans; vnissant toutes leurs actiōs quoy que differentes d'estoffe & de lustre d'une subtile rantrature; les accouplant d'un nœud meilé de nature & de grace; effaçant, & polissant doucement les marques de la coupure, comme de la soudure: faisant recouler leur vertu au premier poinçt de leur ascendant: la faisant admirablement remonter contre sa source; faisant ressentir les vniuersels des proprietéz & accidens des singuliers: renouellant & rauissant dans la vigueur des indiui-

PHILIPPIQUE IIII.

des les especes mesmes. Ce sont encore les Roys qui continuant & estendant ce priuilege plus auant, ont animee la vertu des nobles d'une vigoureuse & esmerueillable faculté. De pouuoir sans se couper, ny se rompre rouler egalelement par tant de centaines d'annees, & en lieu de descroistre & affoiblir par l'vsage & le temps, se fortifier en la longueur de sa course, pour descendre & glisser entiere iusques au dernier de leurs successeurs, qu'elle rend tousiours plus noble que le premier: logeant plus d'efficace & de force aux dernieres branches, & extremes fueilles, qu'au corps mesme & racine de l'arbre. Si biē que les premiers semblent estre comme vn lien cōmun de tant d'hommes qui les ont precedez, & suiuis: establis & arrestez comme vn poinct immuable de tant de sortes de lignes qui tirent de la circōference au centre, & du centre à la circōference. Par ce que les Roys ont comme marqué leur semence d'un vif caractere d'honneur, pour imprimer
eternellement

eternellement à leur race ceste belle image de Noblesse & de gloire, pour la communiquer à leurs enfans, & la perpetuer d'une d'escēte fertile & heureuse en tous leurs neveux, lors qu'ils s'en rēdront capables, & apporteront tant soit peu de bonne volonté au service du Prince, comme la matiere naturelle de la cōtinuation de ceste belle, & noble forme. Aussi quand la Noblesse voudra bien penser à ce qu'elle est, considerer & mediter profondement les moyens de sa consistance, comme l'ordre de son essence; elle trouuera qu'elle ne peut non plus durer, que commencer sans les Roys. Penseroit-elle subsister, ou trouuer quelque assērance, quand le peuple auroit rejettē le ioug des Roys; & auroit mis par terre la majestē d'un grand Empire. Si le peuple ne pouuoit adorer le Soleil, ployeroit-il biē le genoūil sous l'aspect de quelque estoille? Quand les celestes esclats du Soleil royal se trouueroiēt trop mols & trop foibles pour dissoudre, & rompre ces espais nua-

PHILIPPIQUE III.

ges, ces petites & petites lampes, se pourroient-elles faire iour à trauers de ceste nuit si obscure, & demesler de leurs rayons les confuses tenebres de ces troubles? Si le peuple ne pouuoit porter l'honneur des Roys, il se lasseroit bien tost du respect de la Noblesse, la voudroit soudain esgaller, & luy mettre le pied sur la gorge. Qu'elle ne se separe donc point des Roys, & ne pense point à se conseruer à part. Qu'elle se joigne & s'vnisse de plus pres au seruice de son Prince, comme en son interest & en sa cause: & ne se propose point de meilleur dessein de salut. Elle n'a qu'autant de vigueur & d'assurance qu'elle en reçoit de la bonne fortune des Roys, à qui la sienne est inseparablement liee. Le bien & le mal de l'un glisse soudain iusques à l'autre; & la Royauté ne peut estre dangereusement blessée, sans faire mourir quant & soy la Noblesse de la douleur de mesme playe. Il s'en faut donc bien qu'elle puisse gagner quelque honneur, ou aduantage en por-

tant les armes contre son Prince, ou se retirant de son party. Les Nobles commeurgeons, & ruisselets coulés de ces sources eternelles, se trouueroient incontinent à sec, sans la continuation de ceste eau viue qui les anime. Ce sont branches, & rejettons de ces tiges diuins, qui meurent aussi tost qu'ils en ont esté coupez ou arrachez. Ce sont lierres desliez rampants contremôt ces arbres, qui ployeroient & traineroient par terre, s'ils n'embrassoient ces tiges qui leur ont seruy d'appuy, & de nourriture. Et puis qu'ils sont le bras armé des Prince, qui est le plus haut poinct de leur gloire; s'ils se retranchent, ils ne peuuent que pourrir ou seicher languissants, comme vn membre mort ou paralitique priué de la vigueur du corps. Les Roys ont premierement rendu les armes iustes aux Nobles, qui les empesche de les porter iustement contre leur seruice. Encore que leur vertu ait beaucoup cōtribué à cest ouurage admirable de leur honneur, ce n'en a esté que la premiere ma-

PHILIPPIQUE III.

tiere: les Roys y ont apporté la forme, luy ont donné les premiers mouuements, & luy ont ouuert ce champ de gloire. En ceignant les espees pour le seruice de leurs princes, ils ont mérité la beauté de ce nom, cōme en recompense de leur fidele vertu : mais les Roys ont excité & esmeu les semées oisies de ceste valeur, à la veüe & à la monstre des lauriers, & couronnes de victoire, les ont rechauffees de la chaleur des salaires & recompenses, les ont fortifiees de la grandeur des dignitez & des fiefs qu'ils tiennent de leur liberalité: & les merites de leur fidelité les ayant montez à ces grades d'honneur, la seule infidelité les en peut precipiter avec honte. Quand le desir de mesmes honneurs, & la crainte de souiller laschement les belles & luisantes actions de leurs ancestres dans les vitaines taches d'une vie desloyale, ne les picqueroient ny esmouuroient à seruir le Roy : quand les esclairantes traces des vertus, & fidelitez de leurs peres, qui leur ont laissé

vn heritage si noble & de si haute valeur, qu'il ne se peut acheter par or, ny eschâger aux pierres precieuses, pour ne trouuer ny pris ny proportiō semblable, ne les retiendroient point aux termes de leur obligatiō; ou n'y pourroiet remettre & ramener ceux, qu'on a effarouchez en tant de façons pour en sortir: les enseignes & adresses veritables de ce chemin si frequenté, & si cogneu du seruice de leur Roy legitime, race sainte de S. Loys, eternelle semence de tāt de Roys qui nous ont dōné la Gaule, la consciēce & l'exemple de tous les premiers Chrestiens de ceste condition & qualité les doiuent fortemēt repousser, & renfermer dans le iuste pourpris de ce deuoir Chrestien: comme de la plus ferme enceinte, & plus forte barriere qui peult arrester les esprits, & de la plus violente estrainte qui peut gehēner, & cōtraindre les consciences. Ce ne sont point de vains scrupules Noblesse de France, ce ne sont point artifices exquis, & trompeurs: ou de nouueaux effroiz &

PHILIPPIQUE III.

terreurs paniques, incertaines, & vagues cōme les menaces des bulles de nos ennemis: c'est le pur son de l'Evangile, la voix de Dieu, la parole de vos peres, & les esclairs de la vertu dont reluit, & esclate admirablement toute l'histoire de l'Eglise. Car mettant à part ces gens de guerre, comme ce fidele Centenier dont la foy ne trouua rien de pareil en Israël, qui seruoit constamment vn Prince Payen, & Etanique: on pourra voir par tout l'ordre de la suite & propagation de nostre Religion, que les gens de guerre, les Nobles, les plus grands Capitaines, les chefs & generaux d'armee ont si peu refusé de s'enroller, ou de marcher sous les anciens estendars Romains au premier cōmandemēt; qu'ils ont si peu fait de difficulté, & de scrupule de prendre les armes, de donner de grandes & furieuses batailles, de combattre & vaincre vaillamment pour le salut & la gloire de leurs Princes d'autre Religion; ou de les suiure, assister, & servir fidelement en toutes

fortes d'affaires : qu'il ne s'est iamais
 présenté occasion quelque legere, ou
 d'agereuse qu'elle ait esté, où ils ayent
 fait les froids à obeïr, où ils ayent
 marchadé d'employer leurs vies pour
 conseruer, & garentir celles de leurs
 Princes. Au contraire ils eussent fait
 conscience, eussent pris à peché & à
 perte de la vie eternelle, l'espargne du
 sang & de la vie des corps, en deso-
 beïssât à leurs Roys, ou aduâçât trop
 froidement le bon heur de leur fortu-
 ne. Mais Dieu a-il destourné la veuë
 de ces volontaires sacrifices? Ne s'est-
 il point delecté à contempler les sain-
 ctes, & fideles prouësses de tous ces
 valeureux gensdarmes Chrestiens?
 N'a il iamais monstre par quelque si-
 gne & apparent tesmoignage, le plai-
 sir qu'il receuoit de ceste Chrestien-
 ne obeïssance? Ne l'a-il point confir-
 mee des miracles, dont reluisent les
 autres saincts mysteres de nostre Reli-
 giō? Que peut-on dire autre chose de
 la vertu & de l'honneur de ceste le-
 gion foudroyante, qui viuoit en l'ar-

PHILIPPIQUE IIII.

*Euseb. 3.
cap. 3.*

mec, à la souldé, & aux gages de Marc le Philosophe? Que peut-on répondre à la fidelité de ce rigement Chrestien, qui vainquoit par armes & par prieres ardentes les ennemis de son Prince; de qui les voix enflâmées de charité & d'obeïssance allumoïét l'air, embrasoïent le Ciel, & en attiroïét le feu pour prouue de sa constante fidelité? avec qui le Ciel s'armoït, & Dieu mesme sembloït combattre pour la victoire, & conseruation des lieutenans de sa puissance sur la terre? De quelle Religion que Chrestienne estoit Quirinus, & toute ceste troupe de dix mil hommes qu'il cōmandoit? Et toutes-fois, ils seruïrent & secoururent courageusement l'Empire Romain, sans iamaïs donner le moindre semblant de mescontentement, ny de reuolte. Et bien qu'ils eussēt tousiours fidelemēt suiui les drapeaux, se fussent modeste-
Euseb. mēt contenus en leurs stations & garnisons, se fussent exposez à tous assauts & cōbats, & en eussent demandé les premieres pointes: massacrez à
la fin

la fin à Rome par le commandement de l'Empereur, pour ne vouloir manquer de foy à Dieu non plus qu'à luy, ils gaignerent d'une mort constante les couronnes eternelles de martyre, voüees & cōsacrées à la milice Chrestienne: sans que iamais vn seul d'entre tant d'hommes de guerre si braues, si genereux, si accoustumez à cōbattre & à vaincre, tirast l'espee pour se venger de la cruauté & iniustice de ce Prince: sans faire effort pour deffendre la Religion par armes; sans ietter vne parole rigoureuse, ou vn lasche soupir de regret, contre l'obeïssance de ce violent estat pour les seruices passez; ou en reproche de l'honneur de tant de victoires gaignees. De mesme magnanimité & courage, ce grād *Regin.* Capitaine Marin^r souffrit le martyre en Cefaree: & Quirinus se porta pour braue tribun de gens de guerre sous Aurelian. S. Sebastia fut colonel d'une *Euseb. Cron.* legion sous Diocletian, & S. Maurice maistre de camp d'un regiment Thebain suiuit les cruels aigles de ce

PHILIPPIQUE III.

Prince, quâd apres l'auoir fidelement
 feruy en toutes sortes d'occasions , il
 les fit rigoureusement mourir, & pas-
 ser tous leurs compagnons au fil de
 l'espee , sans qu'ils fissent aucune resi-
 stance d'effect, ny de parole: sans que
 les gros boüillons de sangruisselant
 comme fôtaines de toutes les parties
 de leurs corps, dont le sentiment & la
 veuë peuuent animer les plus lasches,
 les pouffassent à la defense. Ils se con-
 tētoient d'esteindre de tant de fleuves
 de sang la flâme ardânte de la cholere
 de leur maistre, & de surmôter sa rage
 obstinee par la seule opposition de la
 patience Chrestienne. Ainsi Theodo-
 re fut long temps general de la gen-
 darmerie de Licinius, & receut con-
 stâment le martyre pour recompen-
 se de ses seruices : sans plaindre sa for-
 tune, sans reprocher sa fidelité, & sans
 regretter sa vie, qu'il quitta franche-
 ment pour derniere preuue d'obeis-
 sance. Mais quels estoient les chefs de
 guerre qui menoient les armées de Ju-
 lian l'Apostat? Voila Iouinian & Va-

Nicephor.

Iétian tous deux successeurs du pourpre de son Empire, qui le seruēt & honorēt avec tout l'étier respect deu à la majesté Romaine. Iusques là, que Valentinian tres Catholique ne fit point de scrupule de l'accôpagner dâs le temple mesmes de Fortune; pourueu qu'il ne participast à son impieté, pourueu qu'on ne tachast, ou ne mouïllast pas seulement son manteau d'une goutte de l'aspersion de son eau lustrale. C'est ainsi qu'Artemius se fit tousiours recognoistre pour fidele maistre de câp de ses legions d'Egypte. Quel exemple no^r a laissé icy S. Martin de Tours? Ne fut-il pas vn des plus braues gendarmes qui endosserent harnois, qui combatiirēt iamais sous les enseignes prophanes de ce Prince? Ne se van-toit-il pas comme on void dans l'histoire de Sulpice son disciple, de donner des premiers aux rencontres & batailles: meslant franchement toutes choses en l'obeissance de cest impie Empereur, fors les mysteres de la Religion, & les prieres Chrestiennes

*Theod. 3.
cap. 15.*

*Ibid. cap.
17.*

*Cap. Iulian.
nus 11.
quest. 3.*

PHILIPPIQUE IIII.

*Theol. 4.
cap. 28. &
29.*

queluy & ses compagnons faisoient à part ? C'est de ce fidele seruice que les Escriptuains de l'Eglise recommandent Terentius, qui cōduisit tāt d'armees en Armenie sous la lieutenantce generale de Valens : Ce sont les plus grandes marques d'honneur que receurēt Trajan, Arintheus, Victor & les autres generaux d'armee, qui vesquirēt sous l'Empire de ce Prince heretique obstiné: violent & cruel persecuteur des Catholiques. Je ne m'arrestera point à descrire, & représenter particulieremēt la fidelité du peuple: parce que de soy il n'est presque rien de certain, qu'entant qu'il est gouuerné, retenu & moderé par les autres ordres, sur lesquels il se doit façonner & mirer. Il faut que ce nombre infiny de tāt de diuerses petites estoilles, roulle du bransle & mouuement de la huitiesme sphere : elles n'ont ny cercle, ny train à part. Tous les membres du corps humain, quoy qu'ils facent partie de sa cōposition, qu'ils soiēt bastis de mesme matiere, ne desdaignēt pas

de se regler & conduire par la teste, où la raison a planté son siege auguste: où l'ame fait reluire toutes ses plus nobles & principales facultez. L'estomach mesme qui alimente & nourrist la teste, ne luy refuse point obeïssance: & le cœur le plus eschauffé & plus bouillant modere l'ardeur de ses esprits esmeus, sous la froideur & prudence du cerueau. Les bestes brutes les moins capables de raison, seruēt icy d'exemple aux peuples: Elles suiuent celle de leur espece qu'elles ont choisie pour les conduire. Les gruës se laissent mener à leurs colonelles: les sages auetes adorent presque celle que quelques marques particulieres de nature, que quelques enseignes de beauté & de respect, ont destinee pour leur Princeesse: & dans les plus confuses formilieres, ce petit peuple mesnager recognoist en son œconomie quelque forme de cōmandement, & d'Empire. Entre les hōmes les plus bas d'esprit & plus miserables; les plus foibles discours de la raison doiuent au moins gagner cest

PHILIPPIQUE III.

aduantage, que le seul sentiment & inclination naturelle obtiennent parmy les animaux irraisonnables. Car le peuple le plus hebeté, ne peut-il pas bien iuger & recognoistre par les issuës mesmes, & la fin de toutes actions, que ceux qui sont mieux & pl^o illustremēt nez, les plus disciplinez & plus polis de bonnes mœurs, les mieux instituez en la vertu & bonnes lettres, que Dieu & les sages loix de l'estat veulēt qu'ils respectent, & craignent pour Magistrats & superieurs : qui ont mille fois plus d'interest qu'eux tous en la conservation d'un Royaume; doiuent estre plus capables du maniemēt de la chose publique, & auoir plus acquis d'experience & de prudence pour l'accroistre glorieusement, & pour la faire durer sainement en sa force & grandeur anciēne, que des personnes viles, basses, & ignorantes, non exercees aux grandes affaires ? Que des miserables fils de la terre, esclos & esleuez cōme potirons de la rosee d'une nuit ? Hé quelle intelligence d'affaires d'Estat

ny de religion, peuuét auoir des gens si mal nez, si mal nourris & instituez; attachez & collez sans fin à vne besogne mecanique; nez seulement pour seruir? Quelle conduite certaine, quel dessein asséuré peut-on remarquer és turbulêtes actiôs d'vne populace, qui ne medite & ne pese rien: qui vit tousiours en fieure; qui ne fait rié que d'ardeur & de boutade; où le pl^r chetif cōme plus insolent se presente tousiours pour chef? Le peuple n'est de soy rien de certain ny d'egal. C'est vn chaos, vne confusion douteuse & irresoluë, qui de son naturel n'a lumiere, regle ny mesure; penchant à toutes sortes de conseils, & d'aduis. C'est cōme vne matiere premiere, grossiere & mal polie; susceptible, & capable de toutes formes; accommodee & disposée à toutes sortes de figures. C'est de l'argille rude, esclatant, & sablonneux: maniable seulement par la peine, & la dexterité d'un bō ouurier. Car encor que le peuple deuiene par fois agard, farousche, mescognoissât, & mal-aisé

PHILIPPIQUE IIII.

à tenir cōme vn cheual trop à son aise :
il se dompte toutesfois par l'adresse, la
bride & l'esperon ; & ne s'eschappe ia-
mais si loin qu'en fin il ne recognoisse
son maistre, si on met peine à le rega-
gner & rauoir. Son incertitude le ra-
meine, comme elle l'emporte & le
perd. Il suit le premier qui le pousse,
sans regarder l'ordre, ny la fin de ses
actions ; sans rien mesurer que par l'e-
uenement & le succez : se repentant
aussi facilement, comme facilement
il peche. Vous diriez que c'est vne ter-
re grace & fertile qui attend le labou-
rage, les semences, & la culture, telle
qu'on la luy voudra donner. Que c'est
cōme vne table d'attente qui receura
routes inscriptions. Vne carterase &
blâche qui admettra tous pourtraits,
qui boira indifferemment toutes cou-
leurs. Il ressemble à vne nauire, qui de
soy sans le mast, les cordages, & les
voiles, destituee de la conduite d'un
sage pilote, n'a but, ny route que la for-
tune. En fin puis qu'il le faut dire, il est
encore moins certain que tout cela. Il
ressemble

ressemble aux vagues mesmes, enflées & esmeuës de toutes sortes d'orages, & aux nuees suspendues & balancees en l'air, que les vents entrepoussent à leur plaisir : & que le moindre rayon d'un Soleil chaleureux peut escarter, & dissoudre. Car quoy que les peuples s'assemblent, se mutinent, & esleuent de faction ; si le Magistrat retient encore son autorité entiere, ou ne leur dōne point la fausse lumiere d'un mauvais exemple, comme il a fait en tant de lieux de ce Royaume ; ils se rompent & dissipent, se remettent, & rangent en ordre à sa venuë, à l'esclair brillant de son pourpre, & à la sainte lueur de ses enseignes ; tout ainsi que les flots les plus esmeus & plus courroucez s'accoiscent aux premiers rayōs du feu d'un saint Herme, ou à la paisible lumiere des lumeaux. C'est bien vne parole aussi veritable que cōmune, que iamais peuple ne fût guiere bon. Toutesfois le peuple de France a esté tousiours des meilleurs, des plus fideles & affectionnez à ses Roys : & ne

PHILIPPIQUE III.

se fust iamais tiré de soy-mesme hors de ce train ordinaire & naturel de fidelité, s'il n'en eust esté desbauché & destracqué par tât de mauuais artifices. Que si le Magistrat eust esté assez fort, si la vigueur de son autorité n'eust esté si flectrie & raualee, si les diuers malheurs du changement de ce siecle luy eussēt laissé la fonction de sa charge libre, si on eust tousiours peu loger des gēs de bien en ces sainctes places, voüees & cōsacrees à la probité & à la vertu; si quelques vns des Magistrats mesmes n'eussent leué les clefs de ces estangs, & ouuert la bouche à ces escluses, le peuple ne se fust iamais laissé emporter si furieusement, ni si loin hors de son deuoir. On l'eust retenu sous la reuerence du Prince, par la bride & les resnes de nos loix, que la rouilleure & corruption de tant de longs abus auoiēt rongees, & pourries. Si la iustice eust esté respectee & reconnue, elle eust peu faire respecter & reconnostre le Roy. Qu'un peuple soit aussi fort, aussi grād & fascheux qu'on vou-

dra, qu'il se trouue trop à son aise; que les plaisirs, les biens & les richesses l'aveuglét, ou luy fassent mesconnoistre & oublier sa cōdition; on l'a tousiours bien ramené & rangé à la raison, en des estats aussi puissans & superbes, mais mieux policez : où le Magistrat gardoit sainemēt & fermemēt le rang de sa dignité, sans la ployer sous la faueur, ny sous la crainte. C'estoit l'ancienne gloire des Spartains, de se vanter qu'un seul homme député de leur ville, donnoit seurement & paisiblement la loy à tout le peuple de la Grece, avec vne simple baguette en main. Aussi les Magistrats sont proprement, & principalement destinez pour faire obeïr les Roys. La force & les armes peuuent branler & changer, ou tourner du costé des tyrans; mais non iamais les loix immuables, qui ne peuuent changer de nature, de visage, ny de face, que par la mutation & perte entiere de tout l'Estat. En vn temps dissolu & troublé, l'vsurpateur pourra estre suiuy & assisté d'autāt de soldats

PHILIPPIQUE III.

que le Prince legitime : mais Dieu ne se trouuera iamais de son costé destitué de sa Iustice. Que s'il n'y va que de la force, si la seule force l'emporte, si les affaires d'un Roiaume ne se doiuent vider ny desmesler qu'à coups d'espee, il ne faudroit donc plus parler en tout des saintes loix del'Estat, de l'ordre certain des successions, ny de la legitime descēte des Princes : puis que les seuls esclairs des armes pourroient offusquer, & esbloüir la lumiere eternelle de ces sacrez, & glorieux tiltres. Qui pourroit auoir la force en main feroit asuanoüir tous ces droits les plus vigoureux & plus puissans : & dementât sa condition, se dire Roy cōme les Roys mesmes. C'est dōc au magistrat en vn Empire sain, entier, & reposé de moderer & retenir prudēment les peuples par les iustes liens des loix, & par les seueres attaches de la bonne police. La force peut varier & changer, ou se trouuer partie cōtre le Prince. Aussi les Princes feroient bien tort à l'ancien ordre de l'estat, & à la sage

disposition de leur Royaume, de penser que les magistrats, & la Iustice leur fussent si inutiles, ou peussēt si peu de chose en l'establissement & conseruation de leurs droits, en la garde & defense de leurs couronnes; que l'assurance de leur Empire ne fust grauee que sur la pointe de l'espee. Ils ont esté dōnez eux mesmes du Ciel pour rendre la iustice aux peuples. Les premiers chefs du peuple de Dieu ne portoiēt autre nō que de Iuges: les Magistrats n'ont esté creez & surrogez par la prudēce des Roys, que pour administrer la iustice en leur place, comme en leur nom: & c'estoit anciēnement l'honneur des plus grands Seigneurs de France. Pour ces considerations, la Majesté de nos Roys n'est point pourtraite en armes en la sainte marque, & empreinte venerable de ce sçeau sacré du Royaume, dōt la vertu confirme leurs volōtez, & autorise leurs actions de paix & de guerre; Elle est figuree en la grandeur, & repos du liēt de Iustice. Ils ne font iamais re-

PHILIPPE III.

lui le Soleil Royal, ny n'estallent leur dignité plus auguste à la veuë de leurs peuples, és plus celebres iournees, & plus fameuses assemblees, qu'en l'ornement du liët de Iustice: & ne sont point sacrez en armes, ny en habit militaire. Voila pourquoy en vn temps calme, où les armes cedent la place & la force aux enseignes du Magistrat, vne compagnie de iustice bien que desarmée, avec le seul pourpre & autres marques de dignité, fait plus respecter & redouter nos Princes, que l'effort plus pressant d'une armee: & vn Magistrat enuoyé de la part des Cours souueraines, apporte à vne ville plus de terreur, d'estonnement, & de crainte, que le siege rigoureux d'un puissant exercite, ny le tonnerre d'un canon. L'estat de Frâce planté sur l'ordre de ceste police, a flory vigoureusement par l'espace d'environ douze cens annees, sans querien l'ait tant cōserué en paix que les Magistrats. Parce que c'est sur eux que le peuple a remis & déposé le

soin de ses affaires, & en qui il a toute
creance: ne voyât que par leurs yeux,
comme à trauers la glace d'un miroir:
& ne cognoissant qu'après leurs iuge-
mens, qu'il regarde fixement pour a-
dresser cōme estoilles. Si biē qu'il sem-
ble, que toutes choses non verifiees,
& autorisees de la prudente inter-
uētion des Magistrats, luy soiēt dou-
teuses & suspectes. Tout cela doit fai-
re ressouuenir au peuple qu'en la cō-
position d'un Estat bien policé & re-
glé, il ne tient que la place que se peut
donner la chair en la cimetrie, & as-
semblage d'un corps humain. Elle est
bien en plus grande quantité, & sur-
passe de poids tout le reste de la con-
stitution de l'hōme. Sa masse est bien
plus grosse & plus pesante, & semble
de son branle deuoir emporter tout
le corps: mais elle ne sçauroit subsister
ny se tenir debout toute seule, & d'elle
mesme. Elle se lairroit couler & choir
mollement de lascheté, & de foibles-
se, si elle n'estoit appuyee & supportee
de la force des os : elle demeureroit

PHILIPPIQUE IIII.

oisieue, morne, & sans mouuement, si les tendõs, les muscles, & les nerfs ne la manioient; ellen'auroit ny resolution ny aduis si elle ne l'empruntoit de la teste: & resteroit sans vigueur & sans esprits si elle ne luy estoient enuoyez & inspirez du cœur: qui sont les facultez & rangs naturels que les autres premiers Estats, cõme plus nobles & principaux mēbres obtiennent si iustement en la structure, & bastiment d'un grand Royaume. Or soit que le peuple par vne inclination & lumiere naturelle, par la conduite des sages loix de l'Estat, par quelque secrete & interne puissance animee de la vigueur de l'Euangile, & par ce qu'il peut auoir en soy de semence de bien, & de disposition à la vertu, se moulast & reglast sur les pas des autres ordres: il ne pensa iamais en la ieunesse, en la fleur & integrité du Christianisme, à se separer de l'obeissance des Roys, pour la diuersité de Religion & de croyāce. Les premiers Chrestiens de Iudee, se firent martyrer des suppli-

ces cruels d'un nouveau Tyran esleué de leur nation, & produit de leur sang mesme, pour ne vouloir quitter en sa faueur la subiection estrangere des Empereurs Romains, où le courroux de Dieu l'auoit rangé: sous la dition & sceptre desquels la grace & commandement de son fils l'auoient cōfirmé, & estraint de tant de nœuds d'obeissance. Ce sont les claires preuues de ceste fidele patiēce des peuples, qu'on vit reluire en toutes les violentes persecutions que les Chrestiens souffrirēt de l'iniustice de l'Empire Romain sous douze cruels Princes: mesmement en ceste sanglante boucherie de Chrestiens, ouuerte furieusement en la Gaule sous le regne de Marc; où ils se laisserent boureller à milliers de toutes sortes de tourments, sous les Edicts rigoureux de ces Princes de contraire Religion, sans iamais rejeter, ny secoüer ce ioug si dur, & insupportable. Gregoire de Naziãz e depeint au vif en vn particulier ouurage, le deuoir que les peuples sont te-

PHILIPPIQUE IIII.

*Socat. 4.
cap 14.*

nus de rendre à leurs Princes ; & tout le peuple d'Edeffe ne cuida iamais estre assez à temps pour receuoir le supplice à quoy Valens l'auoit destiné : sans se reuolter, sans contredire, ny contester que pour auoir la premiere pointe du martyre : ce qui se pourroit appuyer & illustrer de la suite & clarté d'autres exemples. Tous les ordres de l'Estat Romain se sont donc monstrez ainsi constans, & assurez en la foy des Princes, pendant la premiere purité de l'Eglise : sans que la contrariété ou difference de Religion les ait tant soit peu desmeus, ny esbrâlez de de ce respect. Ce sont les preceptes de fidelité, qui ont consacré leur memoire à l'honneur & à l'eternité, & le chemin qu'ils ont ouuert & aplany à tous les peuples, qui de mesme ardeur de courage voudrôt suiure, & embrasser la foy & charité Chrestienne, dont ces belles lampes ont esté si viuëmēt esprises & enflammées ; pour esclairer à iamais de leur vertu, les ombrages des diuerses & douteuses

actions de leur semence. Toutes fois, parce que l'Eglise n'auoit encores osé frapper les Princes des coups mortels de son espee, ny entamer leur Majesté inuiolable des traits espouuentables de ces censures : lors qu'on a pensé que les Roys auoient receu quelque pointe de la liberté de ce glaïue, leur Estat s'est-il resenty des blessures de leur ame ? l'Empire a-il languy des douleurs, & de la maladie de leur esprit ? Le pourpre esclatât de leur manteau Royal, a-il passy de la peur de ces horreurs eternelles ? les agitations de ces foudres si celestes, ont-elles fait chanceler leurs terres ? L'Empire Romain ne nous a non plus laissé ces exemples de perfidie, & infidelité enuers les Princes qu'on presume trop legerement auoir esté excommuniez, que contre les Etniques, Heretiques, & Athees. Car encores que ceste redoutable censure de l'Eglise ne puisse arriuer, ny atteindre iusques à la personne des Roys, que le respect de l'image de Dieu semble affranchir de

PHILIPPIQUE III.

ceste crainte; que tous les premiers Peres, & les anciēnes Eglises se soient contenues dans les termes innocens de ceste Chrestienne modestie, de n'offenser iamais ces majestez sacrees des atteintes horribles d'anatheme, dont la grandeur de leur Estat, & la dignité de leurs personnes les auoit garantis; & que le puissant vol des aigles Romains les eut portez & logez au dessus de toutes ces mauuaises fortunes. Toutesfois on nous avoulu faire accroire que Theodose le Grand, Archadius, & Anastase auoient esté excommuniez. Mais pour cela, vit-on esmouuoir quelque trouble, ou reuolte en leur empire? N'y garda-on point l'obeissance inuiolee & sacree: & leurs dignitez aussi entieres qu'auparauāt? Quel Prince fut plus aimé ny plus religieusement honoré de toutes les Eglises, que Theodose le Grand? A qui recoururent-elles plus ardāment en toutes leurs plus pressantes afflictions? A qui s'adresserēt-elles plus confidēment en toutes affaires volontaires?

A qui seruirent les Papes avec plus d'humilité & d'honneur qu'à Archadius? A qui escriuirent-ils iamais avec plus de respect, & de declaratiō & apparence de subiectiō? Quel trouble vit-on naistre en l'Estat d'Anastase, produit de la racine sterile, & sauua-^{*Sofom. 8. cap. 18.*} ge de ces censures extraordinaires & nouuelles, trop irreuerēment cōtrou-^{*Euagr. lib. 3.*} uees contre les Princes? Il faut consentir icy avec moy; & confesser que ces conjurations contre les Princes n'ont esté iamais proposees, ny mises en auāt, que par ceux qui se sōt voulu faire voye par ceste fanatique terreur à trauers de l'ignorāce & stupidité des peuples. Qu'elles n'ont esté exercees que pour rair par ce superstitieux artifice les sceptres & couronnes des Empires; lors qu'on a trouué la discipline trop molle, & relaschee: les loix ciuiles corrompues, abatues, & gisantes par terre: & la Majesté des Princes trop raualee par la nonchalance, & les delices. Et toutesfois ce n'auoir pas esté la seule sagesse & se-

PHILIPPIQUE III.

uerité Romaine , qui par les solides liens de leurs rigoureuses sanctions, auoient si longuement & entierement retenue ceste fidelité des peuples, en la vigueur & perfection de l'Empire. Qui monstre clairement que le mal, & le feu de ceste playe si mortelle estoit allumé de l'ambition de quelques esprits trop ardans, & entrepreneurs: & que ceste contagieuse maladie estoit plustost coulee de la corruption de la discipline Ecclesiastique, que de la lascheté & oisueté des loix ciuiles mal exercees. Autremēt, si ceste sainte reuerēce, & la constance de ceste fidelité n'eust esté attachee que des nœuds de ces admirables cōstitutions Romaines, l'obeissāce se fust simplement bornee des limites & frōtieres de l'Empire Romain, sans s'estendre, ny gagner plus auant : eust peut estre fait donner la gloire de ceste assurance de l'Estat, à la prudēce des loix politiques, ou leur imprimer la honte de la decadence & ruïne de l'Empire: & iuger en fin tous ces constants ef-

fects de seruice, purs ouurages de l'entendement humain. Mais en ce que ceste fidelité s'est esgalement, & généralement espondue, par tout le monde, qu'elle s'est tousiours trouuee pareille, semblable, & vniforme en toutes nations, quoy que differentes de mœurs & de police, comme diuerfes de visages, d'humeurs, & de païs : il faut croire qu'elle a esté principalement esclose & formee de la bouche de ces sacrez trompettes, qui ont publié si purement & simplement la Parole de Dieu par toute la terre. Que ceste diuine loy de respect a esté deliberée & concludue au cōsistoire eternal du Pere celeste, en l'honneur de ses Lieutenants : qu'elle a esté escrite & signee du sang innocent de son fils : grauee, & marquee du sceau veritable de l'ardente charité de son esprit, & liée des attaches de nostre Religion, pour estre apresportee vniuersellement par tout le monde sur les aîles eternelles de l'Euangile. Qu'on iette les yeux de tous costez ; on trouuera que ceste fi-

P H I L I P P I Q U E I I I I .

delité Chrestienne & Catholique, fondée sur nostre croyance, comme marque & enseigne indubitable du Christianisme, a laissé des traces ineffaçables de sa vertu, dans les ames de tous les peuples. Car les Chrestiens de la

Gregor.

Turonens.

Gaule porterent longuement le sceptre de Clouis, encore que ce Prince fust profondement ensevely dans la nuit du Paganisme & des superstitions Etniques, sous les ombres desquelles il auoit esté esleué & nourry àueuglement. Et leurs prieres non leurs armes le donnerent en fin à l'Eglise, où il entra sans violence ny contrainte: victorieux, triomphant, & chargé des despoüilles de ses ennemis, par la seule porte de la cognoissance de tant de glorieuses victoires, qu'il iugea ne pouuoir sortir que de la main de Dieu, & des vœux religieux de ses subiects Chrestiens, & fideles. Les François mesmes seruirent longuement d'une

Turonens.

3. cap. 44

foy entiere le Roy Chilperic, qui d'une horrible, & plus que sauage heresie, confondant & embrouillant les personnes,

personnes, & relations distinctes de la sainte Trinité, réuersant tous les fondements de nostre Religion, pestesmesloit le Pere, le Fils, & le S. Esprit en vne mesme personne: qui en tout le reste de sa vie se portoit fort irreligieusement, grand & violent persecuteur des Eglises de Tours, de Poictiers, & de Limoges. Quoy Brunehaut? N'estoit-elle pas Arrienne? Et pour cela Sainct Gregoire ne laissa pas de luy escrire avec tout respect & honneur; de l'exhorter à la sage conduite du Royaume, de l'eschauffer à embrasser & aduancer les affaires de l'Eglise. Animât les François à la mesme fidelité, dont on auoit veu auant son aage, le Languedoc, & vne grande partie d'Aquitaine tendre doucement le col sous la dominiô de Theodoric Roy des Gots, grand sectateur de l'heresie Arrienne? Quelques vns ont autresfois pensé, que contre l'honneur & la crainte des diademes, contre la continence & reuerence Chrestienne, & contre la modestie naturelle des Fran-

*Idem. 4.
cap. 47.*

Turonens.

P H I L I P P I Q U E I I I I .

Vſſerg.

*Turonens.
in vitis
Patr.*

*Hiſtoires
de France.*

çois, Sainct Germain auoit oſé ex-
communier Aribert: & que Theodo-
bert & Clotaire auoient ſenty les ai-
gres pointes des cenſures de Nicetius.
On a veu ſouuent les Papes meſmes
leuer le bras pour foudroyer de la tem-
peſte des plus furieux anathemes,
Philippe I. Philippe Auguſte, Phi-
lippe le Bel, Charles 6. & Loys 12.
Mais iamais nos Peres ne penſerent à
quitter le ſeruiſe de ces Princes, ou à
branſler & chanceler tant ſoit peu au
deuoir de leur obeiſſance: ny pour la
crainte de la cōſcience, ny pour la hai-
ne de leurs mœurs, ny pour l'horreur
de l'excōmunication. Ils proteſtoient
touſiours hautement de vouloir viure
& mourir fideles à leurs Princes, de
ne pouuoir releuer, ny tenir leurs biēs
& leurs vies que de leurs Roys natu-
rels: & ſe vantoient que rien du mon-
de, non pas les coups plus enuieux de
la fortune, non pas les traits iniurieux
du Ciel, qu'on feignoit d'attirer à
leur eſtonnement & ruïne, ne pour-
roient fleſchir & corrompre leurs con-

stancesprits, au nouveau desir d'un autre Empire. C'est la declaration genereuse & fidele de tous les Estats de France, assemblez à Paris sous les lettres de Philippes le Bel, pour repousser & rabattre les fureurs de Boniface 8. Nos peres ont trop prins à cœur la bonne fortune de leurs Princes, & pour en parler franchement avec verité, ont esté trop bons Chrestiens, & trop bons François, pour acquerir ce reproche d'infidelité: pour en tacher la memoire de leurs peres, ou en laisser couler la lie & la souilleure sur les testes de leurs neveux. Ces pommes de discorde, ces semences de reuolte ne trouuerent iamais champ, ny racine en France. Tous ces feux violens de diuision nous ont esté soufflez, & enuoyez de pais estrangers. Ces exemples de desobeissance nous ont esté apportez comme fruiçts sauuages, & aubains; esclos & poussez des vents pestilens d'Italie, & d'Espagne. Mais pourquoy? Car ces deux prouinces qui nous separét, & diuisent si cruelle-

PHILIPPIQUE III.

ment des glaiues de leurs factions, qui corrópent, & infectent l'air de ce salubre Royaume de la cõtation de leurs mœurs, ont longuemēt adoré le pourpre des Rois heretiques, & leur ont réduite vne deuotieuse obeissance. Pense-on qu'on ne se ressouuienne plus, qu'après la grãde inondation de l'Empire, par les rauages & desbordemēs de tant de peuples nouveaux & estrangers, l'Italie vesquit soixante dix ans sous le sceptre des Roys Gots, tous Arriens formez, & obstinez? Que les Archeuesques de Rome depuis Innocent I. iusques au pontificat de Siluerius, leur représenterent tous les effects qu'on peut attendre d'vne fidele seruitude? Qu'ils prindrent leurs promotions & cõfirmations de leurs mains, selon les loix que les Herules auoient auparauant prescrites & donnees aux peres Romains, & à leur priere? Ils demanderent pleins d'humble affection à Atalaric, que tous les Euesques de son Royaume ne receussent l'institution, & caractere que de l'authorité de leur

*Theodor.
lector.
2. Collect.*

siege. Iean 2. & Agapit furent Am-^{Platin.in}
 bassadeurs ordinaires, & entremet-^{Iohan.2.}
 teurs des plus grandes affaires de ce-^{& Agapit.}
 ste monarchie Gotique : Et les Eues-^{Simoneta.}
 ques de Rauenne affecterent souuent
 avec contétion & enuie de se faire em-
 ployer en mesmes charges. Depuis,
 les Lōbards rauissant l'Italie à Iustin
 2. par les pratiques de Narfes, outré
 du despit & mespris de sa condition,
 succederent à l'État des Gots, sous la
 conduite & les armes d'Alboin : re-
 marqué au reste pour si grand idola-
 tre, qu'il adora publiquement deux
 Dieux, vn bon, & vn mauuais. Beau-^{Paul.}
 coup d'autres Roys de sa nation ne^{Diac.}
 furent pas plus gens de bien; & firent
 vne si claire & ouuerte professiō d'he-
 resie, que Rothaire establit par tout^{Paul.}
 deux confessions, & fit ouurir egale-^{Diacon. de}
 ment deux Eglises, l'vne Orthodoxe,^{gest. Lōgo-}
 & l'autre Arrienne. Iean 3. ne laissa^{bard.}
 pas pour ce subiect de l'honorer & as-^{4. cap. 15.}
 sister fidelement : & l'Italie sans man-^{Sabell.}
 quer de deuoir, ny de seruice, fut ainsi
 commandee des sceptres heretiques

PHILIPPIQUE III.

iufques au temps de Sainct Gregoire. De qui la lumiere & la doctrine, tirant ce peuple au cugle & defuoyé hors des erreurs & tenebres de mort, le ramena dans le droit chemin de la vraye & vnique Religio Catholique. Que respondra icy ceste Espagne audacieufe & turbulente, qui remue & esbranle par tant de sortes d'artifices tous les Eftats de la Chrestienté; qui trouble le Christianisme mefme de tât de nouveaux abus: qui veut accabler la Religion fous le poids de tant d'herreurs ambitieufes, fardees de fa naturelle hypocrisie? N'a-elle pas esté fubiecte aux roys Vádales cruels heretiques, comme Gonderic? N'a-elle pas rendu pleine & paisible obeiffance à vne longue fuitte de Roys Gots Arriens, cōme Sigeric, Vallia, Theodoric 2. Thorismond, Amalaric, Gifalaric, Theuda, & Ricaredo? Ces princes tous gastez & pourris d'heresie, n'ont-ils pas mandé & afsemblé les Cóciles, manié & traicté de leurs impures mains hors de contradiction &

Sabell.

resistâce toutes les affaires de l'Eglise,
 & les celestes mysteres des Chrestîés:
 sans que la Religion en ait receu ny
 tache ny offense, non plus que les
 beaux rayons du Soleil qui passent à
 trauers des lieux corrompus, & re-
 posent sur la bouë la plus sale, sans en
 rapporter l'infection ny la souilleu-
 re? Il est certain qu'encore que beau-
 coup de belles & viues lampes de la
 Religion Catholique, esclairassent
 en leurs Eglises, ils ne deffillèrent ia-
 mais les yeux, agrauez d'un si pro-
 fond sommeil d'erreur, qu'au temps
 du troisiésme Concile de Toledé: où
 Recarede, & tous les Gots esueillez
 de ce somme mortel par la clarté de
 nos exemples, despoüillerent & ab-
 iurerent l'Arrianisme d'une confes-
 sion publique, & celebre. Depuis Re-
 secute broncha en leur vieille, & pres-
 que naturelle heresie; & l'Emugilde
 plus cruel, en faueur de sa superstition
 affligea outrageusement les Eglises
 Catholiques; sans que Leandre Euef-
 que de Seuille, ny ses autres subiects

*Cöcil. To-
 let. 3. Tom.
 2. Concil.*

Sabell.

PHILIPPIQUE III.

de toute condition, rōpissent la fidelité dont leur conscience les lioit si estroitemēt à son Empire. Ie m'estonne cōment l'ambition desbordee de ce superbe Castillan, public ennemy de to^o les Princes, ose ainsi solliciter & tenter en tant de façons la chaste foy des peuples Chrestiens? Cōme il destourne si loin sa veuë des seueres peines, dont les Cōciles de sa nation ont rāt cōbatu la perfidie. Cōme il peche si insolēment cōtre la foy de son Eglise? Mais quelle foy, & quelle Religio a-il, que pour la mōstre? S'il estoit touché de quelque legere atteinte de pieté, s'il portoit quelque qualité, ou sentimēt cōuenable au nō de Catholique, s'il logeoit en son ame la moindre apprehēsiō de la crainte de Dieu, s'il honoroit & respectoit tant soit peu les sainctes censures de l'Eglise, de la feinte reuerence desquelles il pense sourdement sapper, & renuerfer tous les Estats, pour bastir & esleuer de leurs ruïnes vne tyrannie vniuerselle de tous les Chrestiens: Ne sçauroit-il
pas

pas pour les droits de son sceptre mesme, & l'asscurâce de sa couronne, que comme l'Espagne a esté fort infidelle & legere, il n'y a prouince au monde où la fidelité & l'obeissance ayent esté attachees, & liees de plus seueres & fortes chesnes? Le cinquiesme Concile de Toledé excommunie les subiects desobeissans: & le sixiesme anime & excite d'honneur, confirme, & affermit de grace, & de merite, la fidelité & perseuerance: & foudroye des poinctes acerees d'anatheme la desloyauté & rebellion. D'une pareille iustice, le septiesme Concile de Toledé destitue, & depose les gens d'Eglise infideles au Prince, priue les subiects rebelles des commoditez du bien temporel, les despoüille de tous honneurs: & separe de la bonne grace de l'Eglise les clerics, & les laiz qui remueront quelque chose contre le seruice des Roys. Declarât par vn decret expres, que ce n'est aux Euesques à cōmāder à ces hautes Majestez, qu'il n'en faut approcher qu'avec reueren-

Can. 5. ^{et}
18. Concil.

6. Tolet.

Tom. 2.

Concil.

Can. 1.
Concil. 7.

Tolet.

PHILIPPIQUE III.

*Can. 1. Et
seqq. Conc.
8. Tollet.*

*Tom 2.
Concil.*

*Tom 3.
Concil.*

*Paul.
Diac.
Sabell.*

ce, & prieres. Le huitiesme passe plus
 auant, & ordōne d'obeir au Roy quel
 qu'il soit : d'autant que ce respect &
 ceste foy, regardent plus droitement
 l'Estat & la dignité du Prince, que sa
 personne. Et le douzieme, nouiant &
 serrant la subiection coulante de ce
 peuple, de toutes sortes d'obligations
 & de liens, accable d'imprecations ri-
 goureuses & mortelles, tous ceux qui
 oseront seulement ouurir la bouche
 pour offenser les Roys d'une parole.
 L'Espagne ployee par la terreur de
 ces césures, ou courbee de la naturel-
 le inclination qu'elle a aux impietez,
 & heresies, porta longuement en pa-
 tience le commandement des Sarra-
 zins. Et puis, fideles, on vous dres-
 se icy comme des contrebateries, on
 pointe les censures contre les censu-
 res, on oppose la foy à la foy, on ban-
 de l'Eglise contre l'Eglise? A qui croi-
 rez-vous maintenāt? Vous arresterez
 vous plustost à vne particuliere do-
 ctrine d'ambitiō, aux impostures des
 bouches mercenaires d'Espagne, qui

vous annoncent vne Thcologie armee, toute ruiſſelante de ſang, toute tachee de meurtres, toute marquee de vos ruïnes, qu'à la pure & innocente parole de Dieu, qu'à la foy vniuerſelle de toute l'Egliſe, que vo^r trouuez cõ-forme & pareille par tout le monde, que vous contemplez ſi viue & eſclairante ſur les autels meſmes de vos ennemis? Ne voyez-vous pas cõme ils ſ'embroüillent & enlacent eux-mesmes, de tous les lacqs de ces cenſures qu'ils auoient tendues à voſtre ſaincte fidelité? Vous auez teſmoigné voſtre foy par tant de preuues, vous auez declaré voſtre deuoir par tant de nobles ſeruices, au hazard de vos biens & de vos vies; qu'on ne doit iamais craindre, que toutes ces vaines terreurs vous puiſſent deſtourner des pas reglez de ce chemin, que vos peres vous ont ſi ſagement frayé, & où vous auez marché ſi lôguemēt plains de fidelité & d'aſſurance. Mais vous, qui faiſiez autres fois partie de ceſte fidele France: nos anciens amis & nos

PHILIPPIQUE III.

freres, qui vous voulez ainsi perdre ensemble ce nom d'honneur, dans les destours & les cernes de ces magies estrangeres : sentez-vous encore vos esprits enchantez, & endormis des asopissemens de ces diuerfes illusions? Retiendrez-vous tousiours ces bandeaux d'ignorance & de malice, qui vous sillét les yeux sur le bord de vostre ruïne? Vous ietterez-vous à corps perdu dans ces desesperez & effroyables precipices? Faut-il apporter encore icy d'autres flâbeaux, pour chasser ces feintes ombres qui attachét & fermét si pesammét vos paupieres: pour vous esclairer plus viuement en la fausse nuit de tous ces foibles sortiliges? Faut-il bien médier en vostre faueur de la fidelité par tout le monde? N'y sçauriez-vous plus voir qu'à trauers le cristal de la claire foy de tous les peuples? Ne vous sçauriez-vous releuer de deffous ce poids de legereté, si toutes les nations ne vous venoient donner la main? Vous n'espereriez donc point de guerison, si on n'alloit

rechercher, & cueillir ces herbes salutaires pour vostre medecine, en tant de iardins estrangers? Vous ne sçauriez rassagir si on n'alloit quester ainsi bien loin de l'hellebore? Vous ne pourriez plus redresser vostre foy sans l'appuyer de l'exemple des autres peuples? Quel vniuerselle fidelité de l'Eglise vous seruant de fanal en la nuit de ceste confuse tempeste, & au dernier peril de ce naufrage, vous ramene donc à l'obeissance; & vous rende sainement au port asséuré d'vne paix. Car si vous flattez tant vostre mal, si vous desirez de satisfaire si plainement à ceste ignorance volontaire; l'Allemagne vous apprendra qu'elle a honoré beaucoup de Princes Gentils, & Heretiques, sans changer ny affoiblir le deuoir de la subiection. Et pour l'Estat de ces courageux Emperours à qui on a si souuent attenté de declarer l'anatheme, pour vne nouuelle & feinte marque d'erreur, forgee malicieusement contre l'honneur & l'autorité des droicts Royaux, contre la

PHILIPPIQUE III.

*Vſpergenſ.
Friſing.
Naucler.
Auentin.*

*Auentin.
Naucler.
Vſperg.*

saincte faculté des inueſtitures, & promotions des Eueſques, appellee d'un nom ennemy, l'heresie Henricienne: on vit autresfois Henry 3. 4. 5. Federic 1. & 2. Conrad, Otton 4. Loys de Baviere & autres, assaillis rudement des plus furieux traits de ces ambitieuses censures, sans que iamais les Eglises de leurs Empires ployassent, ny flechissent laschement en leur Chrestienne obeissance. Au contraire, les Cardinaux comme Benno, & presque tous les Eueſques Allemands, à l'imitation de Guillaume d'Utrecht, de Valdramus de Nuremberg, des Archeueſques de Cologne, & de Majence, entreprindrent courageusement leur deffense; se banderent contre ceste dangereuse faction, & la condamnerent en plain Concile. Arrestât par les fideles decrets de beaucoup de saintes assemblees, qu'il falloit obeir aux Princes quels qu'ils fuſſent, sans entrer au iugement de leurs consciences. Le Moine Sigibert, appella ceste façon de reuolte, vne vraye & qualifiée he-

refie: & le miserable Rodolphe esle-
 ué par les vagues de ces tempestes &
 troubles d'Allemagne, dans les nuës
 d'une confuse ambition de l'Empire, *vſp̄erg.*
 en l'injure de Henry 3. mourant le bras
 couppé d'une playe receüe en la rou-
 te & perte signalée d'une cruelle ba-
 taille, s'escria hautement en la face des
 restes de son armee deschiree, qu'il a-
 uoit iustemēt perdu la desloyale main
 qui auoit osé tirer l'espee contre son
 Prince legitime. Ainsi l'Angleterre,
 & l'Ecosse ont seruy des Roys infide- *Polidor.*
 les de diuerſes nations: & conseruē *Boet.*
 l'obeissance à beaucoup de Prin-
 ces, sur qui les Papes auoient desco-
 ché, & deschargé toute la rigueur &
 la tempeste des anathemes. L'Arra-
 gon ne rompit point pour la dou-
 leur de ces playes, & l'effroy de ces
 terreurs, la iuste foy qui l'obligeoit à
 la subiection du Roy Pierre: La Po-
 longne ne se monstra iamais eston-
 nee, ny esmeuë, des horreurs de ces
 censures, publiees par l'Archeuesque
 de Gnesné contre l'autorité du Roy *Cromer.*
lib. 10.

PHILIPPIQUE IIII.

Sax. Grā. matic. Henry: Le Danemarck a fidelement
Grantz. in porté le ioug de Suenno & de Gor-
Metropol. mo: la Saxe a obey franchement à
 Mistauc & Vdon Roys des Vandales:
 la Holface a ployé constâment sous la
 domination violête de Godescalc: les
Sofom. 2. Eglises de Perse se sont portees tres-
cap. 8. & 9. humbles & deuotieuses enuers leurs
Socrat. 7. Princes, comme Sapore, Isdegerde &
cap. 8. Cosroës: Et les Empereurs Romains
Euagr. Catholiques ont escrit d'vne plume
Nicephor. affectionnee à ces barbares, pour la
 paix & soulagement de ces pauvres
 Chrestiens, modestes & fideles. Que
 diray-ie dauantage? Les Catholi-
 ques d'Affrique n'esbranlerent iamais
 les sceptres des Roys Vandales, quoy
 qu'heretiques & tyrans. Leurs saints
Vi. For. Euesques, comme Eugene de Cartha-
Vticenf. ge, Felix Abiritain, Cyprian Vinzibi-
de perseq. rense, Mâsuetus, Germanus, Fusculus,
Vandal. Hortulanus, Florentinianus, & autres
 graues personnages dont la fidele me-
 moire est cōsacree à l'eternité par Vi-
 ctor Euesque d'Vtique, contindrent
 tousiours en deuoir les subiects de ces
Princes,

Princes, bien que foulez & opprimez en mille façons sous les ruïnes de la Religion : sans que iamais vn seul homme de toutes leurs Eglises osast leuer la teste, pour la tirer de deffous le faix d'une si violente seruitude. Ces fideles & sages Chrestiens, aussi passionnez & ialoux du bien & aduancement de nostre foy, qu'autre peuple qui ait porté les marques du Christianisme, pensoient si peu blesser leurs consciences du seruice des Roys Vadales, qu'ils importunerent mille fois Genseric, lauerët ses pieds superbes de mille ruisseaux de larmes pour les attendrir & amolir à la misericorde: & tascherent à gagner & ployer son esprit obstiné par toutes sortes de vœux & de seruices, pour obtenir deluy qu'il les laissast en repos & en seureté sous son obeissance, prier Dieu pour sa santé & le bon-heur de sa fortune, sans vaguer plus longuement escartez par les deserts cōme pauvres bestes sauvages. Ils le presserent d'une infinité de gémissements & de souspirs, de leur accorder

PHILIPPIQUE III.

& permettre seulement pour toute re-
Idem lib. 1. fidence vn chetif & sterile coin de ter-
 re sur le bord Maxilitain : pour y pas-
 ser le reste de leurs miserables iours,
 sous les fascheuses & cruelles loix de
 son regne. L'Empereur Valentinian
Idem lib. 3. Et 4. luy en fit vne instante priere: & Zenon
 en escriuit de bonne ancre au rigou-
 reux Huneric. Car ces monstres d'Af-
 frique, affligerent si cruellement les
 Catholiques, que Transmôd leur in-
 terdit sur peine de la vie, l'exercice de
 nostre Religion: & fit bannir de l'iniu-
 stice & impetuosité d'un seul Edict en-
 uiron deux cens vingt Euesques, qu'il
 fit transporter en Sardaigne au temps
 du Pape Symachus. Mais Eugene E-
 uesque de Carthage ayant appaisé, a-
 doucy, & si se peut dire ayant vaincu
 Gontamond par sa patience & sain-
 cteté, & par tant de diuerses merueil-
 les de sa vie: fit reuoquer d'exil les Or-
 thodoxes, & ouurir de nouveau les
 Eglises Catholiques, qui rendirent à
 ce Prince vne subiection constante &
 fidele. En fin on void encore aujour-

Paul.
Diac.
in Anast.

d'huy beaucoup de Chrestiens de toutes conditions, resider en Ierusalem sous l'obeissance du grand Seigneur, sans violer la dignité de son Estat, sans troubler ny esmouuoir en rien ce grād & croissant Empire, le fleau cruel de la Religion, & l'ennemy iuré du Christianisme. Si ceste perfection de la fidelité Chrestienne s'est ainsi rencontrée bien esgale, & semblable en toutes sortes de nations, si elle s'est trouuée saine & entiere dans les playes de tant d'Empires, si on l'a admirée coye & paisible par tout le monde entre les flots esmeus de tant de diuerses persecutions, & dans les contentions plus violentes de la diuersité de Religion, & de croyance, elle doit obtenir beaucoup plus seure place dans les ames des François, dont rien du monde ne la sçauroit arracher, sans la ruïne & renuersemēt de l'Estat; pour estre partie de sa substance, & vne qualité essentielle, & inseparable de ceste noble nation, produite & accreuë d'une longue semence de loyauté, premiere &

Ggij

PHILIPPIQUE III.

ancienne gloire de la France. C'est pourquoy le sujet d'obeissance seroit vne bien maigre & legere occasion, & vne trop injuste & rigoureuse cause pour nous faire perdre la communion des Chrestiens, & nous chasser si rudement hors du giron de l'Eglise: puis que ceste obeissance est la purité mesme du Christianisme, la foy generale de toute l'Eglise, l'exemple honorable de nos peres, la belle leçon de toutes les Eglises, & l'eschole publique & ouverte de la vertu de tous les peuples. D'ailleurs, nous sommes en trop bon nombre, pour nous oser abyssmer si temerairement dans les gouffres de ces censures. L'extermination de tant de Chrestiens & Catholiques feroit vne trop grãde playe à l'Eglise, & apporteroit trop de douleur & de ruine à la Chrestiété, si on laschoit ainsi la bride cõtre nous à toutes ces passions estrangeres. Nous faisons vne bõne partie de l'Eglise, de grandeur & de nõbre, comme d'autorité & de vertu: & ceux qui nous voudroient mettre si legeremēt

hors de l'Eglise sy trouueroient bien tost seuls , ou peu & mal accompagnez, quand nous en serions vne fois sortis. Le danger commun de beaucoup de personnes qui courent mesme fortune , est extremement considerable en la police de la Religion, comme en l'ordre & constitution des Royaumes. Le nombre des pecheurs fit que saint Paul n'osa retrancher de ce corps mistique beaucoup de membres pourris & infects : & le Pape Estienne I. ne s'osa pas retirer de la communion de Saint Cyprian quand il le vit si bien assisté & suiuy. S. Cyprian auoit enuie de se separer de quelques Euesques, dont il abhorroit & detestoit la contagieuse & scandaleuse façon de viure : mais il se retint sur ses pas, bornez de la crainte d'un mal si general : & differa quelquefois de rendre la paix à ceux qui estoient tombez, pour ne pouuoir ranger & flechir à ceste douceur, les fantasies & dures testes de son peuple. Par là S. Augustin desnoüant & desueloppant du

*Ep. Paul.
ad Corint.*

PHILIPPIQUE III.

*Augustin.
contra
Donatist.*

tout les difficultez plus meslees de ceste ancienne question, és discours qu'il a laissez cōtre les Donatistes, deffend de tirer iamais le glaive de l'Eglise lors qu'il y aura tant soit peu d'indice & d'apparence de diuision, & de schisme. Censurons (dit-il) les pechez que peu de gens reuanchent, & qui n'ont guiere de garents, pour ne rompre & ne troubler point l'vnité de l'Eglise. Que si la pluspart des peuples sont frappez fort auant de quelque fieure & maladie des ames; il ne nous reste plus rien que la douleur pour plaindre leur mal & leur defastre, & de longs fleuues de pleurs, pour leur aider à lauer les ordures & les taches de leurs vices. Les anciens peres n'ont donc iamais esté d'aduis d'vser d'excommuniement contre vne multitude; principalement pour les mœurs. Qui est tout le mal que l'Espagnol no^s ose icy reprocher: parce que cōtre l'honneur, & l'asleurâce mesme de son Estat, il forge & fait vn nouveau crime de l'Obeissance. Car pour la foy &

la Religion, par la grace de Dieu nous la retenons & conseruons entiere, pure, nette, & impollue. Et bié que nous nous deffendions de ces abus, qui à nostre dommage ont coulé des licences de Rome, dans la police de l'Eglise : nous auons iuree la foy Catholique toute pareille & semblable à la Romaine. Par laquelle, comme d'un iuste niueau & regle certaine, nous mesurons les confessions de nostre croyance : la regardant & obseruant tousiours d'un œil ferme, comme vne feure bouffole, cōme le quadran & le pole de nostre nauigatiō. Pour auoir planté bien auant ceste constante resolution dans nos ames, de vouloir plustost souffrir toutes choses extremes, que chāger la Religion que nos peres nous ont imprimee de naissance : & d'aimer mieux mille fois perdre la vie, que voir esteindre, ny languir en nos cœurs l'ancien flambeau de nostre foy, dont le Roy mesme a iuré la protection & la deffense. N'estans dōc notez d'heresie, ny suspects d'er-

PHILIPPIQUE III.

reur, on ne nous peut escarter ny repousser de l'Eglise, puis que le saint lien de la foy nous y retient, puis que ce genereux dessein nous y entretient & conserue contre tous les injurieux: assauts de l'enuie de nos aduersaires. C'est la foy qui bastit, qui forme, & viuifie l'Eglise. Les Apostres l'appelloient la multitude des croyans: & ce sont les enseignes eternelles, & plus illustres noms d'honneur de tous les premiers Chrestiens. L'Eglise avec beaucoup de proportion & de raison, est comparee par S. Gregoire à vne pomme de grenade bien saine, dont la belle escorce enuelope, & entourne tous les grains, de mesmes que la foy contient & enferme les peuples Chrestiens en l'Eglise. De sorte que comme il est impossible à tous les entendemens humains, tant que ceste peau reste entiere & non entamée, de faire rien couler hors de la grenade: tous les artifices, ny les violences d'Espagne ne nous sçauroient desrober à l'Eglise, tant que le voile & manteau

Act. 4. 1.

Enseb.

manteau sacré de la foy non desmembré, non deschiré nous couvrira de son assurence. Toutesfois quand nous serions tombez en quelque faute, disposée & sujette à quelque coup leger de censuré, dequoy nostre innocence nous couvre assez & nous reuanche, & on ne le peut aduancer sans calomnie:quād nous aurions appresté occasion à ce mal scandaleux, & prouqué sur nos ames la rigueur de ceste iustice: voyons l'ordre & la forme des procedures de nos ennemis contre nous! Contemplons vn peu à loisir la façon, & la mesure qu'on a gardee à nous arracher auec tant de sang & de douleur hors du ventre de nostre mere! Certes ie voy tāt de deformitez & defectuositez malicieuses, qui cōme vers sautellent, & fourmillent dans la pourriture & corruptiō de ceste Bulle, que ie feroiy trop long, si piece à piece ie les vouloy desmeler, & choisir dans ceste confusion si embrouillee. Ie me contenteray de dire, que ceste outrageuse censure n'a point esté ordonnee

PHILIPPIQUE III.

*Cyprian.
lib. 1.
Epistol. 3.*

*Socrat. 7.
cap 36.
Sofom 8.
cap. 21.*

*Tom 1.
Con. cil.*

en Concile; par ainsi qu'elle ne peut nuire à nos consciences, ny offenser ou tacher nostre reputation. D'autant que par l'autorité de S. Cyprian, les excommunications qui sont de quelque importance & de quelque poids, ou qui frappent quelque grand coup en l'Eglise, ont accoustumé d'estre concertees, resolues, & decernees en plein Concile: lors mesmement qu'on les bande, & les pointe contre la personne & dignité des Euesques, & à la perte & injure de leurs Eglises. C'a esté tousiours la regle, la forme, & l'usage de la iustice de l'Eglise, selon le tesmoignage de Socrate & Sosomen, dont les premiers des saincts peres Romains n'ont pas mescognu la police. Zephirin l'embrasse avec passion en la premiere lettre qu'il escriuit aux Euesques de Sicile: où il blasme & deterre la temerité, & outrecuidance de ceux qui oseront traiter la cause & accusation d'un seul Euesque, en plus petite & moins celebre compagnie que de douze de ces confreres: & nie

qu'on luy puisse denôcer l'excommu-
 nication, sans la prudence & delibera-
 tion de pareil nombre de voix & de
 suffrages. Iules I. & Damafus soubscri- *Epistol. 6.*
 uirent religieusement à ceste saine opi- *Damaf.*
 nion: & Gratian en preuue la verité, la *Tom. 1.*
 constance & la pratique dans deux *Concil.*
 questions particulieres de ses diuers *Caus. 3.*
 recueils & recherches. Tel est l'ordre *quest. 8.*
 prescrit & limité par le second Con- *Caus. 5.*
 cile de Carthage, dont la saincte ma- *quest. 4.*
 turité suiuite par le Concile de Tribur *Conc. Car-*
 en Allemagne, demande pour la cen- *thagin. 2.*
 sure d'un Euesque, la presence du Me- *cap. 9.*
 tropolitain, assistee & autorisee de *Tom. 1.*
 douze de ses suffragants, ou autres E- *Concil.*
 uesques, assemblez en Concile; & def- *Conc. Tri-*
 fend d'opiner contre vn simple Pre- *bur cap. 10.*
 stre en moindre nombre, que de fix *Tom. 3.*
 de ces graues Princes des Prestres. Là *Concil.*
 où au contraire de cest inuiolable des-
 feing du S. Esprit, nos violens ennemis
 sans aucune forme ny apparence de
 Concile, pensoient d'un seul coup de
 pinceau, & d'un seul trait injurieux de
 plumerayer & effacer pour iamais de

PHILIPPIQUE III.

l'eternel liure de vie toute l'Eglise Gallicane, cōposée de la saincteté & gratuité de tant d'Euesques, bastie, de la Religion de tant d'Abbez, ornee de la deuotion & purité de tant de Prestres, & autres personnes cōsacrees & voüees au culte de Dieu: parée & reluissante de la foy & fidelité & de tant de milliers d'ames Catholiques, si cherement rachetees du prix incomparable de la mort du fils de Dieu mesme. Ils n'ont pas cōsideré, aueuglez d'ambition & d'enuie, qu'ils renuersoient & fouloient insolément les saincts & sages decrets du troisieme Concile de Carthage, qui empeschent d'accuser seulement vn Euesque ailleurs qu'en plein Concile, & retiennent des rigoureuses attaches, & rudes resnes des anathemes les plus audacieux & plus forts en bouche qui entreprendroient d'excommunier quelqu'un de ceste haute marque, lors qu'il vouldra purger son innocence, ou pendant l'instruction de son procez. Sur ceste prudence le quatrieme Synode de To-

Conc. Car-
thagin. 3.
cap. 7.
Tom. 1.
Concil.

ledene permet point de depofer quel-
 qu'un de ce grand ordre pour aucune
 faute, fi ce n'est en l'assemblée d'un
 Concile. Le Concile de Tribur passe
 plus auant. Il trouue l'interuention d'un
 Concile si cōuenable & necessaire en
 ces occurrences, & renferme si seueremēt
 les excōmunications qui regardent
 les pasteurs de l'Eglise, qu'il ne
 leur permet que trois issues, & ne les
 approuue qu'en trois cas. Lors qu'on
 refuſera de comparoistre au Concile,
 où on aura esté adiourné pour se iusti-
 fier: si on s'enfuit auant le iugement du
 procez; ou si on desdaigne d'obeir à la
 decisiō du Cōcile. Il semble que les
 premiers Synodes auoient pourueu à
 ces desordres. Car celui d'Antioche
 confirmant & appuyant de nouuelle
 vertu, ce tant renommé Concile de
 Nice, auoit commencé à lier mode-
 ſtement les mains aux chefs & mo-
 derateurs des Eglises, en ces causes
 publiques & celebres: leur interdisant
 la resolution, & conclusion des plus
 grandes & plus nobles affaires, sans

Cōcil. To

let. 4.

cap. 27.

Tom. 2.

Concil.

Cōc. Trib.

Tom. 3.

Concil.

Cōcil. An

tiochen.

can. 2.

PHILIPPIQUE III.

l'aduis & meure deliberation d'une ample assemblée de la province. Aussi l'Eglise en sa premiere integrité, & durant sa belle & nette vigueur, ne laissa iamais rien destendre, ny relascher de la force & autorité de ces arrests, si confirmee de verité & d'exemples. S. Paul tombant sur le propos de l'excommunication d'un Corinthien, dit que sa condemnation auoit esté proposée, digeree, & conclue en pleine Eglise où s'estoit trouué son esprit: Et Eusebe nous assure que les modestes Chrestiens d'Asie ne censuroient les heretiques mesmes qu'avec ceste circonspection & prudence. C'est le droit & large chemin que S. Cyprian tesmoigne auoir esté fort frequeté de son tēps. Les Euesques Clemētianus & Florus ne furent conuaincus que par vn Concile: & Basilides & Martialis furent rejettez de leurs Eglises, & deposez de leurs sieges, par les suffrages presque de tous les Euesques d'Espagne. Nouatian^o ne tenoit point de rang plus eminent ny plus haut que

*D. Paul.
1. ad Co-
rinth.*

*Euseb. 5.
cap. 15. &
16.*

*Cyprian.
epist. 3. &
4. lib. 1.*

de simple Prestre en l'Eglise Romaine
 auant qu'il eust entrepris de conjurer
 ambitieusement contre la dignité
 de s^{on} naturel Euesque. Mais pour cela
 le Pape Cornelius ne s'auétura point
 de le iuger qu'en la face ouuerte de *Enseb. 6.*
 l'Eglise, desployee au Concile de la *cap. 35.*
 prouince : comme il l'asseure luy mes-
 me par ses lettres à Fabius Euesque
 d'Antioche. Encores luy fallut-il affer-
 mir & conforter ceste iuste & meure
 sentéce, de l'autorité de deux Syno-
 des, conuocquez en Antioche & en
 Affrique. Et quoy Paul Samosatense
 notoirement corrompu, & desesperé *Idem 7.*
 de mœurs & de vie, comme de foy : *cap. 24.*
 n'eut-il pas le credit d'obtenir deux
 Conciles, pour esplucher les plaintes
 qu'ô faisoit de luy, & l'ouïr en ses def-
 fenses ? Et toutesfois en ceste cause,
 comme en mocquerie & mespris des
 formes eternelles & sacrees de la dis-
 cipline de l'Eglise, on auoit reglé &
 borné le temps de nos monitions de
 trois en trois iours, pour lacer & dar-
der au neuuesme le foudre mortel d'a-

PHILIPPIQUE III.

natheme sur toute la fidele France. Il arriua, comme l'Eglise n'est iamais sans l'exercice de quelque fascherie & trauerse, que quelques Euesques Orientaux qui s'estoient laissez emporter trop curieusement à la nouveauté de l'heresie Arrienne, flatant leurs melancoliques fantasies, & s'obstinant en leurs caprices, nourrirent longuement en leurs ames d'une ambitieuse humeur, les racines premieres de ceste erreur estrange & sauuage; que la sage main de l'Eglise sembloit auoir prudemment arrachee en tant de diuerses assemblees. Mais encore qu'ils en osassent faire profession publique contre l'autorité du saint Cōcile de Nice, & que ceste pestilente heresie eust esté foudroyee & exterminée par ce Concile si celebre, de tous les traits plus forts & plus perçants des effroyables anathemes de l'Eglise : on ne s'aduança iamais pour faire le procez de ces hommes perdus, en vne cause si cōdamnee, & pour vn crime si manifeste & si notoire, que
par

par les voix du Cōcile de Lampface. *Theodoris.*
 Vrsacius, Valens, Theodore, George *2. cap. 8.*
 Alexādrin, Basile d'Ancyre, & autres
 gastez & empoisonnez de ce leuain
 corrompu, ne furent excommuniez
 qu'au Cōcile de Sardique. Photinus *Socrat. 2.*
 Euesque de Syrie fut cēsuré au Cōci- *cap. 24.*
 le de Sirmie: & pour iuger Auxentius
 Euesque de Milan, on vit ouurir plu-
 sieurs Conciles à Rome, en Gaule, &
 en Espagne. Je ne puis assez desteter la
 confusion desmesuree, & la desreglee
 façō de ces cēsures. Car pour cōvain- *Socrat. 7.*
 cre vn seul Nestorius, outre la grauité *cap. 33. &*
 du Concile Alexandrin mandé pour *34.*
 examiner & decider son erreur, il fal-
 lut encore conuoquer le Concile ge-
 neral d'Ephese. Et parce que Cirillus
 Archeuesque de Ierusalem, auoit cō-
 mencé à l'excōmunier par les suffra-
 ges de beaucoup d'Euesques, sans se
 dōner le loisir d'attendre la venue de
 tous les autres peres, attirez de toutes *Concil.*
 les parties du monde pour la tenue *Ephesin.*
 de ceste importante assemblée: Ican *Tom. 1.*
 Archeuesque d'Antioche censura pu- *Concil.*

PHILIPPIQUE III.

bliquemēt Cirillus meſme, & vn bon nombre d'Eueſques ſignerent apres luy le ſeuere decret de ceſte peine. Il y a donc bien icy dequoy cenſurer, & foudroyer tous ceux, qui ſeuls & ſans Concile ont oſé de leur propre mouuemēt & autorité particuliere, pour ſatis faire à la paſſiō ambitieufe de nos ennemis, pronōcer vn ſcādaleux anatheme contre toute l'Egliſe Gallicane, ſans cauſe, ſans ſuject, & ſans raiſon! Quelle inconfideration & deſordre? Ignoroit-on que Pelagius & Celeſtius, deux infames heretiques, n'auoient peu eſtre exterminiez des bornes de la clemence de l'Egliſe, que par l'entiere & ſolide reſolution du cinquieſme Concile de Carthage: & qu'on leur accorda encores vn nouveau Concile en Orient? Ne ſçauoit-on pas qu'Apiarius ietté en la ſauuegarde & protection de Rome, auoit eſté traitté en plain Concile ſous l'autorité d'Vrbain Eueſque de Cica, & que contre l'honneur & dignité de ceſte graue compagnie, on ne laiſſe

*Cōc. Car-
thagin. 5.
Tom. I.
Concil.*

*Concil.
Carthag. 6
Tom. I.
Concil.*

sa pas de debattre , & quereller sa destitution? Que respondra-on au trait, & au long ordre de la cause d'Eutiches? Cest Abbé miserable auoit esté conuaincu d'heresie par deux Conciles tenus à Constantinople, quand il impetra pour sa purgation & defense le deuxiesme Concile d'Ephese: & ne peut iamais estre renuersé & abatu que par la force de toute l'Eglise, recueillie, & assemblee de tous les coings de la terre, dás la ville de Calcedone. Rome mesme luy donna vn Concile à part sous la conduite de Leon I. l'en puis dire autát de son sectateur Dioscorus, infecté & diffamé de mesme erreur. Apres auoir souffert deux Conciles, il fit reuoir de nouveau son procez à Chalcedone: & ceste saincte & celebre troupe accabla la presumption d'Estienne, Bassian, & plusieurs autres, qui n'auoient iamais redouté les césures des plus foibles & moins nōbreuses assemblees. Faut-il poursuiure, & enfoncer plus auant ce propos? Deuons nous esclai-

*Euagr. 1.
cap. 9. &
19. & lib.
2. cap. 2.
E 18.*

*Euagr.
Cōc. Chal-
ced. Tom.
2. Concil.*

PHILIPPIQUE III.

rer de la lumiere d'autres preuues, les tenebres de l'ignorance de nos ennemis, & mettre plus auant en veuë la honte de l'iniure qu'on a voulu attacher au chaste front de nostre France? Faut-il que ceste toille soit ourdie & tissue des trames de toute l'histoire de l'Eglise? Seuerer Archeuesque d'Antioche fut iugé par quatre diuers Conciles ordonnez à Constantinople, en Ierusalem, & en Syrie. Pierre Euesque d'Apamee fut adiourné en vn Concile tenu à Cōstantinople: on vit publier de l'autorité de l'Empire vne assemblée bien fameuse à Motuestie, pour proceder contre Theodore precepteur de l'abominable Nestorius: & la sale & noire source de sa doctrine ne fut estouffee avec sa dignité, que par la vertu redoublée du cinquiesme Concile œcumenique. Là mesme, Euagrius, Didimus, Antimus Pierre, & Zooras, sectateurs des ombrages & fureurs de Theodore, furent condamnez comme luy. Où fut ex-cōmunié Machaire d'Antioche avec

Nicephor.

Idem.

Euagr. 4.

cap. 37.

Balsam.

Concil. 5.

general.

Tom. 2.

Concil.

Estienne son disciple, qu'en la grande, celebre, & sainte compagnie du fixiesme Concile vniuersel? Ne fut-ce pas là que Paul Archeuesque de Cōstantinople, Cyrus d'Alexandrie, Sergi^o, Pyrrus, Pierre, Polichronius, & autres monothelites formez & declarez, sentirent la rigueur spirituelle des peines & contraintes de l'Eglise? Photius ne fit-il pas remettre encor sur le bureau du huietiemes Concile general, la cause desja decise & vuidée par vn Concile Romain, sous l'œil & la presence du Pape Nicolas I. C'est l'ancienne discipline d'Espagne, où Fragitanus Euesque de Cordouë, fut remis & restably de brauade en la possession de son siege par le Synode de Seuille, pour en auoir esté chassé contre le train, & prudent stile de ces formes. C'est l'ordonnance & l'vsage de l'Angleterre, & de l'Escoffe: estallé & pratiqué contre Anselme de Cantabrich, & contre beaucoup d'heretiques iugez és Conciles de Londres. C'est la com-

Concil. 8.
gener. Tō.
3. Concil.

In Concil.
Hispal.
Tom. 2.
Concil.

Polidor.

Polidor.
lib. 11.

PHILIPPIQUE III.

*Cromer.
lbr. 8.*

mune & conforme police de tous les Royaumes, exercee glorieusement en Polongne sous la sagesse de l'Archeuesque de Gnesné, pour la censure de Conrad Duc de Moscouie : roidie, & bandee tant de fois en Allemagne és Conciles de Erphord, de Vvormes, Brixie, & Majence, commandez pour rompre les violences & entreprises de quelques Legats Romains. Combien que tant de tourmentes & d'orages qui ont si diuersement troublé le calme de l'Eglise, & tant de sortes d'empeschemens & de fortunes qui ont entrecoupé son droit fil, & le cours reposé de sa vertu, ioincts à la longue corruption des hommes, eussent fort esbranlee & esineue la constance de sa discipline, & relasché en beaucoup d'endroits les loix les plus tendues & plus fortes du maniemment de ses affaires : qu'on eust entrouuert & rompu en mille endroits les cernes sacrez de ses plus entiers reglemens, & que sa belle police semblast escoulee, euaporee, & presque enfuye par

tant de breches : si est-ce qu'encore
 que Rome eust resenty en autres cho-
 ses beaucoup de mal de ceste conta-
 gion de mœurs, elle apporta presque
 tousiours la sage façon d'un Concile,
 en la conclusion de ses censures. Mes-
 senius & Vitalis furent excommuniez
 de cest ordre par Fœlix 2. Acatius &
 luy deposèrent Petrus Mongus avec
 ceste entiere solemnité, comme on
 void par l'epistre de Fœlix sur le dis-
 cours de ce procez. Faute de la cere-
 monie & autorité d'un Concile, les
 Euesques de Dardanie rejetterent de
 colere l'anatheme que Gelaiz 1. auoit
 decreté contre Acatius : & ce saint
 Innocent 1. conseilloit par vne lettre
 à Denis Archeuesque d'Antioche, de
 n'ordonner rien contre les Prestres
 Donatistes qu'avec l'obseruation de
 ces formalitez si saintes, & religieu-
 ses. Ceste regle a esté tousiours te-
 nue droite & ferme par ce bon pe-
 re S. Gregoire, sans la ployer ny fau-
 cer iamais en la rencontre de tant
 d'accidents, qu'il vit paroistre en son

*Platin. in
 Fœlix. 2.*

*Epist. Ge-
 laz. ad
 Episcop.
 Dardan.
 Tom. 2.
 Concil.*

PHILIPPIQUE III.

*Lib. 1. in-
dict. 9.
cap. 15.
Lib. 1. in-
dict. 5.
Epist. 32.*

siecle sur la diuerse face du monde. Il
fit adjourner l'Euesque d'Aquilee,
pour comparoir en vn Concile, & pria
l'Exarche d'Italie de ne faire vuidier le
procez de l'Euesque Blandus, qu'avec
ceste necessaire maturité. Quand le
Pape Theodore pour marque exte-
rieure d'un iugemēt irreuocable, com-
me espouuentable d'estrange saincte-
té, fortifiant ses decrets de la monstre
d'une nouuelle terreur, signa l'anathe-
me lasché contre Pyrrus, d'encre mes-
lé & destrampé dans le mystereux ca-
lice du sang de nostre Seigneur Iesus
Christ; il auoit fait condamner prea-
lablement les folles erreurs de cest
estourdy, par arrest d'un ample Syno-
de. Martin 1. se retint assez long temps
sans oser lancer ses censures contre
Paul de Constantinople, iusques à
tant qu'il se vist assisté & soustenu de
la troupe irreprochable de cent dix
Euesques: Et lors que Gregoire 3. vou-
lut de l'effort, & secouffe d'une con-
querāte excommunication, arracher
la ville de Rome à l'Empereur Leon
Iconomache,

*Paul. Dia-
con. lib. 18.
rer. Rom.*

*Platin.
Paul.
Diacon.*

*Zonar.
Bonfinius.*

Iconomache, il la bastit & l'arma en vn Cōcile. Les autres peres Romains ont presque tousiours obserué les loix de ceste procedure. Nicolas I. n'affail-
 litiamais Theogandus & Gontarius qu'auec ceste façon & assurance, & ne combatit le Patriarche Photius que de la force & des armes de ces celestes exercites. Gregoire 7. & Paschal 2. messant & engageant tousiours l'Eglise en leurs querelles, sefforcerent de bander toute l'ancienne autorité de ces sainctes assemblees contre Henry 3. & 4. Alexandre 3. pensa d'accabler Federic 1. de la grauité du Concile de Clermôt: on employa quatre Conciles pour excommunier Henry 5. à Rome, à Capouë & Cologne, l'anatheme de Federic 2. fut ietté & formé dans mesme moule, au Concile general de Lyon: & en la plus violēte ardeur des grandes guerres ouuertes contre les Princes de l'Empire, au fort de tant de troubles qui deschirerent si cruellement la Chrestienté, on couurit tous-

Cap. Theogandus 11. quest. 3.

Vsserg. Auentin.

Naucler.

PHILIPPIQUE III.

Auentin.

Sabellic.

*Platin.
Tôm. I.
Concil.*

jours ces iniustes arrests de colere, du manteau de la prudence de l'Eglise, en la censure de Loys de Bauiere & des autres. L'excommunication de Charles 5. fut teinte au cramoisi de ceste couleur : & bien que Paschal 2. eust souuent iuré la ruine de l'Euesque de Florence, il deguisa sa vengeance du pur esprit, & innocence d'un Concile. Aussi recueillant le fruit du grain qu'ils auoient semé, quand il est arriué aux Papes d'estre tirez en iugement pour respondre aux accusations qu'on leur a intentees, on leur a rendu ce respect, contenant tousiours les mains des Iuges Ecclesiastiques bien loin de leurs dignitez, sous les attaches de cest ordre. L'Eglise ne peut permettre qu'on touchast aux procez de Marcellin, Sixte 3. & Symmachus, qu'en sa presence & en sa face, estallee & ouuerte en plein Concile. Sur les traces de ces exemples, les Roys de France, les Empereurs d'Allemagne & autres Princes, ne se sont iamais tant laissé emporter au sentiment de leurs

douleurs, & aux viues pointes de
 beaucoup d'injures, pour haſter & pre-
 cipiter la iuſtice irritée & eſchauffée *Auentin.*
 de végeance, qu'ils n'ayēt fait propo- *Vſperg.*
 ſer leurs plaintes contre Gregoire 7.
 Paſchal 2. Alexandre 3. Boniface 8. &
 autres, en la majeſté du plus grand *Nauclet.*
 Cōcile qu'ils ont peu recueillir, avec
 l'aide & faueur de leurs voiſins. Ie ne
 puis encores ietter les ancrs, ny cou-
 ler ſi legerement, que ie ne heurte du
 bord de ce vaiſſeau à la diſcipline de
 la Gaule. C'eſt là auſſi que ie veux
 chercher le repos. Certes comme ce-
 ſte belle prouince le cœur du monde,
 a eſté touſiours deliure & franche de
 toutes ſortes de monſtres, pour auoir
 conſerué ſa ſanté, & la perfection de
 ſa bōne conſtitution par vn ſage regi-
 me, & par les ſalutaires remedes des
 frequentes purgations : comme elle
 ſ'eſt monſtree la mieux policee & re-
 glee de toutes les parties de la terre,
 où les loix ont plus vigoureuſement
 flory, où les ſaincts decrets Eccleſia-
 ſtiques ont trouué plus de reſpect &

PHILIPPIQUE III.

de force, qui du flambeau de sa vertu & Religion a donné lumiere à beaucoup d'autres Eglises plus obscures, & plus nouuelles, contreroollé & reformé les fautes & abus de ses voisins d'une vigilance fraternelle : elle n'a iamais rien laissé escouler de la vigueur de ceste ancienne discipline si generale. Elle n'a iamais voulu commettre l'honneur & reputation de ses Euesques aux iugemens Ecclesiastiques, s'ils n'estoient balotez, comptez & mesurez par tous leurs confreres, & pesez d'une iuste main en la balance d'un celebre & grand Concile. Parce qu'elle a sagement estimé, que la censure de ces graues dignitez ne pouuoit estre assez remaschee & digeree, ne pouuoit auoir son compte iuste & parfait qu'en ce frequent calcul : ny estre assez dignement concertee & debatue en plus petit reduit de Iuge. C'est l'ancienne ordonnance du Concile d'Agde, rafraischie, recolorée, & reuernie au second Concile de Tours, confirmée au Conci-

Concil.

Agatens.

can. 3.

Turonens.

2. cap. 1. 2.

& 7.

Meldens.

Concil.

le de Meaux, pratiquée & soigneusement entretenue en toutes les procédures des assemblees Ecclesiastiques.

Car Splendonius excommunié du temps de S. Augustin ne fut condam-

né qu'auec ceste iustice: Salonius &

Sagitaire ne furent priuez de leurs di-

gnitez qu'au Synode de Lyon: On

conuoqua l'Eglise de France à Bredes

pour l'affaire de Gregoire de Tours:

& vit-on apporter vn Concile formé

à Paris, pour le iugement de Pretextat-

tus. On ouït l'Euesque Saphoracus

au second Concile de Paris, on ouurit

vn Synode à Tours pour la destitu-

tion d'Ægide Archeuesque de Reims:

Theodoric fit corriger Leodegarius

en pleine compagnie de l'Eglise Gal-

licane: Faustianus Euesque d'Aix, fut

deposé au 3. Concile de Mascon: & on

n'osa iamais qu'auec ceste graue &

prudente ceremonie, enjoindre seule-

ment vne penitence publique à Vrci-

cinus Euesque de Cahors. Qu'est-il

besoin de tant de preuues? Riulphene

fut-il pas iugé par vn Concile? Les

August. 3.

contraliter.

Petilian.

Gregor.

Turon. 5.

cap. 27.

Ibidem.

cap. 47.

Turon. 8.

cap. 18.

Idem 10.

cap. 19.

Idem.

Idem 5.

cap. 3.

P H I L I P P I Q V E I I I .

douze prouinces de Gaule, ne ioignirent-elles pas leurs vertus & autoritez pour vuidier le procez de Ganelon? L'accusation de Rotaldus ne fut iamais proposee que de cest ordre.

Du Tillet.

*Aimon. 4.
cap. 105.
& 106.*

Loys Debonnaire le fit sagement appliquer contre les Euesques de la faction de Bernard Roy d'Italie : & il fallut commander vn ample & graue Concile en la ville de Troyes en Champagne, pour declarer l'anatheme à quelques vns de nos Euesques.

*Concil.
Rhemen.*

Où degrada-on l'Archeuesque Arnolphe qu'aux Conciles de Senlis & de Rheims? Nos Roys prindrent bien la peine de mettre ensemble tous les Euesques & grands Prelats de France, pour chasser Hugo de l'Archeuesché de Rheims, où il s'estoit introduit & intrus audacieusement, sans prendre vn tiltre legitime de leur grace. On s'est tousiours monstré en France si soigneux & si ialoux de l'honneur des Pasteurs de nostre Eglise, & craint si religieusement de tacher ou flestrir mal à propos les lustres de ces hautes

*Contin.
Regin.*

dignitez si esclairantes, que pour interdire seulement à temps l'exercice des saincts mysteres de nostre Religion aux Euesques, leurs sages freres n'y ont marché que par les voyes d'un Concile. Avec ceste modeste façon & iustice mesuree, Theodore Archeuesque d'Arles fut suspendu à Chaalons sur Saone. Et comment eust-on violé ou mesprisé les ordonnances de ceste droite police en la reformation des Euesques, & grands moderateurs de nos Eglises; puis que ceste forme de proceder, cōme naturelle & necessaire a esté souuent employee en faueur de to⁹ les autres moindres ordres? L'Abbé Theodulphe ne fut cōvaincu qu'en un Concile: vne Abbessse de Poictiers s'oppiniastra d'en auoir deux pour sa iustification: & Pierre Abeillard impetra les Conciles de Rheims & de Sens, pour faire examiner plus meurement ses erreurs & fantasies. Lors mesme que nostre Eglise, ployant de-my courbee de vieillesse sous le fardeau de tant de longues annees, &

Turonens.

Aimoin. 4.

Turonens.

10. cap. 15.

Et 16.

*Oto Phri-
sin.*

PHILIPPIQUE IIII.

presque estonnée de la presence de la
 grandeur Romaine, a permis quel-
 quefois aux Papes refugiez en son
 seing, de manier d'une commune
 main les iugemens de ses Euesques: ils
 n'ont iamais changé ny renuersé le
 cours certain de ceste tant celebre dis-
 cipline. Eugene 3. fit instruire le pro-
 cez de Gilbert Euesque de Poiëtiers au
 Concile de Paris: & on garda ce stile
 à Rome mesme, en la cause de Beren-
 ger Archidiacre d'Angers, conuain-
 cu de la sainte autorité de deux ou
 trois fameux Conciles. Les peres Ro-
 mains eussent pensé faire trop grand
 faute, de se despartir de ceste vniuer-
 selle obseruance, és occurrences plus
 importantes & plus grandes, & qui
 regardant le poinct souverain de l'E-
 stat cōme ceste cause, meritoient vne
 plus longue & plus sage deliberation.
 Ils ont tousiours emmiellé & suceré
 la rigueur de leurs entreprises sur la
 France, des douceurs de ceste police
 moderee. Innocent 3. fit proposer l'ex-
 communication de Philippes Augu-
 ste en

Oto Phri-
 sin.

Naucler.

en vn Concile sollicité par ses Legats: Boniface 8. pensoit renuerfer de la forte apparence de cest ordre, le sceptre eternal de Frâce, en haine de Philippes le Bel: & on n'auoit iamais veu que les Papes se fussent esloignez auât ce siecle, des termes de cest vsage, en toutes les diuerses censures qu'ils ont si largement respandues sur la France. Pourquoy eussent-ils desdaigné les loix & les exemples de leurs ancestres, comme de toutes les Eglises? Ces formes ont esté tellement censees de l'essence des grands iugemens de l'Eglise, que les heretiques mesmes, singes, mocqueurs & vains imitateurs de ses sages actions, se sont tousiours façonnez sur les traits de ceste ancienne procedure. Les Arriens demirerent & deposerent en leurs Concilia-
bules, & par les tumultes confus de
leurs factieuses assemblees, Athanase,
Paul, Asclepas: & ceste injustice co-
lore & masquee de discipline, les of-
fensa si auant, que leur restitution de-
manda les suffrages d'un nouueau

Socrat. l.

cap. 22.

et 23.

Theodor. l.

cap. 28. 29.

et 30.

Sofom. 3.

cap. 5.

PHILIPPIQUE IIII.

Socrat. 6. cap. 14. Concile. Les ennemis de S. Chrysostome l'assaillirent de l'effort de trois Synodes, ordonnez à Constantino-
ple & à Chalcedonne pour le precipiter de sa chaise : & Saint Augustin tesmoigne, que les Donatistes n'anathematiferent l'Euesque Maximianus que sous l'apparéece & hypocrisie d'un Concile. Par ces proportions si iustes & mesurees, si les excommunications des particuliers Euesques ont esté pour le moins basties des voix comptees d'un Concile prouincial : si en beaucoup de censures d'Euesques & de Prestres on a desiré l'autorité d'un Concile œcumenique, il falloit attendre l'arrest de toute l'Eglise, pour resoudre nostre excommunication : il falloit apporter la consultation d'un plus grand nombre de Medecins & plus amis, pour deffinir & conclurre ceste grande & cruelle section de la France : pour retrancher du corps mystereux de l'Eglise vniuerselle, l'un des premiers & plus nobles de ses membres. Car comme disent les peres par

vne bien naturelle comparaison, dont
 l'experience preuue tous les iours la
 verité fort cogneuë & fort sensible. Si
 on pese & meurt avec tant de discre-
 tion la couppure d'vne partie du corps
 humain, offensée & gastée iusques au
 desespoir de santé : si on la marchan-
 de & pourmeine en tant de façons,
 pour l'arrester & resoudre avec tant
 de regret : si les amis ne la peuuent
 voir qu'avec larmes, si le plus tren-
 chant rasoir, ny le plus subtil ferre-
 ment tant soient-ils dextrement ma-
 niez, ne peuuent faire tomber la plus
 pourrie piece d'un corps malade sans
 mille pointes de douleur, sans les es-
 clats de mille cris que la passion arra-
 che des ames mesmes plus constan-
 tes : il falloit estre beaucoup plus cir-
 conspect, plus retenu, & plus pru-
 dent, en ce retranchement & couppu-
 re si mortelle, inseparable de la perte
 du Royaume de France, conjointe &
 attachée à la ruïne de toute la Repu-
 blique Chrestienne. Mais à quoy nous
 trauaillons nous tant? Où nous em-

PHILIPPIQUE III.

porte ainsi le souuenir de la douleur ?
Pourquoy allons nous si curieusement
fouiller dans le sein & le sacraire de
toutes les Eglises, pour trouuer l'ordre
necessaire d'un Concile, afin d'esbran-
ler par ce vice & deffaut tant apparent
& cōfessé, l'enuieuse structure & extra-
ordinaire façon de ceste desordonnee
censure ? Quel ordre iudiciaire, quelle
lumiere de raison ny de cōduite, peut
on remarquer ny descouurir en vne si
confuse & si passionnee sentence : qui
interesse & blesse scandaleusement
tout le mōde, en la playe de nostre in-
jure ? Où nous a-on iamais assignez ? où
auons nous esté ouïs ? qui nous a accu-
sez ? qui nous a interrogez ? que nous a-
on laissé respōdre pour nos deffenses ?
Vne seule personne, & nostre ennemie
déclaree, d'armes descouuertes, & de
toutes sortes d'hostilité, a porté trois
visages, a fait icy contre nous l'office
de trois personnes differentes & de di-
uerse condition, requises, necessaires,
& essentielles en la constitution d'un
iugement legitime ? C'est donc ainsi

que sans forme, sans façon, sans quelque couleur ou apparence de iustice, on pensoit perdre vne Eglise entiere, dompter vn fort & florissant Royau-
me, abattre la gloire du fils aîné des Empires, & enterrer pour iamais les triomphes & trophées des François, sous le fardeau insupportable de la tyrannie Espagnole? Si on n'a pas seulement daigné entédre nos respôses, de quelle assurance respondra on maintenant à la plainte, de cest injuste desny de iustice? Dequoy se pourra-on deffendre contre tant d'eternelles authoritez, qui nous garentissent & plègent en ceste cause? Dequoy soustiendra-on l'effort de tant de peres, & la vertu de tant d'Eglises, qui assaillent & combattent ce desreglemēt des sages decrets de leur police? Sainct Augustin, suiuy & assisté des autres flambeaux de nostre Religion, esclairant à trauers de tant de confusions & de tenebres, dont on a voulu enue-
lopper, & faire mesconnoistre ceste injustice si violente, ne pourra iamais

PHILIPPIQUE III.

souffrir qu'on condamne personne, tant soit-il coupable & criminel sans l'ouïr premieremēt, & toutes les Eglises d'une generale resolution approuveront la verité de sa parole. Car les premiers Conciles, renouvellez & affermis dans la vertu du huitiesme Concile general, deffendent seuerement d'excommunier vn simple clerc auant que sa cause soit instruite, & en estat de iuger, auant qu'elle ait toutes ses façons & formes. L'unziésme Concile de Toléde casse ces sentences legeres portees des vents, pronôcees sans pleine cognoissance de cause, & sans estre meurement examinees. Le quatriésme Concile de Carthage met à couuert sous les ailes de son autorité, les absens & nō appelez: & empesche de touchér aux droits & dignitez des Ecclesiastiques qui n'ôt point esté receus à proposer leurs deffeses. A la trace desquels, les peres du cōcile de Vvormes conclu en la presence du Pape Estiēne 5. destournāt d'horreur & de colere leur veuë innocente loin

*Concil. 8.
general.
cap. 10.
Tom. 3.
Concil.*

*Tom. 2.
Concil.*

*Concil.
Cartag. 4.
Tom. 2.
Concil.*

*Concil.
Vvorm.
cap. 14.
Tom. 3.
Concil.*

de tous ces injurieux arrests monocu-
 les, cōseruēt & retiēnent en l'exercice
 & hōneur de leurs charges, tous ceux
 qui auront esté si imprudēment & te-
 merairement traittez, & les gardent
 de mal & de crainte iusques à la diffi-
 nitue d'un Concile. Ceste verité ne se
 peut-elle encores loger dans la con-
 science de nos aduersaires, si sa place
 n'est bien apparemment marquee des
 responses des Papes mesmes? Qu'ils
 croient au moins les paroles de ceux
 dont ils imitent si mal la vie & l'exem-
 ple: ils trouueront que Fœlix I. en
 vne lettre escrete à Palermus, & Ze-
 phirin I. en l'epistre qu'il adresse aux
 Euesques de Sicile, improuuent & *Tom. I.*
 condamnent la legereté & viftesse des *Concil.*
 Primats, qui ordōnerōt quelque cho-
 se cōtre vn Euesque, dont la cōfession
 n'aura esclaircy & approqué la faute,
 qui n'aura esté competāment appel-
 lé, & legitimement conuaincu. Il est
 aisé despraindre & retirer le suc de ce-
 ste salutaire façon de iustice, de la
 creance & memoires baillez par ce

PHILIPPIQUE IIII.

Epist. 50. grād S. Gregoire à Ieā deffenseur, lors
lib. 11. ad qu'il l'enuoyoit en Espagne: Et Nico-
Iohan. def- las I. esteignant rigoureusement ces
fenf. aueugles anathemes, descochez ain-
Cap. notū, si à yeux bandez & à l'aduenture, les
cap. nobis, retorque & rapointe contre ces Iu-
cap. nomen. ges hastifs & courants, pour les guer-
2. quest. I. royer & combattre des esclats & rui-
 nes de leurs traits mesmes. Qui ne iu-
 gera comme moy à voir vn fruiēt si
 difforme, de si desagreable & peu na-
 turelle couleur, si rude à la main, si
 aspre & corrosif au goust & à la lan-
 gue, si tenant au gosier, si pesant &
 mal sein à l'estomach: qu'il a esté pro-
 duit & né hors de saison sur quelque
 roche deserte & sauuage: qu'on en a
 hasté le cours de force contre le tēps
 & la nature, que la terre ne l'a pas as-
 sez couué & nourry: & que le Soleil
 voilé de honte ne l'a iamais bien cuit
 ny meury de ses rayons? Puis que ces
 Bulles estoient projectees d'ambition
 & de vengeance meditees & concer-
 tees en vne violente conjuration, di-
 geres avec passion & enuie, façon-
 nees

nees & bastices de colere : c'estoit à la
 precipitation à les esclorre & tascher
 à leur faire voir le Soleil, qui d'hor-
 reur en recule & retire encor au-
 jourd'huy son visage. Aussi que peut-
 on voir de plus hasté, de plus pressé,
 de plus precipité, de plus violent, ny
 de plus estrange, que de ne donner
 que trois fois trois iours à tant d'E-
 uesques d'un si grand, si spacieux, &
 puissant Royaume, pour se purger &
 lauer de leur loyauté, comme de quel-
 que tache & nouvelle souilleure de
 vice? Est-ce le train mesuré des iustes
 pas des premiers peres de l'Eglise?
 Quelle raison ou quel exemple, peut
 on tirer pour rideau sur ceste faute?
 On donna deux diuers Conciles à
 Paul Samosatence, le premier pour
 l'aduertir de se recognoistre & repen- *En feb. 7.*
 tir, l'autre pour iuger de sa faute. Par- *cisp. 24.*
 ce que Cirillus s'estoit vn peu trop a-
 uancé en la censure de Nestorius, sans
 attendre le nombre entier & parfaict
 de tous les peres, mandez solemnelle-
 mént pour cest effect: plustost de crain-

PHILIPPIQUE IIII.

te que le mal creust & augmentast par la dilation & la remise, que porté d'impatience ou legereté, il en fust publiquement reprins par ses freres, succomba aux mesmes peines qu'il auoit si soudainement decernees cōtre cest heretique, & receut des pointes de mesme censures. On fit assigner par trois diuerfes fois ce miserable Eutiches, & deux Euesques d'autorité & de nom, chargez des lettres d'un grād Concile, furent destinez à ceste vocation & adiournement. Lors que Iean 12. voulut degrader l'Euesque Sicon du iugement d'un seul Concile, il fut conseil­lé par les peres de remettre & differer la sentence iusques à la pleine maturité d'un troisiēme Concile: Et en ceste cause au rebours de tout l'ordre iudiciaire, apres le iugement de condamnation donné & fulminé par attentat, on assigne d'un delay de neuf iours tant de graues Euesques, & tant d'honorables Prelats, on adiourne vne si sainte multitude d'Eglises, & un nombre infiny de Catholiques,

*Concil.
Ephes. T^o.
I. Concil.*

*Euagr.
Concil.
Chalced.
Tom. I.
Concil.*

Sabell.

pour se iustifier à Rome, de bien faire. Pourquoi nous esbayssons nous avec tant d'estonnement ? Toutes choses sont icy si desreglees & desmesurees, si outrecuidees & audacieuses, que i'en voy tomber l'assurance du front de nos aduersaires. Ils perdent toute contenâce, & rougissent à tous propos de nouvelle honte, picquez des vers de leur conscience. Et toutesfois ce n'est pas encores nostre dernier grief: La temerité ne trouue iamais d'arrest, de mesure, ny de bornes. Car tout ainsi que ceux qui ont pris la course du sommet d'une droite & roide montaigne, de laquelle ils se iettent à corps perdu, ne se peuuent ny fermer ny retenir, qu'ils ne se treuuent du tout à bas du precipice. De mesme les violêts ennemis de cest Estat, n'assouissant pas la faim brutale & croissante de leur enuie & de leur haine, en l'horreur de cest anatheme & effroyable iugemēt ne lassant pas encor leur rage en prouoquant & extorquant de force vne si horrible censure sur les

PHILIPPIQUE IIII.

testes de nos Prelats, & de tous les fideles subiects & seruiteurs du Roy: ils passent outre, & font menacer ces chefs de nos Eglises d'une destitution & priuation de dignité, tentent de les faire casser & exautorer pour en promouvoir d'autres en leur place, & se pensent iouïr indignemēt de ces graues Pasteurs de la Gaule, comme fait vn potier de son argille. Ils se mescontent & s'abusēt: Ce seroit bien plustost au Roy, à deposer & destituer les Euesques qui le seruent mal, & se portent infidellement en leurs charges; tant s'en faut que le seruice & fidelité de ses meilleurs subjects, puissent conceuoir & produire ceste perte de leurs chaises. Les Euesques ny autres Prelats quelsconques ne peuuent retenir le tiltre, l'honneur & prerogatiues de leurs sacerdoces dans le Royaume de France, sans s'aduouïer & declarer seruiteurs du Roy, sans le tesmoigner d'effect & de parole en occasions si necessaires. Et lors qu'ils m'esconoistroient ceste obligation naturel-

le, Chrestienne, & François, le Roy leur pourroit oster les benefices pour la faute de leur rebellion, comme les Roys ses deuanciers les leur ont accordez, sous la promesse & le serment de ce seruice. Le lien de ceste obligation, doit contenir en deuoir ceux qui iusques icy ont glorieusement rendu à nostre Prince tant de preuues de fidelité & d'obeissance: comme la pressante chesne de ceste crainte, doit reuoquer & ramener dans les bras de sa clemence, tous ceux à qui l'estrange mutation presque de toutes les choses de ce siecle, a fait ainsi changer de foy & de visage. Car de quelle part ont esté promeus nos Pasteurs au feste de ces dignitez, que de la liberalité, benefice, & grace de nos Roys? Le siege Romain ne s'en est meslé que bien tard, en vertu des concordats iurez avec nos Princes, sous leur permission ou tollerance. Au parauant, és regnes de la premiere & seconderace, ils n'y ont iamais mis la main, sans se repentir de l'entreprinse. Lors mesme que

PHILIPPIQUE IIII.

pensant trouuer quelque esgoust , & cōduit propre pour faire escouler vne infinité d'abus qui regorgeoient dans nostre Eglise, on auoit donné entree aux eslections, par la bresche des anciens droits de la couronne, ce n'estoit que sous le bon plaisir & approbation des Roys:& les Papes n'y touchoient qu'en cas d'appel & de controuerse. Dequoy leurs officiers respandoient abondamment les semēces sur la France, pour en attirer le fruit d'une riche moisson d'or à Rome. Puis que c'est dōc au Roy à pouruoir aux grandes prelatures du Royaume, à qui les Euesques doiuent serment de fidelité: puis qu'ils possèdent de si belles terres mouuantes de la maison de France, toutes subiettes à tomber en commise par rebellion, selon les loix, l'ordre, & la nature des fiefs: en violant la foy au Roy, ils donneroient occasion à sa iustice de les priuer des fruits & tiltres de leurs benefices. Ce seroit vne trop dangereuse playe à l'estat, de permettre que ceux qui māqueroient

si obstinement de fidelité au Prince, occupassent les places deues & reserves, à ceux qui le seruiroient fidelement. Il seroit à craindre, que ces bouches qui se doiuent monstrier pures & pacifiques, pleines d'honneur & de pieté, comme consacrees au seruice & culte de Dieu, vouees au repos du Royaume, destinees à prier & sacrifier continuellement pour la santé & prosperité du Roy, en peruertissant l'usage de leurs charges, ne prophanasent, ou alterassent le dessein & premiere intention de ces sacrez mysteres, avec le bõ-heur des affaires de sa Majesté. Qu'elles n'entrecoupassent le droit cours de sa fortune des rencontres de leur diuision: & ne polluasent la nette face de cest Estat de quelque tache de leurs imprecations, noires de colere & de vengeance. On pourroit redouter avec beaucoup de consideration & de raison, que ceux qui doiuent estre comme les liens de paix entre le Roy & le peuple, n'y entretinsent & semassent la conten-

PHILIPPIQUE III.

tion & la discorde: que ceux qui doi-
uent penser nos blesseures, & estain-
dre doucement le feu desreglé de nos
humeurs, par des liniments moderez:
comme Medecins & Chirurgiens cor-
rompus ou ennemis, ne les esmeuf-
sent & irritassent dauantage, ne fis-
sent durer la maladie à desseing, ne
fissent affoiblir ce corps de trop lon-
gues saignees, n'espuisassent les bon-
nes qualitez & la plus pure substan-
ce, par des medicamens violens &
corrosifs, n'apportassent l'inflâmentation
& la gangrene à ces ardentes dou-
leurs, & n'enuenimassent mortelle-
ment les larges playes de ce Royau-
me. Il se faudroit desfier, que ceux qui
ont comme vne espece d'empire sur
les ames des subiets, ne les ployassent
au mauuais exemple de leur foy & de
leur vie, qu'ils n'infectassent les saines
parties de ceste Couronne de leurs ha-
leines pestilentes, ou de l'approche de
leur cōtagion: & que le vent orageux
de leur parole ne pouffast iusques
aux derniers coings de cest Estat,
les

les flammèches des feux de sedition, qu'ils oseroient allumer sur les autels de leurs Eglises. C'est pourquoy ceste exautoracion & degradation, seroit plustost deuë aux obstinez ennemis du Roy, & l'application de ceste peine plus necessaire, comme plus iuste enuers les Prelats infideles & mauuais seruiteurs de sa Maiesté, qu'à l'endroit de tant de vertueux & sages pasteurs, qui avec tant de soing, de deuotion & de courage, luy continuent leur seruice. S'estonne-on de la verité de ceste genereuse proposition? Ceste correction & iustice ne seroit estrange ny nouuelle, comme assistee de raisons considerables & pressantes; confirmee & appuyee de la force d'une longue multitude d'exemples. Car Constantius menaça Liberius des atteintes de ce droit souuerain, luy fit en fin souffrir ces prerogatiues de la grâdeur Imperiale: & les Princes qui ont tenue le gournail du monde apres luy, ont fait sentir les preuues de ceste necessité, à vn grand nombre d'Eues-

Theodor.
2. cap. 16.
Sofom. 2.
cap. 27. &
lib. 4. cap.
10.

PHILIPPIQUE IIII.

*Theodor.
5. cap. 23.*

*Euagr. 3.
cap. 11. &
12.*

*Ibid. cap.
31.*

*Paul Dia-
con. lib. 16.*

*Euagr.
Cōtinuat.
Damaf.*

Euagr.

Zonar.

*Paul. Dia-
con. lib. 34.*

ques & de Papes, qu'ils ont tirez de la chaise de Sainct Pierre, pour en loger d'autres plus fideles & plus agreables en leur place. Personne ne peut reuoquer en doute, que Flauian Archeuesque d'Antioche n'ait aduoüé ceste autorité bien entiere à Theodose:és mains duquel il remit sa charge, pour la conferer plainement à qui bõ luy sembleroit. Zenon chassa l'Archeuesque d'Alexandrie & beaucoup d'autres de leurs sieges: Athanase priua Flauian d'Antioche & Euphemius de Constantinople, de leurs dignitez Episcopales; Iustinian donna des aigres & viues pointes de ce pouuoir absolu, à beaucoup de pasteurs des premieres Eglises, comme Rome, Alexandrie & Constantinople, pour y en surroger de nouueaux: & Iustin 2. son successeur fit deposer l'Euesque Anastase. Ainsi Arthemius fit exautorer Iean Archeuesque de Constantinople: L'Empereur Leon destitua vn Euesque nõmé Germain: Nicephore osta les chaires à tous les Euesques

de la conspiration d'Arfabirus : Isaac <sup>Nicet. 2.
de gest.</sup>
Angelus fit degrader Basile Camate- <sup>Isaac. An-
gel.</sup>
re: & Theodoualde Duc des Sueues, <sup>Auentin.
3. Annal.</sup>
arracha Eton & Pirminus de leurs
Eueschez, parce qu'ils fauorisoient
Charles Martel. De mesme sagesse &
courage Henry 3. fit perdre les bene-
fices à l'Archeuesque de Majance, &
à tous les autres Prelats de la faction ^{Tritemius.}
de Rodolphe. Le Roy Iean d'Angle- ^{Polidor.}
terre fit chastier de ceste peine l'Eues-
que d'Iorch, & Henry Roy de Polo- ^{Cromer.}
gne fit donner ce traitement à l'Ar-
cheuesque de Gnesné & autres Ec-
clesiastiques, qui auoient delaisié son
seruice par la terreur des anathemes
Romains. Il seroit superflu de racom-
pter cōment les Empereurs d'orient
d'Occident, & d'Allemagne, ont me-
nacé & frappé bien auant les Papes
mesmes de ceste espee de Iustice. Ils <sup>Euagr. cō-
tin. Da-
mas.
Platin.
Simonet.
Aimoin.
Sigebert.
Vsserg.
Auentin.
Crantz.</sup>
en firent esprouuer le trenchant à Sil-
uerius, Vigilus, Pelagius, Leon, 3. &
4. Paschal 1. Gregoire 7. Urbain 3.
Paschal 2. Gelais 2. Honoré 2. Calix-
te 2. Adrian 4. Alexandre 3. Innocent

PHILIPPIQUE III.

3. & 4. Iean 22. & autres de cest ordre, qui se monstrent aduersaires ou trop suspects à la grandeur de leur Estat.

Quoy nostre France, n'a elle iamais peu gouter ce preseruatif plein de prudence? Ne l'a elle iamais employé es accidents de pareilles maladies, & en la forte contagion de semblables pestes ciuiles. Pourquoy est-ce donc

*Turonens.
10. cap. 18.*

qu'Ægide Archeuesque de Rheims fut déposé par l'autorité de Childebert, que pour son infidelité & trahison?

*Idem lib.
5. cap. 18.*

Pourquoy Pretextatus fut il priué de l'Archeuesché de Rouen, que pour crime de Majesté? Theodore Archeuesque d'Arles, ne perdit-il pas son Archeuesché par ordonnance de Clovis 2?

Idem.

*Sigebert.
Chronic.*

Rigobert de Rheims, & Eucherius d'Orleans, ne furent-il pas mis hors de leurs sieges, du commandement de Charles Martel, pour luy auoir fermé les portes de leurs villes en temps de guerre, & incliné à la faueur & au secours des ennemis de la France? Sur ces considerations aussi necessaires que legitimes, le Pape Za-

charie conseilla à Pepin d'exercer plainement ce droit, lors qu'il s'en presenteroit occasion. Charlemaigne se vanta hautement en ses Conciles, d'auoir fait passer sous ceste censure vn grād nombre de Prelats: Et Loys Debonnaire tira raison par ce remede, des laschetes d'Anselme Archeuesque de Milan, d'Ebon Archeuesque de Rheims, de Vvolpholde Euesque de Cremone, & Theodolphe Euesque d'Orleans preuenus dela conjuration de Bernard Roy d'Italie. C'est pour ce subiect que le Roy Hue Cappet fit arracher Arnolphe del'Archeuesché de Rheims, cōme conuaincu de perfidie & trahison. On degrada pour mesme crime le Prestre Adalgerus son complice : & parce que Siguin Archeuesque de Sens donna apparence de trouuer mauuaises ces destitutions si salutaires, il fut emprisonné luy-mesmes de l'aduīs du Concile de Rheims. Philippes Auguste fit deposer de cest ordre tous les Ecclesiastiques qui auoient fleschy sous la crainte de l'ex-

Epistol. ad Pipin.
Tom. 3.
Concil.

Aimoin. 4.
cap. 15. & 16.

Æmil. in Concil. Remens. Gaguin.

Æmil.
Guillaume le Breton en son histoire de France.

PHILIPPIQUE III.

Vicent.

communication qu'on auoit iettée contre luy : & ses Magistrats confisquerent tous les biens de ceux qu'ils trouuerent tachez de ce vice comme l'Euesque d'Orleans. Telle est la police des sages loix ciuiles & Ecclesiastiques, l'ancienne vertu des decrets de l'Eglise Gallicane, & la courageuse vigueur des Conciles de Tolledo. Ce seroit donc plustost de l'autorité du Roy de destituer les Prelats infideles, qui suiuent la faction d'Espagne: qu'à ses audacieux ennemis d'en faire seulement menacer ses seruiteurs. C'est la naturelle grandeur de sa Couronne, les droits eternels de son sceptre : & vne aussi iuste occasion, comme c'estoit trop d'entreprise à Gregoire, d'estendre ses violentes mains sur les Pasteurs de cest Estat, demeurez constamment en l'ancienne fidelité des François, & de l'Eglise. Quand ce miserable desseing eust peu tirer quelque effect conuenable à sa malice, ou de nostre lascheté, ou de quelque mauuaise fortune: le voudroy biē

demander qu'est-ce qu'on eust fait de tant de sortes de benefices, qu'on pensoit rendre vacquans. & impetrables, comme par vn deuolu, pris sur la vertu & sur la foy ? Pleust à Dieu, qu'au moins ce n'eust point esté l'intention desordōnee de l'Espagnol, de les vendre à deniers contans, pour seruir aux luxures & auarices de ceste guerre: pour en enfler ses parties casuelles, & remplir du sang & honneur François, du suc & substance de ce Royaume, les sangsues estrangeres. Car en la deplorable cōfusion de semblablestroubles, és desreglemens de pareilles excommunications, lancees sur l'Allemagne en vne plus grande simplicité de mœurs, & plus grande integrité de siecle: on vid tenir boutique ouuerte des plus hautes & plus sainctes dignitez de l'Eglise. Hermanus de Bam-
 bourg obtint son Euesché sous Alexā-
 dre 2. par argent; Arnoul acheta l'Ar-
 cheuesché de Majance de quelques
 vns qui en auoient le don; Gerard
 dōna deux cens marcs pour estre pro-

Lambert.
Scafna-
burg.

Pantal.

Idem.

PHILIPPIQUE III.

*Tyrinus de
bell sacr.
lib. 11.*

meu à mesme chaise; Et Arnolphe Archeuesque de Ierusalem fut contraint de racheter d'Honoré 3. son Archeueiché à pris d'or. Passeray-ie aueugle & muet, sur tant de traits qui se presentent pour vanger l'injure de la Frâce, pour imprimer quelque horreur aux esprits de nos peuples desbauchez, & faire rougir de mesme honte ceux qui nous veulent ietter en mesmes playes? Innocent 3. fort liberal des excommunications contre les Princes, enuoya le Cardinal Gaulo en Escoffe, qui exposa la plus part des benefices en vente : & Gerad Euesque de Niem perdit le droit que le Sainct Esprit luy auoit acquis en sa creation, parce que son competeur eut meilleure bourse que luy. Robert Euesque del'Incolme offensé de tant de prodiges, se mit bien en deuoir d'en faire des courageux reproches, mais il n'en rapporta que des brocards de mocquerie. Qu'on pardonne à ma douleur, si elle ne peut estancher ses plaintes. En vn mal-heur pa-

reil au

Boet.

*Matth.
Paris.
Vsserg.*

Boet.

reil au nostre, Alexandre 4. ayant ex-
 cōmunié Philippes Euesque de Saltz-
 bourg pour estre demeuré fidele à *Auentm.
lib. 7.*
 l'Empereur, on vendit son Euesché à
 Vltin: à qui on l'osta soudain de cole-
 re faute de payement, pour la bailler à
 vn acheteur de meilleure foy, & plus
 riche. Sur ces estranges accidents,
 l'Abbé d'Vsparg deschargeât son esto- *Vsparg.*
 mach, s'escrie & lamente franchemēt:
 contraint d'accuser l'auarice de son
 aage, d'auoir rendu la pluspart des be-
 nefices de l'Europe litigieux, pour en
 attirer l'argent à Rome, & y faire cou-
 ler de tous les coings du monde des
 nouuelles mines d'or, par mille diuers
 canaux, & subtiles veines de chiqua-
 nerie. C'est l'edification qu'apportent
 ces censures à la Chrestienté, c'est de-
 quoy elles accroissent & fortifient la
 Religion: qui semble s'enfeuelir tous
 les iours dans les ombres de tāt d'am-
 bitieuses entreprises. Toutesfois on
 nie la verité de ceste intention, & d'a-
 uoir iamais pensé mettre en vente les
 dignitez Ecclesiastiques de la France.

PHILIPPIQUE III.

Si faut-il au moins qu'on confesse, que si ce grand amy d'Espagne ne vouloit vendre ce Royaume en detail, & par le menu des benefices, retenu de l'injure de son ordre & de ses freres, il le vouloit vendre en gros: pensant des coups de son tonnerre briser le sceptre Royal, & rompre en esclats & en pieces la Couronne de France, pour parer de la majesté & splendeur des ruines mesmes d'un si puissant Empire, l'insatiable cupidité Espagnole. Le moyen de l'acquisition d'un si grand Estat deuoit estre vne belliqueuse excommunication, par laquelle nous auons fait voir autresfois qu'on a dompté les plus puissants Royaumes: & la garantie du contract n'estoit appuyee ny plegée, que de l'exemple de quelques vns de ses predecesseurs de mesme humeur. Qui meslant & confondant toutes choses contre la simplicité & spiritualité de leur condition, ont combattu les Roys d'artifice ou de guerre ouuerte, ont subiugué les peuples de force ou de terreur, ont ren-

*Les Lan-
riers du
Roy.*

uerſé ou esbranlé les puiſſances de la terre, & trafiqué publiquement des Royaumes de cemonde. Car on fit marchandise ouuerte de l'Empire à Rome, depuis le temps de Charles le Chauue, le deliurant presque au plus *Regino.* offrant & dernier encherisseur, comme sous la picque d'une victorieuse armee. Adrian 4. vendit la Sicile & la Pouille: & le Roy Guillaume de Sicile la surencherit sur Emanuel Comnene, à qui on en auoit des-jà passé le contract. On liura le Royaume de Ierusalem & de Sicile aux charges de *Æmil. 7.* quarante mil escus par an. Innocent 4. exposa le Royaume de Naples en vente à Henry 3. Roy d'Angleterre, pendant la vie mesme de Conradin: *Matth. Paris.* on presenta à Frideric le Royaume de Ierusalem & de Sicile pour six vingts *Cōtinuat. bell. sacr.* mille onces d'or: & Alexandre 3. & Adrian 4. mirent l'Angleterre à l'enche- *Matth. Paris.* re. On l'auoit vne fois à demy vendue à Philippes Auguste, parce qu'il auoit vne armee preste pour la conquerir, quand redoutant sa fortune on la ren-

PHILIPPIQUE III.

Naucler.

dit à Iean Sans-Terre qui en offrit des conditions plus aduantageuses & plus hautes : & Boniface 8. fut si presomptueux & insolent d'oser contracter du Royaume de France mesme. Sur ce train desreglé, ce confederé d'Espagne, faisant loy de mauuais exemple, auoit fait marché de nostre Royaume, & enuoyé vn Legat pour en saisir & inuestir nos ennemis : à qui il n'a rien peu liurer que des nubes, des chimeres, & des songes. Car c'est comme il en prend à ceux qui promettent temerairement ce qui n'est à eux, que de presumption & d'esperance. Toutesfois, il n'a pas tenu aux contractans, qu'ils n'ayent accompli & entretenu la vendition. On y a apporté la force & l'artifice, & tout ce qui peut seruir à l'enuahissement d'un grand Empire. On a mis des armées aux champs, on a remué & troublé la terre de schismes & diuisions : on a escroulé le Ciel, pour le faire tonner contre nous : on a essayé de trauerser & destourner les doux aspects de son

bon-heur, & de corrompre les heu-
 reuses constellations dont il regarde
 benignement nostre Prince. On a
 fouillé iusques dans le cœtre de la ter-
 re, & sondé le secours des enfers : on
 s'est aduenturé d'en destacher les fu-
 ries d'anatheme, pour les lâcer horri-
 blemēt sur nous : on s'est efforcé d'ar-
 racher de la main de Dieu mesme la
 disposition du Paradis, pour nous en
 faire perdre le chemin & l'esperance :
 & nous fermer eternellement la por-
 te de sa grace, que le sang de son Fils
 nous a si largement ouuerte. Que n'a
 on point faiēt contre nous ? On a tiré
 l'espee de l'Eglise & employé ses spi-
 rituelles & mysterieuses armes, pour
 fortifier tant d'iniustes armes tempo-
 relles : on a emprûté le nom de Dieu :
 on s'est paré de l'honneur de sa que-
 relle : on a tantost bandé, tātost ployé
 la vertu de sa parole, selon qu'on a
 pensé la faire seruir à vn si mauuais ef-
 fect : on s'est armé du glaiue de Dieu,
 & couuert la foiblesse de tant d'entre-
 prises, du bouclier & autorité de son

PHILIPPIQUE III.

Eglise. Tout cela à vn execrable desfeing. On a ainsi peruertý & changé l'ordre de toutes choses, pour acquerir par art & superstition ce superbe & puisât Royaume. On a prophané de tât d'abus les purs mysteres de nostre Religion, pour nous assubjettir & asservir à nos plus cruels ennemis: pour dompter & perdre le premier Royaume Chrestien, pour abattre le support de l'Eglise, & réuerfer l'ancien & ordinaire appuy du siege de Rome. Tu t'abusas audace Espagnole; le Royaume de Dieu n'a rien de commun avec les Royaumes de la terre, ils n'ont rien à quereller pour les limites, leurs bornes sont assez apparêtes & remarquables. L'Eglise ne s'engage point en la conqueste des Empires, & ne s'entremet iamais des debats & cōtrouerses des Princes, que cōme mere cōmune, sans pencher vers la faueur ny vers la haine. Qu'on s'en cōseille plainement avec Gregoire de Nazianze, qu'on en delibere avec ce sage Sainct Ambroise, qu'on esteigne ceste auare soif dans

les fleuves de l'éloquence de Saint ^{Chrysoſt.}
 Chryſoſtome, qu'on ſ'en reſolue ſur ^{ſuper}
 l'autorité des Papes, comme Leon ^{Matth.}
 r. ils renvoyerōt bien loin de ſes pro-
 jets ambitieux, tous ces eſprits hau-
 tains pleins de contention, qui ſous
 le ſpecieux honneur des droits du
 Royaume celeſte, veulent finement
 empieter la terre. C'eſt prendre par la
 pointe ces deux glaives de l'Euaſgile,
 ſ'eſt ſ'en couper ſoy-meſmes la gor-
 ge, dit S. Chryſoſtome, que de penſer
 accoupler le glaive temporel au ſpiri-
 tuel. Le fils de Dieu eſt party du Ciel
 pour apporter la paix aux hommes, a
 fermé le temple de Saturne en naiſ-
 ſant, & n'eſt venu que pour combattre
 les vices, de la force & vigueur de ſa
 parole: ſans entamer iamais de ſon
 trenchant la cōſtitution des Empires
 de la terre, qu'il trouua tachez d'er-
 reur, cōfus de toutes ſortes de ſectes,
 & pourris des corruptions de longue
 ſuperſtition & idolatrie. C'eſt la leçon
 & le mirouer qu'il a laiſſé à ſon Egli-
 ſe. Et toutesfois c'eſt ſous ſon nom &

PHILIPPIQUE IIII.

sa doctrine comme d'un dessein tiré de sa main, peint des viues couleurs de sa parole, & releué du pouuoir de son Eglise, qu'on a voulu surmonter & réuerfer ce Royaume, si deuotieux & consacré à son seruice. Comme si la verité du verbe diuin, & la nette puissance de son Eglise, estoient meslees & embrouillees avec les impostures & vanitez de ce siecle: comme si le Ciel balancé de son poids & de son brasle, soustenu de sa secrette vertu & consistance naturelle, auoit affaire du support & appuy de la terre: cōme si les effieux la deuoient trauerser, pour se soustenir & reposer plus seurement: comme si ces deux corps si esloignez estoient encore attachez & collez dans le meslange de la confuse nuiet du vieux caos. Au compte de nos ennemis, il sembleroit que le Ciel pourroit enfanter la terre, qu'une substance purement spirituelle seroit capable de conceuoir & engendrer un corps si difforme & monstrueux: & que les saincts mysteres de nostre Religion

ligion pourroient produire la lourde
 masse de ce monde. Vous diriez au
 cours de ces abus ; que le Ciel basty
 de l'eternelle prudence de l'esprit de
 Dieu , pour esclairer la terre de tant
 de sortes de lumieres & d'estoilles, de-
 stiné pour la nourrir & renouueller
 des influences de tant de salutaires
 astres : en lieu de luy rire amoureuse-
 ment , pour l'esmailler & embellir de
 tant de sortes de fleurs & de verdures,
 de fondre doucement en larmes pour
 l'humecter & engraisser de sa douce
 rosee : en lieu de luy ouurir les tresors
 de son seing, pour l'enrichir de tant de
 fruiçts, & la parer de tant de differen-
 tes & admirables proprietéz, distillees
 & coulées par mille secrets canaux
 de son bon-heur : changeant de con-
 stitution & de visage, peruertissant
 l'ordre constant de son tour, & cor-
 rompant les regles perpetuelles de sa
 nature, ne deuroit plus servir qu'à la
 voiler des espesses nuicts de toutes
 sortes de differents & contentions, ne
se deuroit plus mouuoir que pour la

PHILIPPIQUE IIII.

foudroyer de mille esclats de feu , ne luy deuroit plus inspirer que les prodiges de mille comettes portentueuses & mortelles , ne la deuroit plus baigner que de sang humain , ne la deuroit plus charger que d'espines & de ronces , ny rouler que pour tacher sa belle face, d'infidélité, de parricide, de feu, de meurtre, & de carnage. C'est s'escarter bien loin du chemin du Fils de Dieu. Il nasquit, dit Sainct Bernard apres Sainct Augustin, en vne chetive bourgade , en la plus forte rigueur de l'hyuer , en vne pitoyable necessité & pauureté , avec l'extreme faute de toutes choses. Il se fit esleuer bassement , n'eust pas seulement des pierres pour reposer sa teste, ne posseda pas vne taniere pour se tenir à couuert , s'esloigna des pompes des cours Royales , marcha desdaigneusement sur la splendeur des sceptres, ne daigna iamais releuer de terre la couronne hereditaire de sa maison : & ceux qui se diront les Lieutenants de ceste puisſance spirituelle sur la

*Augustin.
in epist. ad
fratres
Mendines.*

terre oseront occuper les Royaumes, embrasseront & estraindront tous les sceptres les plus superbes, deschireront les plus glorieux diademes, & se diront moderateurs & maistres absolus de tout le mōde! Ces presomptiōs n'ont deffense ny couleur, qui ne pallisse à la plus foible lumiere. Car si le Fils de Dieu eust tant aymé & affecté les grandeurs du monde: s'il eut voulu parer & enrichir son Eglise de tout ce que la terre auoit de plus beau sur sa face, & de plus precieux dans son sein: s'il eust voulu fortifier & rasseurer les fondements de son Royaume celeste, de la maiesté & vertu des Estats humains, comme d'un arc boutāt de secours: Ne pouuoit-il pas desfeigner & faire esclorre des nouueaux mondes, affermir de nouuelles terres, faire couler de plus larges mers, & les peupler de plus de sortes d'animaux? Ne luy estoit-il pas aisé, au moindre trait de sa parole, de peindre la terre des plus naïues & plus viues couleurs, de la charger de plus iaunes

PHILIPPIQUE III.

& plus riches moissons, de l'orner de plus superbes edifices, de la couvrir d'un Ciel plus lumineux, cloüé de plus viues estoilles, semé d'astres plus esclairants & plus brillants. Il a rejeté loin de son eschole d'humilité & d'innocence tous ces allechements de grandeur, & de gloire : a escarté brusquement ces fumees de la lumiere des frequentes declarations de sa simplicité : & a couppé de la vigueur de sa parole les degrez & les ailes de toute vanité, qui eussent peu eleuer ses disciples es discours de ces nuées.

*In Epistol.
ad Iacob.
August.
lib. de
Cathed.
Bernard.
Cōsiderat.*

C'est le precepte de Saint Paul, le conseil de S. Clement Romain, l'humilité de S. Hilaire, la resolution de S. Augustin, & l'autorité de toute l'Eglise. S. Bernard ne marchant ny ne conteste pas icy avec le monde, pour se resoudre en vne chose si aisée. Enfonçant ceste question de mille foudres d'eloquence, il s'en adresse courageusement au Pape Eugene. Car c'est grād cas que les anciens peres, & toutes les premieres histoires de l'E-

glise, ont notté la chaise Romaine de
 festre la premiere licenciee à estendre
 la main sur la terre. On dit que ceste
 porte de la discipline fust entr'ouuer-
 te sous Urbain premier, mais elle est
 maintenant par terre. Que les saints
 peres Romains cessent donc d'enga-
 ger le Ciel és querelles de la terre, se
 despartent des mauuais desseings de
 Sixte & de Gregoire, & nous laissent
 demeller nos differents avec l'Espa-
 gnol. Qu'ils ne dressent plus contre
 nous la pointe de ces deux glaiues, ou
 bien qu'ils prennent garde, que la me- *Bernard.*
 nace de Saint Bernard ne se conuer- *de Considerat.*
 tisse en prophetie : Que voulant em-
 brasser trop estroitement ces deux es-
 pees, elles ne leur sortent toutes deux
 hors des poings. Qu'ils ouurent donc
 icy les yeux sur les playes que nous en
 auons receues, qu'ils aydent à deffiller
 ceux de nos peuples, & se ioignent
 à la iustice de nostre cause. Qu'ils
 desaduouient au moins ceste ambi-
 tieuse excommunication, puis qu'ils
 ne la peuuent deffendre qu'avec hon-

PHILIPPIQUE III.

te: Aussi ne craignons-nous plus les assauts ny les efforts, d'une si foible censure. Je leur presente pour miroüer, l'issue & la fin de ces deux de leur ordre, qui d'un vice Latin pensant deuorer leurs enfans comme Saturne, ayant fait tuer vn Roy de France d'un couteau de Moine apres l'auoir menacé du leur, nous ayant fait si longuement entrecoupper la gorge, nous ayant fait si durement entrechoquer comme pierres, pour allumer toute l'Europe du feu sorty de nos contentions: n'ont guiere suruescu à leurs fautes, adiournez deuant le tribunal de Dieu. Ces spectacles & exemples leur proposent plus de prudence, ou moins de vie. Que si on ne veut croire à ce veritable iugement de Dieu, qu'on attende au moins en patience l'arrest des peres anciens & de toute l'Eglise, sur cest ambitieux different. Que nos ennemis se cahent icy de crainte & d'horreur: que nos peuples endormis d'ignorance, s'esueillent à la forte voix de la iustice de l'Eglise. Ils en-

tendront que Sainct Ambroise con-
damne seuerement toutes sentences
prononcees de colere, qui courent à
la végeance, poussees d'hommes par-
tiaux & ennemis. Ils apprendront que
Sainct Hierosme nous admoneste, de
ne nous arrester pas sur l'escorce des
iugemens des pasteurs, sans sonder le
fonds, & fouïller bien auant dans la
cause. La voix (dit-il) de celuy qui de-
crete vne excōmunication, ne fait vn
hōme ny plus innocent ny plus cou-
pable, sil n'est de soy-mesme disposé
au merite ou à la peine : non plus que
les Prestres de l'ancienne Loy ne pou-
uoient enflāmer de lepre le sang d'vn
homme temperé. Car ils s'en faut tant
qu'vn mauuais iuge puisse rendre cri-
minelle vne ame iuste, qu'au contrai-
re sa sentence l'accable luy-mesme
d'opprobre, & abomination deuant
le throsne souuerain de Dieu. C'est
mocquerie (dit Sainct Augustin) de
s'imaginer que la puissance de lier ou
de dissoudre, puisse alterer ny flestrir
la pure constitution des esprits sains,

*Ambros.
in lib. de
Ioseph.*

*Hieronym.
super
Matth.*

*August. si-
per Matth.
de verbis
Domin. &
ad Cler.
Hipponens.*

PHILIPPIQUE III.

ou doiue offenser les Chrestiens, qui ne donnent point d'aduantageny de prise, à la rigueur de ce mal. Il ne sert de rien que l'humaine ignorance pense audacieusement rayer du liure de vie, celuy que la mauuaise conscience n'en a premierement effacé. Que Manichee face en terre tel iugement qu'il voudra d'Augustin, pourueu que sa meschâte vie ne le charge, ny ne l'accuse au Ciel d'aucun crime. On se lie plustost soy-mesme en voulant attacher iniustement les autres. La diuine iustice rompt de force ces rigoureux liens, & brise en esclats les chaisnes les plus fermes de la malice, & de l'enuie. Si quelqu'un est frappé mal à propos de quelque atteinte d'anatheme, qu'il s'assure que le supplice attend celuy, qui l'a laissé tomber si imprudemment de sa main: & que le S. Esprit, qui n'attache rien que sagement, affranchit & deliure les consciences, de tous ces enlacements & attaches presumptueuses. C'est la resolution de tous les peres, le consente-

ment

ment vniuersel de toute l'Eglise : & les celebres & eternels arrests des Conciles de Nice, de Sardique, du premier, troisieme, & quatriesme de Cōstantinople, des Conciles d'Ephese, de Calcedone, d'Arles, d'Agde, d'Orleans, de Mascon, de Tours, de Meaux, & de Vienne. Ce sont les preiugez des Synodes de Carthage, de Tolled, de Francfort, d'Erphort, Tribur, Vvormes, Brix & Majance : & presque de tous les Conciles Romains. Que s'il faut ioindre à vn iugement si solide, remply de si prudents suffrages, balancé d'vn poids si iuste, & mesuré d'vne si egale main, vn renfort de l'authorité des Papes : Calixte I. reprouuera toutes censures, basties de faueur ou de crainte, & Gelais I. abhorrera tous anathemes qui ressembleront à cestuy-cy. Ce sont les claires declarations de Sainct Gregoire, à qui on est necessité d'acquiescer, & les veritables oracles du Sainct Esprit, que la plus hardie calomnie ne scauroit iamais dementir. Que les

*Calixt. I.
Epist. I. ad
Benedict.*

*Gregor.
magn.
Epist. 9.
lib. 2.
Epist. 14.
lib. 6.*

PHILIPPIQUE III.

plus cōtentieux espritsexercent donc icy les curiositez, & subtilitez de leurs fantasies, qu'ils prennent beaucoup de peine pour essayer à nous en donner: ils ne sçauront trouuer d'assez larges & longues fuites pour se sauuer de ceste charge: ils ne se pourront couvrir de ces traits du Ciel, ny euites ces coups vigoureux de la iustice de l'Eglise. Qu'ils cherchent des nouuelles ouuertures de querelle: ils ne pourront iamais trouuer de requeste ciuile assez forte, pour esbranler la ferme vertu de ces arrests: ny des propositions d'erreur assez captieuses, contre la sage & droite foy de toute l'Eglise. Pourquoy dōc, François ombrageux & esgarez, tremblez-vous à l'horreur imaginaire & vaine, de ces Bulles? Pourquoy redoubtez-vous les atteintes, & les coups de ces censures si legeres? Ce ne sont que Lyons pourtraits & inanimes, sans corps, sans mouuement, & sans vigueur; releuez ainsi de couleur & d'artifice, pour esfaroucher les peuples. Ce n'est rien

que peinture morte, rehaussée du pin-
 ceau, animée de quelque apparence
 de fureur & d'effroy, pour l'espouuen-
 tail des plus simples. Ce sont foudres
 imitez & contre-faits d'un ouurage
 Salmonée : ce sont glaiues espointez
 & rabatus, Couleuvres esdentées, Ser-
 pens desarmez d'esguillons. Rasleurez
 seulement vostre veüe, & vous vous
 mocquerez de ceste feinte. Quand les
 bornes du pouuoir de ce mauuais ou-
 urier, qui a forgé ce tonnerre, esgale-
 roient bien son enuie desbordée : son
 foudre est de mauuaise matiere, les
 pointes en sont foibles & tortues, il
 n'a pas esté assez battu, la trempe en
 est mole & lasche, il s'est rompu &
 brisé en l'air auant que de venir à nous,
 & s'est creué dans les mains mesmes
 de celuy qui l'a osé lancer, à sa ruïne &
 à sa honte. Si les esclairs & le bruit de
 ces tempestes, ne vous ont esbloüy la
 veüe, & ne vous ont estourdy l'oüye,
 que vo^r semblez auoir endurcies aux
 malheurs & à la plainte. Si vous n'a-
 uez despoüillé avec la raison, toutes

PHILIPPIQUE III.

vos naturelles facultez : s'il vous reste
encores le sentiment de vostre mal &
de vos playes : respondes-moy pau-
ures gens, qui vous peut tenir si lon-
guement en ces songes? Refusez-vous,
insensé & furieux? Pensez-vous viure
en France ou en Espagne? Non, vous
n'avez point encores changé du tout
vostre païs, nous vous y auons con-
seruez quand vous en estes voulu sor-
tir. Vous en respirez encores l'air que
vous avez tant corrompu, vous en
voyez encor le Ciel troublé de la
honte de tant de crimes, vous en pres-
sez encores la terre souillée de meur-
tre & de sang, vous retenez encor vos
corps malades esteints & chancel-
lans, vous sentez encor debattre vos
ames forcenees d'une fièvre chaude
& violente. Qui vous fait donc dor-
mir si longuement d'un somme voi-
sin de la mort, sans que tant de poin-
tes de douleur & de mal, vous esmeu-
uent ny esueillent? Voulez-vous touf-
jours viure dans l'horreur de ces se-
pulchres, enterrez si profondément

dans les ruines de la France ? Ceste
 nuit ne passera-elle iamais ? Langui-
 rez-vous tousiours dâs les ombrages
 & obscuritez de ces deserts de men-
 songe sans ouurir les yeux aux esclats
 d'un si luisant Soleil de verité ? Ce n'est
 pas vne nuit Cymeriene, ce sont om-
 bres perpetuelles, tenebres palpables
 & desreglees contre le cours de la na-
 ture, & les mouuements du temps :
 rien ne garde icy son naturel ny son
 ordre. Ceste mer est trop long temps
 esmeuë, il n'y a vent de si longue ha-
 laine, l'air seroit espuisé d'orages, la
 marée ne monte point si haut sans re-
 flux, ce vin a bouilly trop lōguement,
 & ceste cholere si recuite deuroit
 estre desia changee en melācholie, &
 repentance ? Aussi ne sçay-ie bonne-
 ment quel nom dōner à vostre fortu-
 ne, ny quelle vraye marque imprimer
 à la rigueur de vostre mal. Car si ie
 vous appelle esclaves, ie ne voy point
 de si fortes chaines ny si tenâtes, dōt
 vous ne vous puissiez bien affranchir
 & deliurer. Ne faites que le souhaiter,

PHILIPPIQUE III.

ces liens tomberôt de vostre col, sans qu'on recognoisse seulement les empreintes & les traces de leurs estreintes plus violentes. Si ce n'est ce ioug estrange qui vous blesse, apprenez-nous le naturel de vostre mal? Car la douleur est trop cuisante, les assauts en sont trop vehemens, pour feindre de vous trouuer bien? Si c'est fieure continue, est-il possible qu'elle ait duré tantost quatre ans en ceste ardeur & violēce si extreme, sans vous donner quelque relasche, ou bien le repos du tóbeau? Si c'est vne fieure errante, pourquoy auant le iour de son retour, ne pensez-vous à vous guerir? Que ne desseichez-vous les humeurs qui la prouoquent? Que n'estanchez-vous les corruptiōs qui l'irritent? Que ne vuidez-vous le sang bruslant qui fait tāt battre vostre poulx? Non, c'est encores pis que tout cela. C'est vne vraye lethargie, vne conuulsion vniuerselle, vn general assopissement de tous les mēbres, vne extraordinaire paralisie, vne pourriture de tout le

corps. Mais les parties vitales sont-elles si fort esteintes & refroidies, que tant de fortes & dures estraintes, que les traits piquants de tant d'aigreur, l'applicatiō de tāt de fers trenchās, & tant de sections repetees, ne puissent reuoquer le sentiment? C'est plustost vne fureur enragee qui vous emporte à trauers les chāps & les rochers, qui vous escarte dās ces forests, qui vous enleue sur les plus droites pointes de ces montagnes, qui vous fait courir à val de ces precipices, & vous traine ainsi à la mort. On diroit que quelque Megere d'un flābeau ensouffré & d'un fouët, va sans fin tallōnant vos pas, & vous promene à l'aduēture: sans autre guide ny autre but, que le mal-heur & la ruine? C'est vn aigle de vengeance qui deuore vos entrailles; vn vautour de désespoir qui vous becquet-te ainsi le cœur, & vn ver picquant de conscience qui sans mercy ronge, & bourrelle vos ames. François, si i'ay touché à vostre mal, ne vous perdez point à desseing. Si vostre fureur a

PHILIPPIQUE IIII.

quelque interualle, si vostre esprit peut rencontrer quelque assiette plus reposée: repentezvous seulemēt. Que le preiugé que vous faites de vous-mesmes, vous amende sans vous perdre. Vous auez vn Roy clement & genereux, vn Prince bon & pitoyable, qui vous receura cōme pere, qui vous embrassera comme enfans. Ne faites que fleschir le genouil, vous obtiendrez soudain sa grace. La porte de sa misericorde est ouuerte, rien ne vous en deffēdra l'entree, que vostre obstination & vous mesmes. Vous demeurez donc encores plâtez au plus haut poinct de vostre mal, tousiours buttez à vostre perte? Ce n'est donc pas vn mal fortuit ni naturel: c'est vn vray charme & sortilege. Vous estes enyurez d'vn poisō mortel, vous estes enchâtés des piperics de ces Bulles. Helas! vous deuriez auoir assez recogneu les finesses de cest artifice, & tenté la foiblesse des nœuds de tous ces liens volontaires. Que si vous ne daignez recognoistre tout ce qui vous peut
faire

faire haïr, & detester sainctemēt comme Chrestiens & vrais François l'injustice de ces excommunicatiōs: ouvrez au moins vn peu les yeux sur leur dessein ambitieux, sur leur fin cruelle & sanglante: & ressentez viuement comme hōmes, à quel mal elles vous attachent. Et vous verrez que c'est pour vous ietter ainsi liez & garrotez de tant de chaines d'aveuglement & d'ignorance, en l'horrible tyrannie de l'Espagnol: sous le pesant ioug de laquelle vous oyez ces miserables subiets lamenter & gemir si hautement, qu'ils irritent toute l'Europe, & esmeuent toute la terre. Si ce n'est point pour ployer vos esprits François à vne si espouuantable & horrible seruitude, que vous les fleschissiez si laschement: à quel dessein buttent ces fureurs & ces manies? Quel fruit rappez-vous des espines de tant de peines? Quelle esperance de santé conceuez-vous de tant de mal, que vous-vous donnez sans subiect? Je ne voy pas que vous vous trouuiez

PHILIPPIQUE IIII.

mieux à vostre aise , pour auoir esbranlé les puissants fondemés de cest Estat, basty de si haute prudēce, confirmé du bon heur de tant de longues anneés, conserué par tāt de grāds seruićes de vos peres. Que si vous hay ez tāt la Monarchie : dites nous quelle sorte de gouuernement vous pensez choisir en ces diuerśes confusions qui tiennent vos esprits ondoyants & suspendus sans sçauoir à quoy vous resoudre qu'à vne eternelle misere? Estimez vous que la constitution d'vn grand Royaume, si sagement desseignée, si fortemēt establie, si heureusemēt nouēe & affermie , puisse changer legerement de forme, de nature, & de visage? Vous-mesmes qui estes tous rangez & accoustumez à viure sous la douceur & le repos d'vne iuste Monarchie , ne pourriez prédre vn ply cōtraire, ny pēcher à quelque autre cōditiō. Car si des pićes & ruines de ce grād Empire, vous proiettez de bastir & façonner quelques nouuelles Republiques: pourriez vous suppor-

ter en France que chafque ville fit vn Eftat à part ? Si ce font les belles femences, & les agreables fondemens de vofre tranquillité: fi c'eft le plan & le deffeing de ce repos fi defirable, pour qui vous feignez tant de foufpirer : vous bafiffiez fur la glace d'une nuit. Vous feriez tousiours en defordre & en guerre, vous ne viuriez plus qu'en querelle, & debattriez fans fin pour vos droits & vos limites. Mais en ces vains difcours de vos gouuernemés populaires, ne iugez-vous pas que la capitale, & plus puiffante ville de la prouince, voudroit mettre le pied fur la gorge aux plus foibles, pour leur donner absolument la loy ? Que dix tyrans qui fe rencōtreroient en elle, pilleroient & rauageroient la contree, & se battroient pour le commandemēt ? Qu'il faudroit pour l'entretienemēt & la garde d'une feule ville, autant de foulles & d'exactions de deniers, autāt de garnifons de gens de guerre, & autant d'armees foudoyees, comme il en feroit neceffaire pour

PHILIPPIQUE IIII.

munir & conseruer vne nouuelle souueraineté, & la deffendre de la forte domination Espagnole, son ennemie & sa voisine? De cent en cent pas on trouueroit donc des nouuelles bornes? Ce ne seroient que villes de frontiere & de garde? Vous, qui auez du bien en tant d'endroits de la France, qui negociez en toutes ses prouinces, qui auez pourueu vos enfans en tant de diuerses villes, qui auez respendu vos fortunes dans tout le cerne de la large enceinte de ce Royaume, qui faites diuerses demeures pour la commodité de vos moyes & de vos affaires, seriez subiects d'autant de diuers estats, & nouveaux maistres: vous trouueriez aubains en cét lieux d'une mesme prouince: seriez fouillez comme estrangers au sortir de vos faulxbourgs: obtiédriez lettres de naturalité en tât de nouuelles Republicques: & au premier bruit de quelque guerre dont les semēces seroient frequentes & fertilles, perdriez en l'une ville biē miserablement ce que vous auriez

iamais acquis par tant de sueur & de peine? Quelle confusion! Quel desordre! Vid-on iamais de plus grands troubles? Car tous ces petits estats se-
mez des esclats & du debris de ceste superbe Couronne, comme des dents du Dragon de Thebes, esclos avec la contention & la querelle, mourroient aussi tost d'une sanglante guerre Cad-
mee. Aussi quelle folie, ô peuples! Pensez-vous que la Noblesse de France, que tant d'hommes de dignité, à qui la nature & les offices ont donné le droit de vous cōmander, à qui vous seruez pour gagner vos vies, se vou-
lussent assubjettir indignemēt à vous, & trainer vne vie lasche & miserable, sous vne si basse & si vile seruitude? Ne croyez-vous pas que si cest eternal E-
stat deuoit rompre sous le poids de sa grandeur, ou sous la charge de ses miseres: que ceux que vous auez pro-
meus vous-mesmes au gouuernemēt & deffense de vos villes, recueillant les reliques & les restes de ce naufrage, voudroiet demeurer vos maistres?

PHILIPPIQUE IIII.

Que pour vn Roy vous en auriez cēt?
Il faut accorder à Homere que la pluralité de Seigneurs ne vaut rien, & qu'il ne faut pour tout qu'un Roy. Or en ceste necessité de retenir la Monarchie, à qui voudriez-vous defferer le sceptre? Le voudriez-vous desrober à vn Prince legitime, issu de ces braues demys-Dieux qui vous ont donné la Gaule, qui vous ont conseruez si longuement & heureusement en paix, & deffendus si vaillamment en guerre: pour en parer vn estranger & barbare Espagnol, vostre ancien & capital enemy? Pour en honorer vn tyran si descrié & si hay: de qui les cruautéz, les auarices, & luxures sont diffamees par tout le monde, grauees par toute l'Europe de meurtre, de feu & de sang, & dont vous avez ressenty en France tant de violents primices? Voudriez-vous ietter par terre la grandeur de cest Estat, corrópre le train réglé & le cours certain des successiōs des Princes, violer la saincteté des loix Saliques, & forcer vostre nature mesme,

en faueur de vos ennemis naturels ? Quand le Roy ne seroit vostre Prince legitime, que le prudent & constant ordre des mœurs & ordonnances de ce Royaume, ne luy mettroit la Couronne sur la teste: quand ce sceptre seroit electif, ou subject à l'aveugle sort: qui scauriez-vous choisir ny desirer, plus propre ny plus digne d'un si puissant & grand Empire ? Iettez curieusement les yeux sur toute la terre: vous n'en trouuerez point de semblable à luy, ny de pareil à vne charge si pesante. Il est de la plus ancienne & illustre maison qu'on puisse remarquer en tout le monde, dont le tige estoit fort & vigoureux dès le tēps de Charlemagne. Il n'y a Prince qui puisse fonder sa dignité sur l'antiquité de tāt de siecles, ny tirer de si noble source la splendeur de sa naissance. Il est fort de la semēce d'un long ordre de bons Roys, de qui la memoire est eternelle. Aussi ne void-on rien en luy que iustement proportionné & mesuré, à vne si celeste origine. Il est bon & ge-

PHILIPPIQUE IIII.

nerveux, doux, benin & accessible: d'un cœur clement & pitoyable, pere charitable de son peuple. Il est prudent, aduisé & resolu, capable de toutes grandes choses; qui sous la conduite de l'esprit de Dieu, s'est tiré de mille pieges que les ruses de ses ennemis luy ont tendu depuis trente ans. Dieu l'a mené comme par la main au gouuernail de cest Estat, avec tant d'apparens miracles & claires demonstrations de son assistance: qu'on ne peut nier sans impieté ou ingratitude; que sa sage bonté ne l'ait estably sur ce throsne, pour nous affranchir de l'oppression de ces miseres si tenantes & si longues. Il n'est pas aussi mesconnoissant de tant de benefices & de graces. Il sert Dieu religieusement, l'honore & le craint avec toute reuerence & respect, & appuye fermement sur luy ses desseings & esperances. Qués'il m'est permis d'imiter d'une main tremblante & craintiue, les traits diuins de quelques vnes de ses autres vertus: ie diray ce que chacun voit
reliure

reliure cōme moy; qu'il est iuste, magnanime, cōstant & moderé, tousiours semblable & esgal en tous visages de fortune. Qu'il aime la iustice, respecte les loix, embrasse l'ordre & la police, se declare ennemy de tous vices, & exacte vengeur de tous crimes. Aussi n'a-il point esté nourry parmy les superfluites & les delices, qui peuuent corrompre ou ployer les bonnes constitutions des Princes. Il n'a pas esté presque né qu'on l'a employé en affaires dangereuses & importantes, qu'on l'a exercé en continuelle guerre, & endurcy à la peine & au trauail. La necessité des affaires passées luy a seruy d'eschole pour regner, & d'une iuste & droite reigle, pour mesurer les presentes. Elle l'a nourry en parsimonie, luy a fait haïr les despences desreglees, pour espargner le sang & la sueur du pauvre peuple. Il est trop mal-aisé à vn nouuel ouurier, & de si peu d'experience; d'exprimer bien au naïf tant de rares perfections d'un si grād Prince. Car si i'ose toucher aux parties ne-

PHILIPPIQUE IIII.

cessaires & requises en vn Roy, pour
conseruer en paix vn grand Empire:
c'en est la viue source & la fontaine,
il les faut apprendre de luy. S'il faut
parler de la guerre, c'est le nourris-
son de Mars, vn Achille, vn Alexan-
dre, l'assurance de tous les siens, l'e-
stonnement & la terreur de ses plus
fermes ennemis. C'est le plus grand
& plus sage Capitaine, que le Soleil
vid iamais: qui esbloüit & offusque
des esclats de sa vertu & de sa gloire,
la memoire plus vigoureuse de tous
ces braues chefs de guerre, dõt l'anti-
quité fait tant d'estime: de qui les fre-
quentes victoires & trophées, se pre-
senteront pour exemple à tous ceux
qui porteront iamais sceptre: de qui
tant d'actions belliqueuses & magna-
nimes seruirôt de miroüer & d'escho-
le, à tous ceux qui voudront suiure à
sa trace, l'honneur des armes. Tant de
graces, & admirables vertus l'auoient
certainemēt destiné à la conqueste &
Empire de tout le mōde, si les trauer-
ses des mal-heurs de ce Royaume, &

tāt de diuers destours des perfidies de ce siecle, ne l'arrestoient en chemin. Il fait bien porter les marques de sa valeur & de sa main, à ses plus superbes aduersaires. Ils ne l'ont iamais osé attēdre, sans se repētir aussi tost de l'outrecuidāce: & n'ont peu fonder leur salut que sur la vistesse des cheuaux, & sur vne fuitte deshōneſte. Mais que pourroy-ie rapporter assez dignemēt de la bōté de son naturel? Il ne voit qu'avec regret & avec larmes, les miseres de son peuple, les playes de la Frāce, & la desolation de cest Estat. Il trauaille incessamment pour sa restauration, employe sō esprit & ses mains à redresser les anciennes colomnes de ce Royau-me, renuerſees & abatues par tant de coups de l'enuie & du tēps: & se consume en tant de peines, pour nous acquerir le repos. Tant de labeurs & de veilles, tant de fortunes qu'il court, tant de dangers où il se iette, tant d'incōmoditez qu'il supporte si constamment, sans s'espargner en la rigueur de la saison la plus rude; sont autant d'e-

PHILIPPIQUE III.

ternels tesmoignages de sa bonté; & de l'ardente affection qui le porte au soulagement de ses subjects, & reſta-blissement de ceste Couronne. Je suis contraint de donner encor vn traitt à ce tableau, tiré de la main d'un apprê-tif; non tant pour seruir de desſeign, que de desir aux meilleurs maistres de le parfaire. C'est que pour les habi-tudes du corps, il est admirablement bien composé. C'est vn Prince tres-a-greable, qui porte toute grandeur & majesté sur le front, qui a ie ne ſçay quoy d'auguste & de diuin dans ſes yeux, que ie ne ſçauroy cōceuoir. Son regard sert en nos mal-heurs de l'in-fluence d'un nouuel aſtre: & le bon-heur de ſa ſeule veuë, conſole & con-firme ſes ſeruiteurs. Il est d'un aage meur pour regner prudément & lon-guement, d'une ſanté ſolide, nerueuſe & vigoureuſe. Sa cōſtitution eſt forte & adroite, propre à toutes ſortes de valeureux exercices. Il eſt diligent & actif, d'une prompte & facile appre-henſion, viuant en perpetuelle vigilan-

ce, sans fermer iamais l'œil sur ses affaires. Oseray-ie bien m'enhardir de releuer ce tableau du vif de ceste seule couleur ? Qu'on en discoure comme on voudra, il faut que les plus enuieux recognoissent & confessent, que c'est l'œil & le bras de l'Europe, le cœur de ses alliez, l'esperance de ses subjects, la crainte de ses ennemis, & l'assurance de tout le monde. En fin qu'il est seul capable de deffendre le Christianisme de l'oppression des infideles, quand l'abyssine de nos pechez les auroit vomis sur nous. Car si le Turc las du repos qu'il nous a donné à son regret, se desgorgeoit sur la Chrestienté cōme vn fleuve violent, de qui on trauerse & arreste le cours. Si frāchissant les bornes d'Esclauonie, il iettoit aux champs ses estendars, marquez de vengeance & de sang. S'il se faisoit voir de nouveau avec vne armee de deux cens mille combatans, equipez de son ancien ordre. Si on voyoit la Hongrie couuerte d'hommes, semee d'armes, herissée d'vne moisson

PHILIPPIQUE III.

de picques, noyee d'une mer de gens de guerre, & esbranlee d'un millier de chariots, effrayer tout le reste de l'Europe du seul nom de cest ennemy, & de la reputation d'un si nōbreux exercice. Si les cōfins de Boheme & d'Austrie estoient des-jà troublez des hennissemens des chevaux, du bruit enroué des trōpettes, du son estourdissant des tambours, & du tonnerre espouventable de ses canons. Si on oyoit l'air retentir du murmure confus de tant de barbares, esmeus & enfliez comme flots : si le Ciel gemissoit aux plaintes des pauvres Chrestiens martyrez : que le iour semblast presque voilé de l'ombre de tant d'enseignes ondoyantes : qu'on ne vist rien par tout que sang respandu, & feux allumez : qui pourroit-on mettre en teste à un si puissant & fort ennemy tant armé à l'aduantage, & muni de si longue main ? Qui luy pourroit on opposer pour rabatre sa fureur & son audace : pour repousser ceste inondation, pour venger l'iniure de tant de Chre-

tiens opprimez, pour garentir les autres de pareille violence, & renfermer ce commun fleau de nostre Religion, dans les anciens limites de ses premieres vsurpations? Luy oferoit-on presenter l'Espagnol, faire rempart d'un homme caduque, cassé de l'aage, gasté d'intemperance, corrompu des voluptez, engourdy de longue oisiveté : & faire monstre de ceste vicille d'Austriche qui ne tira iamais espee, qui n'en a porté il y a vingt ans, qui blesmiroit au premier son des trompettes, qui s'esuanoüyroit aux esclairs des espees, qui n'oseroit presque sortir des delices de l'Escorial, quand il verroit le feu allumé aux quatre coings de son Royaume? Mais qui voudroit marcher sous ses drapeaux, quand l'assurâce des autres Princes luy auroit fait reuenir le cœur : quand la crainte de perdre son Estat, & la defense pressée de sa propre vie, plustost que l'apprehension de la seruitude de tant de Chrestiens, le pourroient faire asseoir sur vn branquard, ou le nicher

PHILIPPIQUE III.

dans sa litiere? Quelle face , & quelle parade si plaine de mocquerie , plus propre pour faire rire, que pour estonner vn si superbe ennemy : de mettre au front d'vne valeureuse armee , bastie des forces de toute la Chrestienté, vn espouventail de roseau si chancelant & si foible ! Peut-estre qu'en vne si miserable & deplore'e calamité, vous employeriez le Duc de Parme. Quoy ? vous recourriez à la protection d'un homme maladif & incommodé, blessé de coups d'adventure, estropié de playes deshonorables, qui n'a iamais osé attendre le choc de nos armees, qui n'a eu iamais le courage de presenter vne bataille , qui l'a tant de fois refusee avec honte, qui ne cōmanda iamais en vn grād combat, qui ne sçait pour tout que des ruses & des fuites? On ne le voudroit pas aussi respecter ny recognoistre pour General d'vne si noble & puissante armee, cōposée de toute la fleur de l'Europe. Tant de grands Princes, tant de vieux & vaillans Capitaines, les chefs
de tant

de tant de braues gens de guerre, les Colonels de tant de genereux peuples ne pourroient iamais voir commander vn petit Duc, de qui le nom n'est fortý en veuë, que par la porte que nous auons ouuerte à nos miseres. Il ne feroit obey que de quelques restes de Carabins desbandez, des troupes rapiecees de quelques Negres, & des reliques deschirees de ces my-Maures d'Occidët, que le Roy a si valeureusèment chassé de France. Que feroit donc alors la Chrestieté, assaillee d'vn orage de tât de diuers traits de mal-heur, cōbatue de si fortes armes, esbranlee des efforts violens d'vn si puissant & roide ennemy: & si destituee de secours & de deffense? A qui se retireroit-elle, au fort de si extremes miseres? Faudroit-il perdre la Religion, que nos peres ont si purement & si cherement gardeë, qu'ils ont fait couler iusqu'à nous, si entiere & si nette? Nous verrions dōc esteinte & abolie la foy, que le sang de Iesus Christ a imprimée du caractère de sa Croix

PHILIPPIQUE IIII.

dans les ames de ses enfans, qui a si heureusement & fertilemēt prouigné, arrousee du pourpre de tant de martyrs, que toutes les Eglises & tous les peres, en tant de temps & tant de siècles, & parmy tant d'estranges & diuerfes mutations de l'estat du mōde, ont conserué immuable & inuiolee, qu'ils ont retenu viue & flamboyante contre les vents de tant de tempestes, qu'ils ont sauuee seurement de tant de naufrages, qu'ils ont fait durer forte & droite, sans rompre son cours egal à la rencontre de tant de diuerfes fortunes? Les maisons de Dieu seroient furieusement abatues, son champ en friche, sa vigne arrachée, sa bergerie toute esgorgée, ses vigneron & ses pasteurs massacrez cruellement, toute sa famille taillee en pieces, & le Christianisme outragé de toutes sortes de tempestes, sans trouuer ny port ny abry? Il faudroit que nous vissions les Eglises saccagees & bruslees, les sanctuaires prophanez, les autels pollus de sang, & tant de Chrestiens im-

molez à l'entour: sans que la sainteté ny le respect de leur azile peut garantir tant de peuples, qui les embrasseroient en mourant? Les vaisseaux sacrez destinez à l'honneur & reuerence des mysteres de nostre Religion seruiroient à l'auarice & luxure du Iannissaire, les vierges vouëes & consacrees à Dieu seroient violees publiquement, nos saints Euesques & nos Prestres trainez ignominieusement au supplice, tât de sortes de Religieux meurtris, la pudicité des femmes forcee, la pluspart des Chrestiens martyrez, les autres attachez à la Cadene, & reseruez à vne eternelle seruitude? Ce ne seroient que boucheries de Chrestiens, les riuieres regorgeroient de sang, les mers en seroient colorees & teintes: tant de riches & nobles edifices trebuscheroient abbatus, la terre seroit hideuse de masures, le feu deuoreroit ce qui pourroit rester entier de la fureur de ces barbares, & toutes les grandeurs & les fortunes de l'Europe demeureroient enseuelies sous

PHILIPPIQUE III.

la cheute de la foy Chrestienne? Quelle resolution, & adresse pourroit-on prendre en ceste calamité derniere? Quelle lumiere pourroit-on voir, en la nuit d'un si grand trouble? Quelle esperance pourroit produire vne desolation si deplorece? Ce seroit sur nostre sage & braue Prince, que toute l'Europe estonnee, effrayee, & abatue, tourneroit incontinent sa veüe. Ce seroit de ce grand Roy de France, qu'elle choisiroit la conduite, de qui elle imploreroit le secours, de qui elle presseroit & estreindroit les genoux toute exploree & larmoyante, pour l'esmouuoir à sa deffense. Ce seroit aussi à ce fils aîné de l'Eglise, à ce Roy du premier & plus puissant Royaume, à ce Prince du premier né des sceptres, à ce grand Lieutenant de Dieu sur la terre, à ce bras armé de sa vertu, à prendre ceste charge, à venger la querelle du Ciel, soustenir la cause de l'Eglise, appuyer la Religion esbranlée, & entreprendre la conseruation de tant de peuples, que

sa dignité & sa vertu, & les vœux de tout le monde luy defereroient si iustement, en la pressante necessité de tant d'affaires desesperées. Il faudroit que ce petit fils de Saint Loys, que ceste noble & illustre race de tant de religieux Roys de France, qui poussez d'un desir de l'aduanancement de nostre foy, sont allez rechercher ce violent ennemy iusques dans le centre de sa puissance, qui ont entrepris de si frequens voyages outre-mer, pour conquister la terre Sainte, qui ont couuert l'Ocean de voiles, qui ont fait reluire si glorieusement leurs espees en Orient, qui ont presque osbloüy le Soleil de la lueur de leurs armes, qui ont estonné l'Afrique & l'Asie de tant de forces de gens de guerre, & fait trembler sous leur reputation & leur vertu tous les Empires de Levant, embrassast courageusement le salut de l'Europe, & la protection de nostre Religion. Il faudroit que ce grand & sage Capitaine, que ce Prince de tous les Chefs de guerre qui ont iamais

PHILIPPIQUE III.

consacré leur nom à l'immortalité, que ce dompteur de tyrans, ce vainqueur d'ennemis, ce gaigneur de batailles, & ce demy-Dieu des armées, repoussast courageusement cest effort, & combatist cest insupportable ennemy: qu'il deliurast le Christianisme de ceste tyrânie, deffendist tant de Royaumes, sauuaist tant de peuples, estanchast tant de sang, & vengeast de tant de playes & d'injures l'ancienne gloire de l'Europe. Ce vigilant & expérimenté pilote, prendroit le soing & la direction de ce vaisseau, emporté des flots & des vents: le seul astre de son nom racoiseroit ces tempestes, le soleil de sa valeur dissiperoit ces nuëts, le rocher de sa vertu romproit ces vagues courroucees, & le sage port de sa prudence receuroit les misérables ancres de toutes les esperances Chrestiennes. Vous le verriez à lors, François, assisté de tous les plus grâds Princes de ceste fertile & populeuse Allemagne, accompagné des forces d'Angleterre & d'Escoffe, embrassé

de toute la Boeme, Poulongne, Suede, & Dannemarck, fuiuy comme d'une fourmilie de tous ces vaillants Suisses & Grisons, desiré de l'Italie, & respecté de l'Espagne, deuenir Empereur & General de l'armee des Chrestiens : & tous les peuples de la terre vous feroient rougir de honte, au iour d'un si clair tesmoignage de ses merites, d'auoir refusé si longuement le iuste sceptre d'un Prince si vertueux, que tant de sages & belliqueuses nations auroient esleu pour leur cõduite. C'est à lors que vous l'admireriez, & l'adoreriez presque, forcez d'estonnement & d'aïse : de voir toute la Chrestienté ensemble se tapir comme sous ses aïles, & se couvrir du bouclier de sa valeur. Mais vous mourriez de douleur & de regret, d'auoir si mal seruy ce braue Roy, que vous contempleriez au front d'un si grand nombre de bataillons, si diuers d'armes & d'enseignes, monté sur vn cheual superbe, tout escumant d'impatience du combat : que vous verriez couuert d'ar-

PHILIPPIQUE III.

mes graues de victoires, toutes reluisantes de gloire, & esclatantes comme foudres : apres auoir donné courage à tant de vaillants Capitaines & gens de guerre, apres auoir remply tous les siens d'alegresse & d'esperance, & comblé les ennemis de terreur & d'effroy, aller le premier à la charge, ouurir & renuerfer à sa rencontre la presse la plus serree de ceste foule mescreante. Qui vous estrange donc tant, François, de l'obeissanced'vn si grand Prince? La veuë de tant de belles vertus, l'admiration de tant de perfectiõs plus qu'humaines, ne vous attirent-elles point de mille chaisnes d'honneur & de foy, à la reuerëce de son sceptre? Aimez-vous mieux seruir à toutes sortes de maistres, & à vostre naturel & irreconciliable ennemy, qu'obeir à vn si bon Roy, que la prudente main de Dieu a choisi legitimement pour vous tirer de tant de peines : de qui toutes les Prouinces du monde prendroient à beaucoup de bon heur, le commandement & l'Empire? Vous
plaisez-

plaisez-vous dauantage aux insolences & cruautez de la guerre, qu'aux commoditez & felicitez d'une paix, que vous gousteriez si doucement sous l'heureux regne d'un Prince si iuste? Ne feroit-il pas meilleur voir la France en repos, toutes choses remises en leur splendeur, & restablies en leur ancien ordre sous la conduite d'un Roy si sage, que voir ainsi les yeux mouillez de continuelles larmes un Estat desreglé, desmembré & deschiré? que vous voir entre-couper miserablement la gorge, transportés d'une fureur plus que brutale: & vous opprimer obstinemment dans la foule de tant de maux, pour creuer en fin sous le fardeau de la tyrannie Espagnole? Faut-il que l'infortunée France soit tousiours rongee des vipereaux qu'elle a conceus, bruslee & mise en cendres par les torches qu'elle a enfantees, hideuse & espouventable de tant de meurtres & de flammes? N'y-a il pas plus de plaisir à regarder un Ciel serain, brillant de mille sortes d'astres: à iouir de la beau-

PHILIPPIQUE III.

té d'un temps net & assésuré, esclairé
 du doux œil du Soleil, & doré de sa
 blonde tresse: à voir la belle Auberian-
 te venir esclorre le iour, & parer heu-
 reusement la terre des riches perles
 de sa rosee: qu'à regarder avec effroy
 & tremblement un Ciel taché de Co-
 mettes & prodiges, entrecoupé d'es-
 clairs, chargé de nuages, troublé de
 tempestes, esbranlé de foudres, cou-
 uert d'une nuit espouventable, voilé
 de deuil & d'horreur, pleuant perpe-
 tuellement du feu & du souffre? La
 terre n'est-elle pas plus belle reuestue
 de sa nouvelle robe verte, peinte de
 toutes sortes de fleurs, superbe de la
 diuerse chevelure de tant d'arbres, ri-
 che de toutes sortes de fruits, arrou-
 sée de fleuves de lait & de miel; que
 toute estonnée & tremblante des ri-
 gueurs d'un long hyuer, couverte de
 gelee & de neige, portant la face mai-
 gre & passe, le teint flestry & tané,
 le sein rauulé & sterile, & noyé de tor-
 rents desbordez? Ne seriez-vous pas
 plus heureux & plus aises, faisant vos

charges & offices, exerçans en paix vos professions & vos mestiers, viuans en abondance de toutes choses, & s'il le faut ainsi dire avec superfluité ? ne seriez-vous pas plus contents d'auoir le labourage libre, le commerce ouuert, & les voyages assurez ; que de demeurer oisifs & inutiles sans exercice ny dignité, manquans du support de toutes choses necessaires, n'osans sortir hors de vos portes, assiegez de la guerre dans vos villes, & combatus dans vos maisons de maladie & de faim ? Vne chose me console, & me donne quelque esperance de vostre amendement, & meilleur sens. Tout ainsi qu'ès maladies des corps humains, tant soient-elles violentes & malignes, les Medecins ne se desfient iamais de la vie, tant que les parties nobles demeurent entieres & non offensees, sans ressentir le dommage ny la contagion du mal. De mesmes, les principaux membres de cest Estat n'ayant esté iamais frappez du venin, ny de la mauuaise vapeur de ceste pe-

PHILIPPIQUE III.

stillante fièvre d'esprits, nous promettent par leur vigueur & leur cōstance, la reconualescence prochaine des autres parties du Royaume, les plus altérées & corrompues. Le seruice du Roy est embrassé & affectionné fidelement, par tous les hommes d'honneur de toutes conditions, qui y ont consacré leurs fortunes & leurs vies: toute la dignité & majesté de l'Estat s'est rangée du costé du Prince: les marques naturelles, les solides & vrayes enseignes de cest Empire, ont esté conseruees & sauuees par sa valeur & sa prudence, les meilleurs & plus grands du Royaume deffendent genereusement la iustice de ceste cause: en fin c'est le party des gens de bien. Cela me fait esperer que leur vertu & leur courage vous esmouueront à suiure les mesmes pas de salut; que le clair flambeau de leur hōneur rallumera les vostres dās leurs cendres: & que la bonne & droite constitution de leurs ames, prouoquera la santé des vostres, si raualees & descheues de la fidelité François.

Sinon ie prens ceste assurece du bon
succés des affaires du Roy, que sa ver-
tu & sa valeur, les outrageuses miseres
qui vous accablent, l'insupportable
extremité de toutes choses , & la
crainte d'une plus dure & plus fas-
cheuse fortune, vous reduiront au
point de ce deuoir, dont la raison &
la conscience ne vous auront peu
rendre capables.

F I N.



